

MISÙUKÀ YIDÌ MU

BÙLOKÒ MPINDYEWU AYI



Twasakidilaayi. Twinyikaayi mitu yetu katanci kakese.

Taatù wa mu Dyulu, tudi tuKusakidila, leelu ewu, bwa dyèsè edi dya kudisangisha pamwe musangu ewu cyakabidi, bamanye ne dîngà dituku twadyakudisangisha bwa musangu wetu wa ndekeelu, bu baa cifwaka, ne pashiishe netudisangishe Neebe mu ngiikadilu mutumbishiibwe, ne bapikula bônsò baa bikondo byônsò nebasangile kwôkò aku.

² Kaa, myoyi yetu yidi yituuta bikole, bwa . . . ne dizuka dikole, mindile bwa dîbà adi kulwadi! Pa nanku, bwôwà bwônsò budi bujimina kutudi. Katwena ne cintu nansha cimwe cya diciina to, cintu nansha cimwe cya kupetela bwôwà. Twètù tudi batekemene ne disanka dyônsò mulayi udi Nzambi wa Cyendelele mutwènzèle, ne tudi bamanye ne m'Bulelela. Ki bwa cinyi tudi ne mwoyi. Tudi ne mwoyi bwa cyôci aci, bwa dîbà diine adi, bwa cikondo ciine aci, piikala cya cifwaka cishintuluke, nenku netuvwijiibwe bafwanangane Nende Yèyè, ne kakwakwikala kabidi masaama, nansha tunyinganyinga, nansha bya myoyi yisaama to. Kaa, byônsò nebiikale bijike pa dîbà adi. Nenku ne disanka mu myoyi, twètù, mu diitabuuja ne bukutu, tudi batekemene Dituku adi ne disanka dyônsò.

³ Ki bwa cinyi tudi badisangishe kaaba aka leelu ewu, Mukalenge, bwa kutonda bilema byetu ne kulomba luse. Ki bwa cinyi tudi batume mpala yetu ku cyoshelu eku mu dinda emu, bwalu tudi bamanye ne tudi baa cifwaka, ne kudi ntupakanyi yàbûngì munda mwetu, kabidi tudi bùle tente ne bilema. Kadi tudi tulwa bwa kutonda bilema byetu, ne pashiishe kutangila kudi Taatù wetu wa mu Dyulu ne myoyi myunzulula, bwa mabenesha ne divwijuluja dya dikanda dyetu ne diitabuuja dyetu bipyabipya, biikàlà Ye mwa kutupa mu dîbà edi, bu mutudi badisangishe kaaba aka bilondeshile mulayi, “mu myaba ya mu Dyulu mu Kilisto Yesu.” Bwalu tudi tujikula twamba ne tukaadi buumuke ku lufu baye ku Mwoyi, ku mulayi Wende, ne tukaadi bambwibwe mu cyuyÿà cya mu Dyulu, basômbe Nende mpindyewu. Swaku bwa Yèyè atulongesheku mu dinda emu bintu bidiYe muswe bwa twètù kumanya, ne atupe Dyâmpà dya Mwoyi, bwa twamona mwa kudiishiibwa bwa matuku acilwalwa adi kumpala kwetu. Enzaku nanku, Mukalenge. Eci ki disambila dyetu ditudi tulomba mu Dînà dya Yesu Kilisto. Amen.

Nudi mwa kusômbaayi.

4 Mwoyi wenu awu mu dinda emu, muntu ne muntu. Nenku mbîmpè be bwa kwikala badisangishe neenu cyakabidi kaaba aka mu dinda emu, mu cyuyüyà eci cya mu Dyulu cya dikuukwila.

5 Ndi mulwe ndambu pashiishe, tuvwa ne...ndambu wa mabiikila, a mabi be kwēñi anu ndambu wa tusunsa; mwânà wa balume mulaadika pààpa, ùpunga ne lufu. Ne anu mudibi bulelela ne ndi mwimane kaaba aka emu, Mukalenge kulenga mubidi wende ne kumutuma mu njila. Pa nanku... .

6 Nenku mwâ—mwâ—mwânà wa balume mwimane kaaba aka, mwânà wa mwaneetu wa balume wa taatu mukwabo. Bavwa beena Katolike baa menemene, kwônso eku, kadi mbaye mu misà mu dinda emu kadi cintu kampanda kubambila bwa kulwabo apa. Pa nanku bôbò... . Kudi dishiilangana. Pa nanku bakaadi—bakaadi mpindyewu balwa kumbelu, ne biikale badilongolola ku dibatijjibwa dya mu mâyi. Pa nanku badi—badi... . bintu anu bya dikema's bidi Mukalenge wetu wenza dîbà dyônso. Yèyè udi anu wenza maalu ku musangu ne ku musangu. Mbalwe bwa kubwela, kadi kî mbapete mushindu wa kubwela to. Bavwa bamba ne kakuvwa anu mushindu wa kubwelabo to.

7 Mêmè ne: “Ee, panwikala ne dijinga dya kuyiikila naanyi,” ki mêmè ne, “ee, nwâvwilaayi anu kumbelu's, nenku netuyiikile maalu ônsò awu, kwôkò aku.”

8 Ki mêmè kudyambidila, mu njila mutangile ku New York mpindyewu, ku diine disangisha dilwalwa edi, ne mbifwanyine kwikala anu bilenga menemene... . Ndi mumanye ne ndi mufwanyine kwikala mupete cikondo cya citaleela bu mêmè mwa kunwelaku dîsù ne—ne kuteemeshilaku kapyà kaanyi ku kapyà kanudi nwênù bônso bapete aku, ki twêtù kwimana bwa dituku dimwe, mu dinda emu. Ki twêtù kubwela makeelela awu, makeelela mushaale wawa, mu nkankala amu.

9 Ne pashiishe netwikale ne cya kuumuka. Mvwa ne cya kuumuka, mu mapingaja emu, kadi ndi ngeela meeji ne nênye... . Nenku tudi twasa lwendu mu dinda, pa bwebwebwe, pa bwebwebwe menemene paa... . Tudi bafwanyine kupeta ndambu wa nêjè mu njila, ne bikwabo, kuumukila apa ne ku New York. Bikengela tucicile mu Virginie, biikale tucicila mu mikuna, tucicila kabidi mu ma-Allegheny, ne anu menemene mu citupa cya kwinsi kwa—kwa Adirondack kwaka.

10 Pa nanku tudi tubangila ku, nyewu ngäpù mwoyi, cidi ncipalu kuntwaku, cipyacipyà. Mbuupule cipalu cya kale cya Saint Nicholas, mündi ngumvwa bamba. Mbiibake cipyacipyà eci. Nenku ku dyanyi dimanya, netupete amwe a ku maloolo a kumpala a kacya... . bààbanga kucifucisha. Nenku tudi ne kusakidila bwa cyôci aci, bwa beena Mpenta baa mu New York udi mutambe bunene ewu. Ne ndi ncinka ne tudi ne ekeleeziya

yàbùngì yìkalà mwa kukwacishangana mu mudimu, nenku tudi batekemene cikondo cya dicyonkomoka.

¹¹ Nenku netwalukile, bu Mukalenge mwa kwanyisha, munkaci mwa lumingu lwalonda elu. Nenku—nenku cyòci diswa dya Nzambi, mona's, tudi batekemene ne netwikalè mwa kwimana mu dyalumingu, dya lumingu lukwabo lwalwa, bwa—bwa disangisha dya mu dyalumingu mu dinda.

¹² Ne pashiishe ndi musake cyakabidi mpaasata wetu ku luseke, mùntù ngênzenza misangu yònsò amu, nudi numona's, nenku—nenku mvwa ndyambidila ne pàmwàpa bu mèmè mwa kwalukila, biine abi nansha nciyi mumulombe to. Ne pashiishe bu mudibi ne kudi kasumbu kîmpè kaaba aka, ne bantu bândi mmona baa pambelu paa cimenga, biikale apa; ngädÿambididì ne pàmwàpa, diloolo edi, mpaasata yèyè kayi ne cintu kampanda cya pawwaci to, mbifwanyine kwikala bîmpè bu twètù mwa kwenzaku kaadisangisha kakese diloolo edi, anu kîpì menemene, nenku, ee, pàmwàpa kusambidilaku babeedi. [Disangisha didi dyamba ne: "Amen."—Muf.] Twasakidilaayi.

¹³ Tudi tutekemena ne netusambidile babeedi diloolo edi, kwakula pa dyondopa dya kudi Nzambi ne—ne kusambidila babeedi. Kubanga kumpala kwa dîbà bwa twamona mwa kupatuka kumpala kwa dîbà. Ne bu mpaasata mwa kuswa, cidi. . . Nutu pa ciibidilu nubanga pa dîbà mwandamutekete ne tusunsa makumi asatu. Neya bushuwa anyi? Udi wamba bishi bu twètù mwa kubanga pa dîbà mwandamutekete diloolo edi, pa dîbà mwandamutekete? [Mwaneetu Neville udi wamba ne: "Amen."—Muf.] Nenku mbange pa dîbà mwandamutekete ne tusunsa makumi asatu, nenku aci necimpeeshe mushindu wa kupatuka anyi pa dîbà mwandamukulu anyi mwandamukulu ne tusunsa makumi asatu, nenku aci cidi cipa bantu dîbà dya—dya kuyabo, piikalabi ne aci cidi—cidi ci—cikumbane. Bantu bônso báfù mu tuseku pângämbì—pângämbì ne dîbà mwandamukulu, anyi dîbà mwandamukulu ne tusunsa makumi asatu. Ndi—ndi—ndi ntekemena ne nêmpatukè pa dîbà adi. Kusambidila kwa babeedi, nutu bamanye's, katùtu bamanye to.

¹⁴ Pa nanku tudi bapicishe cikondo cya—cya dicyonkomoka kacya twanushiya mu movù wa mabeji apoopoka mushaale ewu, ku ntwadijilu kwawu, ne Mukalenge mmutubeneshe mu bintu binene byàbùngì. Aci. . . Nenku diloolo edi, bu Nzambi mwa kwanyisha, ndi muswe kunulondela bwa dimmwenekela dya musangu mushaale dîndi mupete, dya kudi Nzambi, mu Colorado, kukaadi ndambu wa mbingu. Nenku ki cîndi mwele meeji bwa kunutwadila mpindyewu, pàmwàpa kusalulaku diitabuujja bwa mudimu mwîmpè wa dyondopa diloolo edi, bwa babeedi ne beena ntau.

¹⁵ Mpindyewu, mu dinda emu, bwa kubwela buludi mu diyiiisha, ndi. . . Cintu kampanda ncintuute ku mwoyi kukaadi

ngondo mujima. Ne ncifwanyine kwikala, mpindyewu, ngeela meeji ne badi. . . Badi munkaci mwa dikwata eci pa mikaba anyi? Badi munkaci mwa dikwata eci pa mikaba anyi? Eyo. Mbîmpè. Bwa mmone mwa kumanya ne mmwaba kaayi, piikala mukaba upatuka uya kudi bakwabo. Ncyèna mwa kwamba ne cîngûikalà mwa kwamba mu dinda emu. . . Ncyèna mwa kwamba ne cidi—cidi—cidi. . . Ndi mumanye ne ncilelela, nwamonu's, citupa cya Mukenji neciikale cilelela. Kadi cintu, cîndi njinga kwenza aci, cidi ndukonko mu meeji aanyi. Ncimweke cilelela menemene. Kadi nansha nanku kacya anu ngâlukila, ne kacya mêmè. . . baacimbuulwila, ndi mupete bwôwà bukole mu mushindu wa mêmè mufwanyine kwamba cintu cya cyanaana kadi mufwanyine kushiya didifwikakajila dibi kudi bantu. Nenku cidi. . . Nenku ndi. . .

¹⁶ Bîmvwà mufunde pa kabèji, pa cîmvwà njinga kwamba, ndi mubikose citupa, bwa ncilu kucivwija cipitepite bukole to. Bwalu, nudi numona's, muntu yèyè—yèyè. . . Ntu—ntu munange Mukalenge Nzambi, nenku, mushindu umwepele wûndi mumanye ne ntu muMunange, mbwa pândi mununange nwènù aba. Nwamonu anyi? Ki mushindu umwepele wûndi mêmè mumanye. Kadi paabi ncyèna—ncyèna muswe kwikala ne cintu cimbuulwila kadi pashiishe kubenga kunwambilaci to, piikalaci ne ncyà dinwambila. Ne pashiishe ndi nciina ne bu mêmè mwa kunwambila cintu cipitepite bukole ndambu, nkwèpì kwalwaci kutapa muntu kampanda ku mwoyi. Nenku, nudi bamanye, cidi. . . Bikengela anu wèwè kubànda pa cibumba cya ku cyambilu ne pashiishe kudyumvwa mulombodiibwe bwa kwamba ciwikala mwa kwamba aci. Kwajiki. Ne pashiishe mîngà misangu udi mufwanyine kwamba cintu kampanda, kadi muntu kampanda mufwanyine kupeta. . . mukwabo ngumvwilù pa cyôci aci, nenku yèyè mufwanyine kuya lubilu mutangile ku *elu* luseke; ne pashiishe muntu mufwanyine kwamba ne: “Kaa, eci *ncikampanda*,” nwamonu's.

¹⁷ Kadi ndi muswe numanye ne cîndi njinga kwamba cidi anu ndidicinkila cyanaana, ne mwaku *kudicinkila* udi uswa kwamba ne “kudyela mu bwalu bwa njiwu kakuyi dyanyisha.” Pa nanku ndi. . . Ncyèna—ncyèna ngamba ne eci ncilelela to, kadi cidi anu kaadyeji kakese kândi mufwanyine kunwelela panshi, bwa nwamona mwa kupima bujitu bwaku kadi kumona ne nudi nucyelela meeji kaayi. Ne pashiishe neciikale, mu bushuwa bwa bwalu, ne—neciikale cya mu Mifundu, bwalu ncyèna mufwanyine kuyiisha cintu nansha cimwe. . .

¹⁸ Kadi ki dîbà adi ditukaadi anyi? Eci cikaadi cifike pa dîbà edi, ne bintu ebi mbiswe kwamba cyôci aci anyi? Ndi ndomba, ne byônso bidi munda mwanyi, bwa ne kaciikadi cyôci aci to. Nwamonu anyi? Ndi ndomba ne kaciikadi cya bushuwa to, bwa ne kaciikadi dîbà adi to. Nedilwe's, kadi cikaadi cifike pa dîbà adi anyi? Nwamonu's, ki cîndi ndikonka. Mpindyewu, muntu

yônsò mmumvwe, muumvwe menemene ne, ncyêna mumanye anyi? Ndi anu. . . Dìbà ndyôdì edì anyi? Piikaladi ne ndyôdì, Nzambi ikaleku neetu luse. Kadi, piikalabi ne kî ndìbà adi to, diikale. . . nedilwe.

¹⁹ Mpindyewu, patudi anu tupeta mushindu, tucidi ne njila munene wa diya kumpala kwetu, bu Mukalenge mwa kwanyisha. Ne mêmè bikengela nye dyamwamwa dya mbû, padi anu Noël upita, ku Mputu ne ku Asie; ku Mputu, nangananga. Ne pashiishe ngaalukile muneemu mu États-Unis, bwa ndambu wa masangisha, ne pashiishe ngaalukile mu Afrike wa ku Sud. Ndi mbanga mu matuku abidi a ngondo wa—wa citeema, mu Durban, nenku nya kuumukila ku matuku abidi a ngondo, ngeela meeji, too ne ku matuku dikumi nanku awu, ne pashiishe ndi ne matuku asatu bwa kuumuka mwômò amu kuya ku Johannesburg kadi kubangulula. Kadi ndi ngeela meeji ne nku ngondo mwinâyì, kutwabangila nku matunga a Scandinavie, mu Norvège ne mu Suède ne—ne mu Finlande, ne—ne mu Hollande ne mu Suisse ne mu Allemagne, ne—ne Mputu mujima mwamwa. Pa nanku nwikalaayi mu disambila bwetu twètù.

²⁰ Tudi ne ndambu wa masangisha muneemu, mu cikondo cya Noël mpindyewu, padi anu Noël ujika. Byôbì biine, tudi baswe kupicishila Noël muneemu, kwetu kumbelu. Bânà mbaswe kupingana kumbelu, mu Noël mujima amu. Nenku tudi—tudi banange Arizona, kadi nudi bamanye ci—cintu cidì citupangika, ne twètù peetu citudi katuyi mwa kupwa mwoyi to, ki ekeleeziya ewu ne nwênù aba. Nansha twètù baye penyi, nansha benze cinyi, bidi anu. . . Bânà, mêmè, mukajaanyi ne bônsò. Kakwenaku mwaba nansha umwe bu ewu to. Ncya bushuwa. Kakwenaku mwaba nansha umwe to.

²¹ Nkaadi mwenzelenzele ngendu ya pa mâyi mu mbû yônsò mwandamutekete, ne nkaadi—nkaadi muyaayaaye myaba yônsò, kadi kakwenaku mwaba nansha umwe udi umweka bwanyi mêmè wa cijila bu mwaba ewu nansha. Apa ki pôpò. Anji shiyangana anu naapu musangu umwe cyanaana, pawikala muswe kumanya. Kudiku anu cintu kampanda bwa mwaba ewu. Nkaadi muyiisheyiishe pa buloba bujima, pabwîpì ne bwônsò, kadi kacypu, musangu nansha umwe, mwaba nansha umwe, wûnkaadiku muumvwe Nyuma wa Nzambi, mwikale ne budishikaminyi ne bikwabo, bu mûndì ngumvwa pândì mwimane mwaba ewu mene. Apa ki pôpò.

²² “Nzambi, biikalèku. . .” Bu mudi dituku dîngààkateèkà dibwe dya mu ditumba adi mwaba wawa adi, mêmè kwamba ne: “Mukalenge Nzambi, kwitabiku bwa adishinde to.”

Bantu bavwa bamba ne: “Mu ngondo ibidi eyi, neciikale cilongolwedi cya mashinyi.”

²³ Mêmè kwamba ne: “Kwitabiku bwa adishinde to, Mukalenge. Enza bwa ikale mwimane, ne bantu munda emu

biikale baKutumbisha paapingana Yesu.” Ndi mutwishiibwe ne nebiikale mushindu awu.

²⁴ Mpindyewu tubuululaayi mu Bible mpindyewu, ne—ne biikale batekemene ne Mukalenge neatupe mabenasha Ende. Nenku tudi baswe kubala ndambu wa Mifundu. Ndi ne ndambu wa Mifundu kaaba aka mifunda pa mabeji yîndi muswe kwikala nteela, ne bimwe bintu bifunda pa mabeji. Nenku ndi muswe kubala mu myaba isatu mu Bible, ne nêngânji kunupeeshayi, dyambedi. Ndi muswe kubala mu Yuda 5 ne 6. Yuda udi Mukanda anu umwepele, nudi bamanye. Ne pashiishe ndi muswe kubala Peetelo Mwibîdi nshapita mwi2, 4 ne 5. Pashiishe ndi muswe kubala Peetelo wa Kumpala, 3.18 too ne ku 20.

²⁵ Nenku cyena-bwalu cyanyi mu dinda emu, bu Mukalenge mwa kwanyisha, cidi ne: *Misùùkà Yîdì Mu Bùlokò Mpindyewu Ayi*. Uh-huh. *Misùùkà Yîdì Mu Bùlokò Mpindyewu Ayi*, mikangilamu, myediibwe mulawu bwa kashidi. Kashidi, kakuyiku mushindu nansha umwe wa yôyi kusungidiibwa to, nwamonu’s, misuuka yidi myela mu buloko mpindyewu ayi.

²⁶ Mpindyewu twânjààyaaku kubala mu Mukanda wa Yuda, dyambedi. Ngeela meeji ne ndi mwenze cimanyinu mwaba ewu pa mwaba wa kumpala awu, mu Yuda; ne pashiishe mu Peetelo Mwibîdi, ne pashiishe—pashiishe mu Peetelo wa Kumpala. Mpindyewu, Yuda, ndi muswe kumubala yônsò mujima; kadi anu bwa kulaminyina dîbà, bwalu tukaadi dîbà dikumi ne tusunsa makumi asatu, nêmbangilè ku mvensa mwi5. Mpindyewu, Yuda uvwa mwanaabo, mwânà wa mamwëndè, wa Yesu Kilisto, bu mutudi twètù bônso bamanye. Nwamonu anyi? Úvwà mwânà wa Yozefu.

Bwa bwalu ebu ndi muswe kunwulwija, nansha munukaadi nwênù bamane kumanya bwalu ebu musangu umwe, mushindu uwwabi ne Mukalenge, mumane kusungila cisamba mu kucipatula mu buloba bwa Ejipitu, pashiishe wakabutula aba bavwa kabayi biitabuwe.

²⁷ Wakabasungila, dyambedi, kubapatula mu Ejipitu, ki pashiishe uvwa ne cya kubabutula bwalu kabaakatungunuka ne mukenji wabo to, nwamonu’s.

Ne banjelo bavwa kabayi balame ngiikadilu wabo wa ku cibangidilu, kadi bààkashiyà cisòmbedi cyabo bôbô abu, yèyè wakabalamina mu dishintuluka dya kashidi kadiy- . . . nkanu ya mîdimà ya mwinshi too ne ku cilumbulwidi cya dituku dinene.

²⁸ Banjelo baa bwena bàvwàku musangu kampanda basòmbèle mu Dyulu abu, kadi kabayi balame ngiikadilu wabo ne mushindu uvwabo basanganyiibwa awu, badishinde, ne biikale mpindyewu mu nkanu ya mîdimà ya Cyendelele, nkanu ya mîdimà ya kashidi, babalamine mu mushindu ewu

too ne ku Cilumbulwidi cya Dituku dinene piikalabo mwa kulumbulwishibwa pamwe ne bakwabo bônsò beena bupidya.

²⁹ Mpindyewu mu Peetelo Mwibîdi, nshapita mwi², kubangila ku mvensa mwi⁴, udi anu mukanda umwe anyi ibidi paanyima pa wôwò ewu, nwamonu's.

Bwalu piikalabi ne Nzambi kaakalaminyina banjelo baakenza mpekaatu abu to, kadi mubakupe mwinshi mu iferno, ne mubêlè mu nkanu ya mîdimà, bwa kulamiibwabo too ne ku cilumbulwidi;

Ne kayi mulaminyine baa pa buloba baa kale, kadi musungile Noa, ne bantu mwandamukulu, muyiishi wa bwakane, utuma mvula pa buloba bwa bantu bavwa kabayi baneemeka Nzambi;

³⁰ Kayi mulaminyine Banjelo to; mubêlè mu nkanu ya mîdimà, kadi kupiisha buloba bujima ku kabutu, kaa—kaa Noa.

³¹ Mpindyewu mu Peetelo wa Kumpala, nshapita 1 ku... Peetelo wa Kumpala, nshapita mwi³, kubangila ku mvensa wa 18, tudi tubala kabidi. Mpindyewu, teejeaayaaku ne ntema mpindyewu.

Bwalu Kilisto pende wakakenga musangu umwe bwa mpekaatu, mwakane bwa babi, bwa wamona mwa kutufikisha kudi Nzambi, mwikale mushipiibwe mu mubidi, kadi mwikale muvwiibwe ne mwoyi ku Nyuma: . . . mushipiibwe mu mubidi, kadi muvwiibwe ne mwoyi ku Nyuma:

Ku yêyè aku nkwakayaye kabidi kayiisha nyuma ya mu buloko; wakayiisha bantu aba mu buloko;

Bavwa cikondo kampanda ne cishiku, musangu kampanda uwu mwoyi mule wa Nzambi mwindile mu matuku a Noa, pavwa bwâtù bwikale bwibakiibwa, muvwa bantu bakese, mmumwe ne, misuuka mwandamukulu yakasungidiibwa ku mâyi.

. . . cimfwanyi cimwecimwe eci cya dibatiiza didi ditusungilâ kabidi mpindyewu (kacyi dyumusha dya bukooya bwa mubidi to, kadi dyandamuna dya kondo kaa mwoyi kimpè kudi Nzambi,) ku dibiika dya ku lufu dya Yesu Kilisto:

Udi mubwele mu dyulu, ne usanganyibwa ku diboko dyabalume dya Nzambi; banjelo ne makookeshi ne makole biikale bivwiibwe mu bukookeshi bwende.

Tusambilaayi cyakabidi.

³² Mpindyewu, Taatù wa mu Dyulu, mu—mulongolongo wa Mifundu kaaba aka mushindu ewu, bantemu basatu, myaba isatu mu Mifundu yifila bujaadiki. Ne Wêwê udi mwambe mu Diyî Dyebe, ne: “Mukana mwa bantemu babidi anyi basatu, diyî

dyônsò dijaadikiibwe.” Mpindyewu nyewu nkulomba Wêwè, Éyì Nzambi, bwa Wêwè kulwa kudi bantu ne kuumvwija Dîyi edi, Mukenji ewu, mu bukênkè mudibi ne cya kwikala, bwa mulume yônsò, mukaji yônsò, mwânà wa balume yônsò, anyi wa bakaji yônsò, amone mwa kuumvwila mu dikumbanyina dyûdi Wêwè mumuteekele bwa kuumvwilaye adi, ne mwikale mpindyewu mumanye ne bantemu basatu aba mbadi bafila bujaadiki bwa Bulelela.

³³ Nenku ndi ndomba bwa Wêwè kutuma Nyuma Mwîmpè pambidi peetu mpindyewu. Nenku twètù netutangije mèsù etu kudi Ewu Udi Mfumu wetu, munkaci mwetu mu dinda emu, Mukalenge Yesu Kilisto; kutudi babàndishìibwe mpindyewu ku diitabuujà, basòmbe mu myaba ya mu Dyulu eyi mu Yèyè. Tudi bindile Mukenji Wende. Úwákwilè kutudi twètù, Mukalenge, uwuteelejile kutudi, patudi tulomba bwa Wêwè kutengula mishiku yidi yakula ne maci adi ateeleja, bwa kwikalabi bwa luumu ne butumbi bya Ewu Udi Mifundu awu. Bwalu tudi tulomba nunku mu Dìnà Dyende. Amen.

³⁴ Mpindyewu, nwavulukaayi masangisha a diloolo edi, mudimu wa dyondopa. Ncyèna ngeela meeji ne mbifwanyine kukengela bwa kwabanya twarta twa disambila to, pa nanku tudi tusambidila anu babeedi cyanaana. Ndi ne cintu kampanda cîndì njinga kunwambila, ne ndi—ndi ntekemena ne necibweje anu disangisha mu kaaba kaa ne nekwikale anu dyondopa dya mishindu ne mishindu. Ndi mumanye ne necyenzeke patwikala anu mwa kuciitabuujà mushindu awu.

³⁵ Mpindyewu eci, misuuka mu buloko mpindyewu, misuuka yidi mu buloko mpindyewu!

³⁶ Mpindyewu, musuuka wa muntu kî mmubidi wa muntu to, wôwò mmusuuka. Nwamonu anyi? Kadi musuuka ncintu kampanda cidi ciikale ngii—ngiikadilu wa nyuma. Ne pashiishe padi ngiikadilu wa muntu. . . Padiye mwambe ne: “Tudi bafwe,” Mufundu udi utwambila anu patooke ne, “tudi bafwe, ne myoyi yetu mmisokoka mu Nzambi kupicila ku Kilisto, mitwibwemu citampi kudi Nyuma Mwîmpè.” Mpindyewu, kabivwa ne mubidi webe ngudi mufwe to; nyuma webe kî ngudi mufwe to. Ngiikadilu wa nyuma webe ngudi mufwe; wamonu’s, ngiikadilu, udi mwikale musuuka. Ngiikadilu wa musuuka webe udi—udi Nzambi, pawikala mulediibwe cyakabidi. Kabiya nanku to, ngwa pa buloba. Cintu cyônsò cidi cibange cidi ne cya kushiikila, ki bwa cinyi mushindu umwepele wa wêwè kwikala ne Mwoyi wa Cyendelelele ngwa kwikala ne Mwoyi utu kacya kawuyiku mubange to. Nenku pa dîbà adi webe mwoyi wakabanga pawakalediibwa, paakapwidija Nzambi mupuuya wa mwoyi mu mimpempe yebe ne wêwè kulwa musuuka udi ne mwoyi apu, pa dîbà adi ki wêwè kubanga pa dîbà adi. Kadi paudi. . .

37 Ngiikadilu uvwa munda mwebe awu, ku ngiikadilu wêwê uvwa wa pa buloba, mushale mwenyi kudi Nzambi, wêwê uvwa anu nyama wa cya bushuwa ewu. Ncya bushuwa menemene. Muntu kana yônsò ewu mmumanye ne twêtù tudi nyama yidi yamusha. Mbanganyi badi bamanye aci? Twêtù aba, tudi nyama yidi yamusha, tudi nyama ya mashi masaluke, kadi aci's ki citudi ku difukiibwa dyetu dya pa buloba. Kadi, nudi numona's, cidi cituvwije bashiilangane ne nyama mikwabo yidi yamusha eyi, cidi—cidi ne Nzambi mmuteeke musuuka munda mwetu. Nwamonu anyi? Mpindyewu, nyama mikwabo yidi yàmushà eyi kabyena bikengela yivwale bilàmbà to. Kakwena nyama mikwabo udibi bikengela bwa avwale bilàmbà bwa kusokokaye bundu bwende to, pa kuumusha twêtù. Anu twêtù nkaayeetu ki badi bacyenza, bwalu tudi ne musuuka. Kadi, nwamonu's, Nzambi, ku cibangidilu, uvwa mumanye ne muntu uvwa mwa kwikala mufwanangane ne cinyi. Ki Yêyê kufuka buloba, ne kutwala mishindu yônsò ya nyama, kuumukila ku udi mutambe kupwekela too ne ku udi mutambe kutumbuka; ne nyama uvwa mutambe kutumbuka wâkalwa, uvwa mmuntu.

38 Nenukusha, kumpala, muntu wâkenjiibwa awu, uvwa mmuntu-nyuma, mu cimfwanyi cya Nzambi.

39 Bwalu: “Nzambi udi Nyuma,” Yone Munsantu 4. Mpindyewu: “Yêyê udi—udi Nyuma. Ne bàdi bàMukuukwilà, badi baMukuukwila mu Nyuma ne mu Bulelela. Ne Dîyi Dyebe didi Bulelela.” Mpindyewu, tudi tuMukuukwila mu Nyuma ne mu Bulelela. Yêyê udi—udi Kampanda-Nyuma.

40 Pa dîbà adi kakuvwa muntu bwa kudima buloba to, ki pashiishe Nzambi kwenza muntu ku lupwishi lwa buloba.

41 Pashiishe Yêyê kupatula mu lubadi lwende amu, cintu cyangata ku cikwabo, lubadi; nenuku, ku lwôlò alu, kutapulula muntu ewu uvwa ne ngiikadilu ibidi, yivwa yônsò ibidi miikale bukaji ne bulume. Ki kupatulaYe bukaji abu, bwalu buvwa ndinanga, ne kubuteekaYe mu muntu wâkabîkidiibwa ne ng'Eva, uvwa Adama mwinyike ne ng'Eva awu, uvwa mwikale mukajende awu. Ki mwaba awu uvwa dinanga dyende, dya mu mubidi, dinanga dya fileo, dilamate kudi mukajende. Mushindu awu ki udi ukengela bwa muntu kwikalaye leelu ewu, ne mukaji pende bwa bayende. Mulume, bulume; mukaji, bukaji.

42 Nenuku pa dîbà adi, nwamonu's, paanyima paa Yêyê mumane kwenza muntu mu cimfwanyi Cyende Yêyê mwine, “Wakabafuka, mulume ne mukaji,” kakuvwa muntu bwa kudima buloba to. Ki Yêyê kumuteeka mu lupwishi lwa buloba, ki bwa cinyi wakalwa . . . yêyê ki uvwa muntu awu. Muntu wa buumuntu ewu uvwa wa wamusha, nwamonu's, uvwa nyama; kadi Yêyê kuteeka nyuma wa Nzambi ewu, mwoyi kampanda, munda mwende, ki kumwenzaye mu mushindu wa kumonaye mwa kwenza disungula. Ki pashiishe muntu ewu . . .

⁴³ Mpindyewu twètù tutu tudyelela meeji mutudi cintu kampanda. Anji vulukaayibi, twètù aba tudi cinyi? Cimoto cya buloba. Kwajiki. “Nenku bwalu udi lupwishi, ku lupwishi nkuwapingana.” Pa nanku panudi numona muntu ewu wenda upweka ne mùsèèsù, udyelela meeji mudiye kampanda, nudi bamanye’s, mwikale ne ndambu wa dilonga dya tulaasa ne bikwabo, vulukaayi ne, ncimoto cya lupwishi lwa mu Indiana. Kwajiki. Ne mukaji udi muvwale kaputulu, wenda unwa mfwanka ne wenza maalu a lukutukutu mu mùsèèsù awu, wenda ujeekeja nyima byenze bu ne ditunga dijima edi ndyende yêye awu, ncimoto cya lupwishi lwa mu Indiana, ne mushindu awu ngwapinganaye. Pa nanku kwènà nansha ne bwa nsongo to twamb’eku twamb’eku, wamonu’s. Pa nanku aci, ncyà bushuwa, s’ki cyùdi wèwè awu.

⁴⁴ Kadi, musuuka udi munda amu awu, nwamonu’s, pa musuuka awu mpadi Nzambi ukwacila mudimu, nwamonu’s. Bu Yêyè anu mwa kufikisha ngiikadilu awu, nyuma awu, ku diitabangana nende Yêyè, pa dîbà adi ngiikadilu awu udi ufwa, ngiikadilu awu ne dinanga dya maalu a pa buloba bidi bifwa, ne maalu a pa buloba mmawfe. Nwamonu anyi? Bwalu: “Pawikala munanga maalu a pa buloba, anyi bintu bya pa buloba, dinanga dya Nzambi kadyena munda mwebe to.” Nwamonu anyi? Nenku bikengela muntu alediibwe cyakabidi. Pa nanku, bikengela ngiikadilu ewu afwe, ne ngiikadilu wa Nzambi alwe ne ikale ne mwoyi munda mwebe. Nenku Nzambi ki cintu cimwepele cidiku citù kacya kaciyiku cibange anyi kaciyiku mwa kwikala ne ndekeelu to.

⁴⁵ Pa nanku, ki bwa cinyi, Yêyè mmuswikakane nende, nwamonu’s, ne mwangate muntu ewu, wa pa buloba ewu, ne Nyuma wa Cyendelele ewu, ne mubiteeke pamwe. Bwalu, Nzambi uvwa uDimweneshila mu cyôci aci, bwa Yêyè kulwa Muntu paakalwaYe Kilisto Yesu, ne Yêyè nguwwa Nzambi, nwamonu’s. Nzambi uvwa munda mwa Kilisto; aci, nwamonu’s, musòmbèle munda Mwende, upungisha baa pa buloba ne Yêyè mwine. Nenku, ku Muntu mupwangane awu, muntu ne muntu wa kutudi twètù badi kabayi bapwangane kadi biikale twitabuuja Nzambi ne biitabe Cyôci aci aba, ùdi ùlwa bupwangane Bwende.

⁴⁶ Nenku Yêyè kaakalekelaku bwa mubidi Wende kumonawu dibola, anyi Kaakalekelaku musuuka Wende mu iferno to, kadi WakaMubiisha ku lufu mu dituku diisâtù, ne Yêyè udi ne mwoyi kashidi ne kashidi. Ne twètù netwikale ne mubidi mufwanangane ne mubidi Wende wa butumbi awu.

⁴⁷ Ki bwa cinyi tudi tubatiiibwa mu Dîna Dyende, bwa twamona mwa kupatuka mu Dîna Dyende, mu lufu Lwende, mu dibiika Dyende dya ku lufu, bwa twètù kubiika cyakabidi ku lufu, biikale tujaadikila baa pa buloba ne tudi ne Mwoyi

mupyamupya ne, muntu mukulukulu awu ukaadi mufwe. Tukaadi bajiike ngiikadilu wa kumpala awu. Nwamonu anyi? Ngiikadilu wa kumpala awu ukaadi muye, ne mpindyewu tudi baa ku ngiikadilu wende Yèyè. Yèyè mmusòmbèle munda mwetu, ne katwena twenza diswa dyetu twètù to. Tudi twenza diswa dyende Yèyè. Katwena twela meeji etu twètù to. Meeji, meeji ncidi cyela meeji aci. Meeji avwa munda mwa Kilisto Yesu awu ngadi munda mwa mwena kwitabuuja yònsò. Nwamonu's, ki—ki musuuka ngawu, ne pa cyòci aci mpatudi twakwila apa. Mpindyewu, pa citupa aci mpàndi ngeela meeji mpindyewu apa, ne ncyòci aci cidì munda mwetu, musuuka.

⁴⁸ Mpindyewu, bu twètù mwa kumona, mu cyòci eci, mudi bintu byàbùngì bidì byenzeka misangu mikwabo, kadi biikale tudikonka ne mbwa cinyi bidì byenzeka, ne tudyela twètù biine nkonko, tuyeela kabidì bakwabo. Kadi ndekeelu wa byònsò, paanyima paa cikondo kampanda, tulwa kujandula ne, piikalabi ne tudi beena Kilisto, byònsò abi bidì byenzeka anu bìmpè, mu mushindu kampanda anyi kansanga. Nukaadi bamonemone cyòci aci. Beena Kilisto bònsò batu bamona cyòci aci. Tutu tudikonka ne mbwa cinyi tuvwa bacyènzè.

⁴⁹ Mwawa anu ndikonka misangu mikwabo, pàngàakabalà Bible musangu wa kumpala ne: “Bwa cinyi Nzambi wakalekela Abraham, muntu munene awu, wimana kwaka wamba ne Sarah kî mmukajende?” Ne mwakamulekelaYe wimana kwaka kadi kubanga kudinga pa bwalu abu, ne bintu byakenzaye abi, ne pashiishe mwakalekelaYe Abraham ushiya buloba bulaya bwine bwakamwambilaYe ne kashiyi abu. Mwena Yuda yònsò udi ushiya buloba bulaya mmutwe cìmpìngà, bwalu Nzambi wakabapabu ne wakabalaya bwa bòbò kushaala basòmbèlemù, nwamonu's, kadi bòbò kubushiya. Ki yèyè kupweka kuya mu Guerar. Kadi bu ne kabivwa bwa cyòci aci to. . .

⁵⁰ Ki pashiishe Abimeleka, mfumu wa diine ditunga dya beena Peleshete adi, kukwacikaye dinanga bwa Sarah ne kuswaye bwa kumusela, kadi ùvwa muntu mwìmpè, muntu mwakane. Ne pàmwàpa paanyima paa yèyè mumane. . . Eci's cidì cimweka cicimbè, kadi mbwa kunutookeshilaci. Paanyima paa yèyè mumane kwowa màyi ende a diloolo ne muvwale pìjámá wende, ne mwenze masambila ende ne mukalaale mu bulaalu, Mukalenge kumumwenekela e kwamba ne: “Wèwè's udi mwomumwe anu ne muntu mufwe,” pende muntu awu kayi nansha ne civwaye mwenze to. Nwamonu anyi? Ùvwa anu museeswishii bwe kakuyi mpatà to, kudi Abraham ne Sarah bònsò babidì. Ncya bushuwa. Yèyè ne: “Udi ne mukaj'a bende, wamonu's. Ne Mémè—Mémè ncyakuumvwaku masambila ebe to, nansha wèwè mwenze masambila bùngì bishi. Wèwè udi mwomumwe anu ne muntu mufwe. Kadi muntu awu mmuprofeta Wanyi.” Nwamonu anyi?

51 Nwamonu's, mbikole bwa kuumvwa cyôci aci, nwamonu's. Kadi bu ne kacivwa cyôci aci to, nunku katuvwa bafwanyine kumanya ne ngâsà ncinyi to.

52 Bwa cinyi wakaya kasela Hagàà, paanyima paa mumane kupeta mukaji mulenga naka bu Sarah wawa? Ne yêye mwine kavwa anu muswe kucyenza to, nwamonu's, kadi Sarah nguvwa mumwambile. Ki pashiishe Mukalenge kumwambila ne: "Teeleja cidi Sarah mukwambile aci." Bwa cinyi? Bivwa bikengela kwikale Ishamela, "bwa mukaji mupika ne mwanende kabàlu kwikala bapyanyi pamwe ne mukaji mudishikamine ne wende mwânà." Nudi bumvwe cîndi muswe kwamba aci anyi?

53 Bintu byônsò ebi mbifwanyikijilu. Bwa cinyi byakakengela bwa muprofeta awu akasele ndumba ne apete. . . ne bânà biine aba, kulela nende bânà babidi? Mbu cimanyinu. Bwa cinyi mukwabo wakalaadila kaseke kaa dyabalume matuku nkama isatu ne makumi anaayi, pashiishe kulaala matuku bûngi kampanda luseke lukwabo mushindu awu? Mbu cimanyinu. Mukwabo yêye wakakopola bilâmbà kadi kwenda nanku kumpala kwa Izaleela. Nenku, mpindyewu, bintu byônsò abi, bivwa mbifwanyikijilu ne mindidimbi, nwamonu's; nenku bikengela twikale ne bintu abi, bwa kubyuja.

54 Nenku, misangu yâbûngi, maaluu atu atwenzekela atudi tudikonka ne mbwa cinyi. Nzambi ngudi udyanjila kutuleeja cintu kampanda.

55 Mpindyewu, pâncivwà mwânà mutekete, ne nudi bamanye bwalu bulonda bwa nsòmbelu wanyi, mvwa—mvwa misangu yônsò anu ngiitabuuja, kacya anu ngâbanga kuvuluka. . . Cimwe cya ku bintu bya ntwadijilu bindi mvuluka. . . Mpindyewu eci, mpindyewu, nudi bafwanyine kwikala bangambile cintu kampanda makeelela awu, kadi mêmè mufwanyine kucipwa mwoyi lelu ewu. Kadi kudi bimwe bintu, kale wawa, bitu byenzeke mu matuku etu a ku bwânà, bââbûngi beetu batu mushindu awu, bitudi anu tuvuluka misangu yônsò. Kadi bidi bimweka anu bu bicimbè bwa kwamba eci nunku, kadi ndi mvuluka pâncivwà nkalaba, muvwale nkanzu mule. Bânà bakese, mpindyewu bamwe baa kunudi baa bukole bwanyi ebu mbafwanyine kuvuluka ne, bânà bakese bavwa ne ciibidilu cya kuvwala nkanzu mile menemene. Ne ndi mvuluka pâmvwà nkalaba, kadi ngangata nêjè ku makàsà a taatu mwakunyi mmudya, paakalwaye kwetu kumbelu ne kushaala mwimane pabwîpi ne mafuwa.

56 Ne pashiishe cintu cidi cîlondà cîndi mvuluka cyâkenzekà mu nsòmbelu wanyi, civwa ncikeena-kumona, cya kumpala cînkaadiku mumone, baakangambila ne nênsombelè citupa cinene cya matuku aanyi a mwoyi pabwîpi ne cimenga cidi dînà ne New Albany. Nenku mvwa mwânà mukese wa ku mikuna kuntu kwaka, kakuyiku nansha ngangabuka piine

paakandelabo apu to. Nenku—nenku mêmè—mêmè...Nudi bamanye, bôbò...Ndi musòmbèle muneemu emu kukaadi bidimu bitwe ku makumi ataanu, anu muneemu emu; cikeena-kumona's.

⁵⁷ Ne pashiishe mushindu wîntù misangu yônsò mumanye ne kuvwaku Nzambi mwaba kampanda, ne muvwaYe mwakule naanyi pâncìvwà mwânà mutekete, “bwa ncìnu mfwanka, anyi maala, anyi ncikooyishi mubidi wanyi,” mbwena kwamba ne kwenda masandi ne bakaji ne bikwabo. Mêmè mvwa anu naabi bwôwà misangu yônsò, mucìkàle anu nsongaalume.

⁵⁸ Nenku pashiishe mvwa mupatuke muye katwa buluwà musangu kampanda, cìdì cimweka kùndì bu ngiikadilu mwibìdì, kunanga ditwa dya buluwà. Nenku mvwa mupatuke muye katwa buluwà ne mwânà wa balume mukwabo, Jim Poole, mwânà mulenga be. Ngeela meeji ne mwanende wa balume utu ulwa mu ekeleeziya emu, Jim mwânà, batu famiye wa bantu bîmpè be. Ntu mumanye ba-Pooles abu. Jimmy ne mêmè tuvwa tulaala kaaba kamwe ne tuvwa basòmbèle kaaba kamwe kubangila anu patucivwa bânà batekete mu kalaasa. Tudi bashiilangane ku ngondo bu isambombo nanku, bwa ku bidimu byetu. Kadi Jimmy kulekelelaye cingoma cyende, ki kungaasaci mu mikolo yônsò ibidi, anu mu ntanta mwîpì menemene naanyi, ne cingoma cya tundimba. Kuyabo naanyi ku lupitaadi, ne, kwine aku, nkaavwa mulaaleku mpùnga ne lufu, kakuyiku nî mpeneseliina nî ncinyi mu miine matuku awu to. Nenku, mpindyewu, bavwa banteekele cipese cya cindundu mwinshi, ne ndi mumanye ne bufuku abu. . . Bavwa ne cya kumpanda mu dinda dya pavwabu mwa kucya apu.

⁵⁹ Ki kusukulabo anu mputa awu cyanaana, nenku ne biimisunya binene bya munyiinyi bipandike, ne kwangatabo kashoola e kubikosabo, ne bivwa bikengela mêmè kwikala mukwate byanza bya muntu kampanda. Nenku bavwa ne Franckie Eich, mmufume ku didishipa anu abidi adi panshi aa, nenku byakakengela bwa kukwatabo, kukanunabo byanza byanyi bwa kubituula ku maboko ende, paa—paakajikijabo. Mvwa ngeela mbila mikole ndila mwadi, kacya anu ngaakwata mushindu awu, pavwabo bakosa cisunsukila cya mukolo aci bacyumusha. Mvwa ne bidimu dikumi ne binaayi, mucìkàle anu mwânà's.

⁶⁰ Ki bufuku abu mêmè kuteeta bwa kuya mu tulu, ki bôbò...Mêmè kutabuluka, cintu kampanda cisotoka. Kadi ki mashi aa, matwe ku litres ibidi ngeela meeji, mapatuke mu mijilu. Ki kwangatabo...kukwatabo fôtô ku cyamu cya mîdimà, ki kwambabo ne kandimba kavwa kakiimanyine pabwîpì menemene ne mujilu munene awu, ku luseke ne ku luseke, mu mushindu wa ne anu diwufyondola kakese cyanaana divwa difwanyine kuwukosolola mu bitupa bibidi,

bya mêmè mufwanyine kubanga kujimija mashi. “Ee,” mûngààkadyàmbidilà, “ki wanyi ndekeelu nyèyè ewu.” Ki mêmè kwela byanza mwinshi mushindu ewu e kucyambulula kuulu, ki mashi binzololokela mu byanza, mu mashi aanyi mêmè mwine ki mûmvwà mulaadile amu. Mêmè kubiikila, kudidisha kangonga. Munganga mukaji kulwaye, ki yèyè kuàbooya anu cyanaana ne nsùmè bwalu kakuvwa civwabo bafwanyine kwenza nansha cimwe to.

⁶¹ Ki paakacyabu mu dinda, mu ngiakadilu ya butekete ayi, kabavwa beelangana mashi a mu mijilu mu miine matuku awu to, munudi bamanye, ki bôbò—bôbò kumpanda. Ki bôbò kuntwa bwanga bwa ether. Nenku pâmvwà. . . Ether wa kale awu, ngeela meeji ne nudi bavuluke, ki uvwa bwanga bwa dibenga kusaamisha bwa kale abu. Nenku ne ether awu mu mubidi, pavwaye unjika mu mubidi, ether uvwa unjika mu mubidi paanyima paa mêtà mwandamukulu. Bivwa bikengela kuntwabo wabûngì, bôbò kwela meeji ne mêmè ncivwa mufwanyine. . . ncivwa mufwanyine kubiika to. Kabavwa mwa kumfikisha ku dibiika to.

⁶² Ndi mvuluka ne Mandamu Roeder nguvwa mwimane ku luseke lwanyi, mu lupitaadi amu. Ncyadyakupwaku mukaji awu mwoyi to. Nansha nî ncinyi nî ncinyi cyenzeke, ncyèna mufwanyine kumupwaku mwoyi to. Uciwva anu mukaji mutekete mwine musangu awu. Bayende uvwa mfumu wa midimu mu cyapu cya dyanza dya mashinyi a tudyendelandela emu. Nenku ndi—ndi mvuluka muvwaye mwimane ku luseke lwanyi aku, ne yèyè ne Mandamu Stewart. Ne mu bushuwa bwa bwalu bôbò biine abu mbaakamfucila mfranga ya lupitaadi. Mêmè. . . Katuvwaku nansha ne nshima miine ya kudya eyi to, kwetu kumbelu, kadi anji ambaayaaku tûng mutuvwa mwa kufuta mfranga ya lupitaadi, nkama ya ndola ayi? Kadi yèyè mukaji awu, kupicila ku kasumbu kaa ekeleeziya wabo ne kaa Ku Klux Klan, kumfucilabo mfranga ya lupitaadi ayi, beena Mason. Ncyèna mwa kubapwaku mwoyi to. Nwamonu anyi? Nansha byôbì ne batu benza cinyi, anyi nî ncinyi, ntu anu. . . kudiku anu cintu kampanda, ne cyôcì aci cidì anu cishaale cindamate, nwamonu’s, cyakangenzelabo aci. Ki kufutabo mfranga ayi kudi Ngangabuka Reeder. Yèyè ewu ucidi anu ne mwoyi, mmusòmbèle mu Port Fulton emu, yèyè ngudi mufwanyine kunulondela mudi bwalu.

⁶³ Paakanjika ether awu mu mubidi, kwakangenzekela cintu kampanda mwaba awu. Ntu anu misangu yònsò ngeela meeji ne civwa ncikeena-kumona. Bwalu, mvwa muteketangane bikole, nenku mêmè. . . Baakeela meeji ne nkaavwa mpûnga ne lufu. Mukaji awu uvwa udila mwadi. Pângààkatàbajà mèsù, mvwa mwa kutangila, mvwa mwa kuumvwa wakula, ki pashiishe mêmè kwalukila cyakabidi mu tulu, kadi kutabuluka, misangu

ibidi anyi isatu. Ki pa díbà adi mêmè kumona cikeena-kumona. Ki pashiishe mêmè kupeta . . .

⁶⁴ Paanyima paa ngondo mitwe ku mwandamutekete, ki kukengelabi bwa mêmè kuya bwa kukompatulabo tusunsukila twa tundimba ne bilàmbà bya mu buluwà biikale ne bifutafuta mu mikolo; ngangabuka kavwa mubipatule to. Pa nanku ki mêmè kupeta mulungù mu mashi, mikolo yònsò ibidi yikaavwa myùle midyundakanangane lwà mwinsi mwanyi emu, nenku bavwa bakeba kukosela mikolo yangi yònsò ibidi lwà mu cifuka emu. Nenu mêmè anu . . . Mêmè ne: “To, bandishilaayi aci nuyikosele anu lwà kuulu eku lwa *apa*.” Ncivwa mwa kuciitabaku to, nwamonu’s. Nenu ndekeelu wa byònsò, ki Ngangabuka Reeder ne Ngangabuka Pirtle, baa mu Louisville, kumpandabo, ne kupandabo muntwamu ne kubipatulabo; kadi leelu ewu ndi ne mikolo milenga milaya, ku ngàsà wa Nzambi.

Kadi mu ci—cikeena-kumona cya ndekeelu cimmwènè aci . . .

⁶⁵ Cikeena-kumona cya kumpala, pângààkaalukilà mu mêmè, ki pashiishe mêmè kubwela mu nyuma emu. Ki mêmè kwela meeji ne mvwa mu iferno, anu bitooke tòd . . .

⁶⁶ [Mwaneetu wa balume kampaanda udi wamba ne: “Mfwileku luse, mukalenge.”—Muf.] Uh-huh. [“Kaaba aka nyewu kudi muntu mukaji mufwe cipuuka, *pààpa* naka.”] Eyo, muntu amutentekeleku byanza, nenku yèyè . . . pàmwàpa bamupatwileku mwaba udi kapeepa kapita. Mpindyewu yònsò udi mwimanyinepu awu, amutentekele byanza.

Tusambilaayi.

⁶⁷ Mukalenge Yesu munanga, swaku bwa mwaneetu wa bakaji udi usaama mu dinda emu ewu, mwikale mufwe cipuuka mu cibambalu emu awu, swaku bwa ngàsà Webe ne dikanda ne bukole . . . nya’ kudi byanza bimutentekela mpindyewu, bileeja mpala Webe. Ne Mufundu mmwambe ne: “Bimanyinu ebi nebifile badi biitabuujà. Bòbò batentekela babeedi byanza, babeedi nebasangale.” Nenu mpindyewu swaku bwa mwaneetu wa bakaji apatuke mu disaamà edi, ne ondopiibwe bwa butumbi bwa Nzambi. Mu Dîna dya Yesu Kilisto mmutudi tulomba nunku, ne tuKupeeshey mu byanza. Amen.

⁶⁸ Mpindyewu mupatwilaayi mwaba udi kapeepa. Kudi—kudi cipwidiji cibi be. Mêmè ndi mwa kucyumvwila kaaba aka, cibi, cibi menemene. Bidi anu bya muntu umvwa mwa kufwa cipuuka, pa cibumba cya ku cyambilu apa. Ndi mucyúmvwè, misangu inaaayi anyi itaanu mijima kaaba aka. Piikalabi ne kudi . . . pakaadiye anu ubanga kudyumvwa ndambu bîmpè, mona’s, ndaaayi nende mu mwaba udiye mwa kwikala upetaku kapeepa. Aci ncîmpè. Uh-huh. Nwamonu’s, kudi cipwidiji anu cibi be, nudi bamanye’s. Bantu batu bapatula, muntu ne muntu wa kutudi, masaama àdì àyà too ne mu ntanta

wa mètres carrés bûngi kampanda. Panwikala, muntu yêyè ne ndambu wa mâyi mwaba awu, anyi cintu kampanda bwa kwelaku mwaneetu wa bakaji awu. Bikengela bwa yêyè—yêyè, mbîmpè mpindyewu. Nwamonu anyi? Eyo. [Mwaneetu wa balume kampanda udi wamba ne: “Tushiye anu biibi byunzulula’s, Mwaneetu Branham.”—Muf.] Eyo, pàmwâpa ne nudiku mwa kuunzulula biibi, pàmwâpa, anyi kufilaku anu ndambu wa kapeepa, mu mushindu utudi mwa kukumbaja awu, mu mushindu kampanda, nwamonu’s.

⁶⁹ Mpindyewu pa diine dîbà edi, bu mûngààkamònà cikeena-kumona aci, ne ndyambidila ne nkaavwa—nkaavwa muumuke mu ewu mwoyi mukabwele mu dikengeshiibwa.

⁷⁰ Nenu ngondo mwandamutekete mimane kupita, mu Lupitaadi Iwa Clark County Memorial emu, kumpandabo bwa musangu mwibîdi. Ne mwine musangu awu, pângààkapinganà mu mêmè, mêmè kwela meeji ne mvwa mwimane lwà mu Wesete mwamwa. Mvwa mupete cikeena-kumona cikwabo. Nenu kuvwa nkuruse munene wa ngòlò mu maulu, ne Butumbi bwa Mukalenge bupongoloka bufumina ku mwine nkuruse awu. Nenu mvwa mwimane ne byanza byanyi bibaalula mushindu ewu, ne Butumbi abu bwikalè bumpwekela mu cyâdi. Ki mêmè. . . Cikeena-kumona aci kunguumukaci. Taatu uvwa musòmbè mwaba awu muntangile, paakalwa cikeena-kumona aci apu.

⁷¹ Ntu anu ndyumvwa misangu yònsò, nudi. . . Bantu bònsò bàtù bammanyè bidimu byònsò ebi abu, batu bamanyè ne mêmè ntu anu njinga bwa kuya ku Wesete. Nutu bamanyè mutubi amu. Kutu anu cintu kampanda pa bidi bitangila Wesete. Kadi bwalu mulongi kampanda wa mabulunga a muulu wakangambila musangu kampanda, cintu cimwecimwe aci ne, bivwa bikengela mêmè kuya ku wesete. . . Mitooto, patuyi yikosolola mu bijengu byayi ne bikwabo, ntu mulediibwe mwinshi mwa cimanyinu aci, ne ncyadyakutuutaku dyakalenga mu Esete to; bivwa bikengela anu mêmè kuya ku Wesete. Nenu cidimu cishaale eci mêmè kukuya, ku Wesete, bwa kuuja civwa dijinga dya kacya bandela adi, nwamonu’s, bwa—bwa kucyenza.

⁷² Ndi kwòkò aku bwa cinyi? Ncintu cya citambe kwikala cicimbè’s. Mukasòmbèle mu cipeela mwamwa, mfuta ndola lukama ne dikumi ku ngondo, ya difucila dya nzubu, nzubu pende kaaba aka ulaala munda mutupu, nzubu wa mpaasata, mundongolwela, nwamonu’s. Kadi nkulonda kwa Mukalenge, nwamonu’s, ki—ki cyònsò cîndi mumanyè cya dyenza. Ne nudi bamanyè bikeena-kumona ne byònsò bitu byenzeke kwine kuntwaku abi. Mpindyewu—mpindyewu mu eci ndi muswe kwamba bwa. . .

⁷³ Mpindyewu piikalabi ne mwaneetu wa bakaji awu udi udyumvwa ne mateketa ndambu, Mwaneetu Roy, ne yêyè

mufwanyine. . . muswe bamupatwileku mwaba kampanda ne bàmusòmbèshè mu cibambalu kampanda mwaba ewu, mudiye mwa kwikalaku upeta kapeepa kààbûngì anyi cintu kampanda, aci ncìmpè menemene, bwalu, ndi ngumvwa ne neàdyũmvwè bîmpè mpindyewu, nwamonu's. Mbikumbane. Cidiye udi anu muteketangane, usaama. Ne pa nanku ndi—ndi nkwambila ne, piikalaye. . . bu wêwè mwa kuswa bwa kulwa nende lwà apa padi kapeepa. . . bandisha madidiishi aa, Mwaneetu Roy, nenku piikala mwaneetu wa bakaji muswe bwa kupicila apa, aci—aci neciikale cimpè. Wamonu's, yèyè muswe ku—kuvwila lwà apa nunku, ee, kuciinyi aci to.

⁷⁴ Ndi muswe kumutentekela byanza paapicilaye kaaba aka. Nwènù bônso numfwilaayiku luse ndambu. Ne Nzambi amfwileku luse bwa. . . Aci, aci ncyà bushuwa, mwaneetu.

⁷⁵ Taatù wa mu Dyulu, mwan'Ebe wa bakaji ewu nyewu musòmbè kaaba aka mu dinda emu, ne mmulwe bwa kuteeleja Mukenji, kadi nyewu wapeci. . . Sataana ngudi ukeba bwa kumupangishaci, kadi kèna mwa kucyenza to. Kèna mwa kucyenza to.

Akubeneshe, mwaneetu wa bakaji, mu Dìna dya Yesu Kilisto.

Eyo. Ee, cyacya ciibi, ngeela meeji ne bu ndambu wa. . . ? . . . bânà beetu baa balume, pa dîbà adi kapeepa kadiku mwa kupicila apa, too ne kùdi eku.

⁷⁶ Kaa, nwènù badi bambaa bwa cipwidiji, s'bivwa bikengela nwènù kubwelaku mu yimwe ya ku myaba ya dyamwamwa dya mbù yaya yidibo anu bambakaja bantu pamutu paa bakwabo, biikale ne nsudi ne kansere. Nenku, kaa, ekelekele, kuyiku mwa kupeta mushindu wa kweyela to, nudi bamanye's, mu bintu bya mushindu bu nanku. Kubateeka mu bizùbuzubu binene bya menemene abi, bitampakane anu ne—ne masaama. Kadi nudi bamanye anu cidi nsudi mifwanyine kwikala aci. Muntwamu, balààdika muntwamu kabayi ne maci to, ne cyabibidi cimwe cya mpala cidiike cyònsò, kabayi ne maboko to, ne tupompokoto tukese bu ne ki makàsà, ne bintu bya mushindu awu, balààdika, bambakajangana pa bakwabo. Ne bamwe baa kudibo biikale bafwa anu pa dîbà adi, balààdika mwaba awu, bwa dibambakajangana adi, bateeta mwa kubwelela mwaba kampanda, nudi bamanye's, bwa kuteeleja Mukenji.

⁷⁷ Kadi mpindyewu—mpindyewu mu eci, ndi nkwambila cyakenzeka. Mu ciine cikeena-kumona cingàakamòna aci, nêngààlukilè paanyima, bwalu ndi mutwale cyòci aci, bikeena-kumona byònsò bibidi abi, bwa kunuleeja pa bidi bitangila cimwe cya ku byòbi. Bivwa bikengela mèmè kusanganyibwa mu Wesete. Ntu misangu yònsò anu njinga cyòci aci.

⁷⁸ Nenku mpindyewu, kiipacila kaa Diyiisha dya mu dinda edi mbwa kumanyisha ekeleeziya, mu byònsò biikalaYe mwa

kundekela mêmè mmanyisha ekeleeziya abi, bwa ku dyanyi dimanya, too ne... pândi ngenda nya apu. Nenku eci ncidi cindenge, pa nanku mvwa muswe kumanyisha ekeleeziya. Mpindyewu, eci cidu anu bwa tabernacle ewu nkaayende, nwamonu's, kaaba aka. Mpindyewu, ne mu cikeena-kumona eci, cya kumpala eci, cidu cyenzeke ncyôci eci.

⁷⁹ Paanyima paa cikeena-kumona cimane kundenga, ne mêmè mushaale muteketangane bikole, ne mujimije mashi ônsò awu, ne muye... mvwa ngeela meeji ne mvwa munkaci mwa kwikala ngenda ntukina mu Cyendelele kampana cya kaciyi ne nshiikidilu. Bàâbûngi baa kunudi bakaadi bangumvumvwe ndonda bwalu ebu kwônsò eku, ne—ne ngenda ntukina mu Cyendelele cya kaciyi ne nshiikidilu. Kumpalampala, mvwa ngenda mpicila bu mu mavuba nanku awu, ne pashiishe mpicila mu mîdimâ, ngenda ntukina mwikale ngenda mpweka, ngenda mpweka, ngenda mpweka. Kadi katanci aka, mêmè kubwela mu myaba ya bajimine, ne mwômò amu mêmè—mêmè kwela lubila lukole. Ki mêmè kutangila, mwômò amu, anu bintu byônsò, kabiyi ne ntaku wa kwimanyina to. Nciyiku mwa kulekela dyenda dikuluka adi to. Bwa Cyendelele, muvwabi bimweka, mmûmvwa ne cya kwikala anu ngenda nkuluka. Kakuyi diimana to, mwaba nansha umwe.

⁸⁰ Ne pashiishe mushindu mwine uvwaku dishiilangana's pankaci paa cikeena-kumona cîmvwâ mupete mwaba ewu, abidi adi panshi aa, cya mwikale nsanganyibwa mu Butumbi ne bantu, dipangakana dya dikema's! Kadi mu eci, pâmvwâ ngenda nkuluka apu, ndekeelu wa byônsò, mêmè—mêmè kwela lubila nkeba papa wanyi. Mu bushuwa bwa bwalu, bu mûncivwâ anu mwânâ, ki cîmvwâ mufwanyine kwenza. Mêmè kwela lubila nkeba papa wanyi, kadi papa wanyi kayimu to. Ki mêmè kwela lubila nkeba maamu wanyi ne: "Muntu ankwate kwôkwèè!" Kamuyi maamû nansha umwe. Mvwa anu ngenda nya. Ki pa dîbâ adi mêmè kwela lubila kudi Nzambi. Kamuyi Nzambi nansha umwe. Kamuyi cintu nansha cimwe to.

⁸¹ Ki paanyima paa katanci mêmè kuumvwa dîyi ditambe kwikala dya mwadi dîntù kacya mêmè ewu ngûmvwakù, ciikale njiyâ ya mibyâmibyâlè. Kakwenaku mushindu nansha umwe... Nansha mudilu wetu wa bushuwa utu woshangana ewu mmufwanyine kwikala cintu cya cisankishaku bwa baswe kuwufwanyikija ne civwa cyôci eci. Mpindyewu bikeena-kumona abi kabituku byanji kwikala bya mashimi to. Nenku civwa anu yimwe ya ku njiyâ ya yitamba kukwacisha bwôwâ ya kacya mêmè ewu ngûmvwakù paanyi, ne cyâkenzâ... .

⁸² Mêmè kuumvwa dîyi kampana, dyumvwika bu mudi ci—ci—cintu kampana cya bu mwaba utu mikishi misòmbèle awu. Mbyenze anu aci cyenzeka, mêmè kutangila, bàvwâ benda balwa abu, bavwa mbantu bakaji. Nenku bavwa ne bintu bya diikala

dya mâyi a matamba, mvwa mwa kumona anu mpala yabo cyanaana, ne bavwa ne bintu bya diikala dya mâyi a matamba bilaaba mwinshi mwa mèsù abo emu. Ne mèsù abo miine avwa menze anu bu maleepakane maye paanyima, mudi bakaji leelu ewu badipenta ku mèsù amu, maleepakane maye paanyima mushindu *ewu*, nenku anu mèsù abo ne mpala. Nenku bavwa benza ne: “Uuh, uuh, uuh, uuh!” Kaa, ekelekele!

⁸³ Mvwa anu ngeela mbila mikole ne: “Éyi Nzambi, mfwileku luse’s we. Fwaku luse’s, Éyi Nzambi! Udi penyi’s Wèwè? Bu Wèwè mwa kundekelaku ngaalukila nshaala ne mwoyi, ndi nKulaya ne, nêngìikalè mwânà wa balume mwîmpè.” Mpindyewu, aci ki cintu cimwepele cîmvwà paanyi mwa kwamba. Mpindyewu, Nzambi mmumanye ne, ku Dituku dya Cilumbulwidi, Yèyè neandumbulwishe bwa diyì adi. Ki cîngàakambà ncyôci aci ne: “Mukalenge Nzambi, lekelaku ngaalukile, nenku nènKulayè ne nêngìikalè mwânà wa balume mwîmpè.”

⁸⁴ Kadi paakangaasabo cingoma apu, mèmè’s nkaavwa mwambeku mashimi, mwenzenze bintu pabwipi ne byònsò bivwaku bya kwenza ebi, cintu anu cimwepele cîndi ngamba . . . Mbipiciibwe ne mèmè mucitookeshe pâncidi mwaba ewu mpindyewu apa. Nenku pângààkapwekeshà mèsù e kumona ne nkaavwa anu bu bankose bitupa bibidi, pabwipi ne ciine aci’s, mèmè kwamba ne: “Nzambi, mfwileku luse. S’Udi mumanye ne mèmè ewu nciitu mwendeku masandi.” Aci ki cintu cimwepele cîmvwàku mwa kwambila Nzambi. Neivwaku mwanji kwikala mwitabe luse Lwende to, ne bintu byònsò ebi. Ndi ngamba anu ne, mvwa mufwanyine kwamba ne: “Nciitu mwanji kwendaku masandi to.”

⁸⁵ Ki pashiishe kuyabo naanyi mwômò amu. Ki pa dîbà adi, mu cyôci aci, mèmè kwela lubila ne: “Nzambi, mfwileku luse. Nêngìikalè mwânà wa balume mwîmpè, bu Wèwè anu mwa kundekelaku ngaalukila,” bwalu mvwa mumanye ne kuvwaku anu Nzambi mwaba kampanda. Kadi ndi ngamba ngambilamu ne, mwikale munyungulukila kudi bifukiibwa bicyokakane abi, mvwa anu muntu uvwabo bafuma ku dyakidila’s. Kadi ne njiyà ya mibi kumona, yitamba kwenzeja bwôwà, ne mibi mu mwaba awu ayi. . . Byenze bu biimèsù binene menemene, binkofya binene bipatuke mushindu *ewu*, ne bileepakane biye paanyima bu bya kampuusu, byenze bu biye paanyima nunku *ewu*; ne bintu bya diikala dya mâyi a matamba, byenze bu ne mbidya kudi kamunguji anyi cintu kampanda.

Nenku bavwa—bavwa benza ne: “Uuh, uuh, uuh!” Kaa, njiyà kaayi’s we! Mpindyewu pângààvu . . .

⁸⁶ Pashiishe mu katanci kakese, nkaavwa mwalukile cyakabidi ku mwoyi wa panu ewu. Cintu aci citu cintacishe be. Mèmè kudyambidila ne: “Kaa, kabyzekiku bwa mèmè kuya mu

mwaba bu naka to; bikengela bwa muntu mukwabo nansha umwe kayiku mu mwaba bu naka to.”

⁸⁷ Paanyima paa ngondo mwandamutekete, mêmè kupeta cikeena-kumona cya mêmè mwimane mu Wesete aci, mûmvwà mumone nkuruse wa ngôlò awu mwikale umpwekela amu. Ki mêmè—mêmè kumanya ne kutu myaba ya beediibwe mulawu mwaba kampanda.

⁸⁸ Mpindyewu, ncivwa mutambe kukutumina meeji to too ne mu mbingu mitwe ku inaayi eyi. Mukajaanyi. . . Ncivwaku mucyêlêlê meeji mu mushindu ewu to. Kukaadi mbingu mitwe ku inaayi, mêmè ne mukajaanyi tuvwa baye ku Tucson, bwa kuyaku kasumba bintu ku makajiinyi. Kadi patuvwa basômbe. . . Mukajaanyi, tuvwa bapweke mu nzubu wa panshi, nenku—nenku muvwa musûmbà wa nsongaalume myenze bu bilûmaabikàjì miikale ne nsuki myenze tubulu tubulu, nudi bamanye’s, mùtù bakaji benza amu, kadi—kadi beele cisaku bapwekeshile mwalala wa nsuki mu mpala emu, ne bavwale tupanu tukôsela kuulu menemene eku, bu nanku, ngeela meeji ne mbaamûyàpàndì, anyi nî mbanganyi munutu nubabiikila amu. Nenku bavwa muntwamu, ne bantu bônso bavwa anu kacya baabatangila, ne bavwa ne mitu *mona* bunene, benze bu bakaji batu ne nsuki mikosa “bisuba” aba, nudi bamanye’s. Nenku bavwa mwinshi amu.

⁸⁹ Ki nsongaakaji mukwabo kulwaye mwaba awu, kwambaye ne: “Nudi nwelaku peenu meeji bishi bwa byôbì abi?”

⁹⁰ Mêmè ne: “S’bivwa bikengela wêwè kudyumvwaku bundu, pawikala mwa kwela awu meeji.” Mêmè ne: “Yêyê’s udi ne bukenji bwa kucyenza anu bu mùdì peebe naabu amu. Nansha umwe wa kunudi kèna ne bukenji abu to.”

⁹¹ Ki mêmè kubànda ku nzubu wa kuulu, e kusòmbela panshi. Pângábàndi, kuvwa cibandilu cya cinyunguluka mwaba awu, muvwa mmu makajiinyi a J.C. Penney, nenku cibandilu cya cinyunguluka aci ciikale cibànda ne bantu kuulu aku. Ee, kadi ki kungendeshabi ku mwoyi bikole, pa kumona bakaji abu bábànda kuulu aku; baa batekete, baa bakole, ne baa kabayi bacyuka myanda abu, baa minyengu kwîsù, baa batekete, ne mu mushindu kana wônso, bavwale tuputulu tukese menemene twîpi; mibidi yabo mikooyike ayi, ne bakaji bavwa bavwale mvwadilu wa disalulangana nende masandi abu, ne mitu minene menemene ayi mushindu awu, kadi ki bôbô bàlwalwà aba. Kadi mukwabo utuuluka ku cibandilu cya cinyunguluka aci, ucifuminaku ku dibànda mushindu awu, mwine mwaba wûmvwà mêmè musômbe mudyûpwile mu nkwasu awu, musômbe mwaba awu ne mutu wanyi mwinyika.

⁹² Ki mêmè kukudimuka e kutangila. Nenku umwe wabo uvwa mu bândile ku cibandilu aku awu uvwa wenda wamba ne: “Uuh,” wakula cyena Espagne, wakula ne mukaji mukwabo.

Ûwva mmukaji wa batooke mwikale wakula ne mukaji wa beena Espagne awu. Nenku ndi mwenze anu ntangila anyi, [Mwaneetu Branham udi utuuta cishonto—Muf.] dyakamwe mêmè kushintuluka. Mwaba awu, nkaavwaku mumone aci kumpala. Mêsù ende awu, s'nudi bamanye mushindu udi bakaji benza mpindyewu awu, badipenta mu mêsù, anu abidi adi panshi aa, mwenze bu kampuusu, nudi bamanye mudibo bacyenza cibànde mushindu *ewu*, ne muvwale binete bya kampuusu ne bikwabo byònsò, nudi bamanye's, ne mêsù mabàndisha mushindu *ewu*, ne bintu bya diikala dya mâyi a matamba abi mwinshi mwa mêsù emu. S'ki cyòci aci cintu cîmvwà mumone pâmvwà mwânà aci. S'ki yêyè mukaji awu anu yêyè menemene. Ki mêmè kushaala mukwacike tukulakaji mubidi mujima ewu, ne kubanga kukenzakana, nenku kuvwa bantu bavwa bu bàdì baakwila mu mênù, nudi bamanye's, biikale baakula bwa mishinga ne bintu bikwabo mu nzubu amu. Nenku ki mêmè. . .

⁹³ Kwenzabi anu bu ne mêmè kushintuluka mu katanci kekese. Ki mêmè kutangila, mêmè kudyambidila ne: "S'ki cyòci cîngàakamònà mu iferno aci." Ki bôbò abu mwaba awu, kamunguji aku. Mvwa ndyambidila ne mbwalu bavwa mu iferno ki civwa cibenza mushindu awu, diikala dya mâyi a matamba adi ne bleu mwinshi mwa mêsù. Kadi monaayaaku bakaji abu badipente ne diikala dya mâyi a matamba ne bleu, anu menemene muvwa cikeena-kumona aci cyambe kukaadi bidimu bitwe ku makumi anaayi.

⁹⁴ Nwamonu's, kukaadi bidimu bitwe ku makumi anaayi, ki kwakenzekabi. Nkaadi ne bidimu makumi ataanu ne binaayi; mvwa ne bidimu dikumi ne binaayi. Pa nanku kukaadi bidimu bitwe ku makumi anaayi, mêmè. . . Nenku ki—ki. . . Ki nomba nyêyè awu's, twamb'eku twamb'eku, wa dilumbulwisha, nudi numona's. Mpindyewu kuvwa. . .

⁹⁵ Mêmè mumane kumona ciine aci nenku nciyiku mufwanyine nansha kwakula ne mukajaanyi paakalwaye to. Yêyè uvwa muye kuntwaku bwa kuteeta bwa kupetela Sarah ne bânà cintu kampanda, nka—nkanzu wa mushindu kampanda anyi cintu kampanda bwa mu kalaasa, ne mêmè—mêmè nciyiku nansha mufwanyine. . . nciyiku mene mufwanyine kwakula nende to. Yêyè ne: "Billy, ncinyi cidi cikutacisha?"

Mêmè ne: "Munanga wanyi, ndi bu. . . Ndi anu bu muntu mufwe."

Ki yêyè ne: "Ncinyi? Udi usaama anyi?"

Mêmè ne: "To. Cintu kampanda ncifume ku dyenzeka."

⁹⁶ Mpindyewu yêyè kî mmumanye to. Mmwindile bwa mukaba wa mêyi ewu walukile. Ncitu mwanji kucyambilaku muntu nansha umwe to. Nenku mvwa ngeela meeji ne nêngânji

kwindila, bu mûmvwà mulaye, bwa kwanji kucitwadila ekeleeziya dyambedi. Nwamonu anyi? Kucitwadila ekeleeziya. Ki civwa mulayi wanyi ncyôci aci. Kadi nenufike ku dyumvwa, paanyima paa diloolo edi, kabingila kadi kenze ne nteete kulama mulayi wanyi. Nwamonu anyi?

⁹⁷ Mêmè kwela meeji piine apu, pângààkamònà mèsù avwa mamweke bu madya kudi kamunguji a bakaji abu awu. Kuvwa beena Espagne, beena France, ne beena Inde, ne batooke, ne bônso pamwe, kadi mitu minene menemene ayi, nudi bamanye, ne nsuki mijuudila kuulu, ne bisaku abi, mushindu utubo bayisaamuna batuma paanyima awu, minene menemene, ne pashiishe ipatuka. Nudi bamanye, nutu bamanye mutubo bayenza amu, bayiswika mutubo bayenza amu. Ne pashiishe mèsù adi ne mmwenekelu wa madya kudi kamunguji awu, ne mèsù miikale ne tupenta, maleepakane maye paanyima menze bu mèsù a kampuusu. Nenuki biikale bayiikila, nenuki ke mêmè ukààvwamù awu cyakabidi, mwimane mu makajiinyi a J.C. Penney amu, mwalukile cyakabidi mu iferno.

⁹⁸ Mêmè—mêmè—mêmè kukwacika bwôwà bwa dikema. Mêmè kudyambidila ne: “Mukalenge, ncyà bushuwa ne ncyêna mufwe to, ne ndekeelu wa byônso Wêwè kundekela ngaalu cyakabidi mu ewu mwaba.”

⁹⁹ Kadi ki bôbò abu’s, benza... bannyungulukile anu mushindu awu, byenze bu mu cikeena-kumona aci, bivwa lutatu lwâbûngi menemene bwa kubyumvwa ne maci, udi mumanye’s. Anu dyakwila dya mu mênù ne bivwa byenzeka abi, bya bantu abu abi, ne bakaji abu balwa biikale bâbândila ku cibandilu cya cinyunguluka aci ne biikale bannyungulukila mwaba awu, benza ne: “Uuh, uuh!” S’ki mèsù a diikala dya mâyi a matamba awu mwaba awu, ne a mmwenekelu wa lukutukutu, ne wa wenza mwadi.

¹⁰⁰ Ki mukajaanyi kuvwilapu. Ki mêmè kwamba ne: “Anji ndekelaku kakese, munanga wanyi.” Mêmè ne: “Piikalabi kabiya bikutacisha to, ndi—ndi—ndi muswe kwalukila kumbelu.”

Ki yêyè ne: “Udi usaama anyi?”

¹⁰¹ Mêmè ne: “To, tungunuka anu cyanaana, munanga wanyi, piikalabi ne ucidi ne bya disumba.”

Yêyè ne: “To, nkaadi mujikije.”

¹⁰² Ki mêmè ne: “Enza nkukwateku ku diboko.” Nwamonu anyi? Ki mêmè kupatuka.

Yêyè ne: “Ncinyi’s?”

Mêmè ne: “Meda, ndi—ndi—ndi... Nkwenzeke cintu kampana mwaba wawa.”

¹⁰³ Nenuki pâncivwà mu cyôci aci apu, ki mêmè kudyambidila nunku: “Mmu dituku kaayi mutudi ne mwoyi emu? Eci

ncifwanyine kwikala Nkokelu Mwisàtù anyi?” Mpindyewu ndi ne ndambu wa bintu bifunda mwaba ewu.

¹⁰⁴ Yesu. Tudi tusangana ne, Yesu, mu mudimu Wende wa bwambi, paanyima paa Yèyè mumane kuyiisha bantu... Mpindyewu netwikale batukine mu Mifundu menemene pa bwalu ebu. Paanyima paa Yesu mumane kujikija mudimu Wende wa bwambi, ne mudimu Wende wa bwambi mubengiibwe kudi bantu. Mpindyewu nubalaayi munkaci mwa milongo, nwàmbè mwenu peenu munudi bamone amu. Vulukaayi cingánwàmbìdì ku ntwadijilu aci. Paanyima paa Yèyè mumane kuyiisha . . .

¹⁰⁵ Yèyè wakalwa bu Ewu uvwa mulayiibwe bwa dituku adi. Twètù bônso tudi bamanye aci. Mifundu yakamanyisha Yesu Kilisto bu Maasiya. Aci ncyà bushuwa. Mu byônso, bikole menemene, mushindikiibwe kudi Nzambi ne kudi Diyì Dyende, bwa ne Yèyè nguwu Maasiya. Kakwenaku cya dikonkoloja to. Muntu yèyè mucyèlè mpatà, wèwè mucyèlè mpatà, nanku bivwa bikengela wèwè kulwa ku cyoshelu, ne: “Yèyè kavwa Maasiya awu to.” Yèyè uvwa mujaadikiibwe bitooke tòò ne m’Maasiya awu. Kadi paanyima paa Yèyè mumane... Nzambi mumane kuMumanyisha bitooke tòò.

¹⁰⁶ Mwakamba Peetelo mu Dituku dya Mpenta, pavwaye wakula ne beena Tubadi twa beena Yuda abu kuntu kwaka, ku anaayi. . . paanyima paa matuku matwe ku anaayi. Yèyè ne: “Yesu wa mu Nazaleeta, Muntu mwanishiibwe kudi Nzambi munkaci mwenu ku bimanyinu ne maalu a kukema, bivwa Nzambi mwenze Nende munkaci mwenu, bitudi twètù bônso biikale bantemu. Nwamonu anyi? Nwènù nwangaci, ne ku byanza bya beena lwonji, nwâpoopèdì Mfumu wa Mwoyi pa nkuruse; udi Nzambi mubiishe ku lufu, ne muleeje patooke bintu binudi numona ebi.” Nwamonu anyi? Kilisto ucivwa anu mutungunuke ne kwikala ne mwoyi. Mu bushuwa bwa bwalu, uci anu ne mwoyi leelu ewu.

¹⁰⁷ Mpindyewu paanyima paa Yesu mumane kulwa bitooke tòò, wakaDimanyisha, Nzambi wakaMumanyisha, ne Yèyè kwamba ciprofeta. Ne paanyima paa matuku a ciprofeta Cyende, nasha muvwaYe mumanyishiibwe kudi Mifundu amu, bantu baakaMubenga. Aci’s ncyà bushuwa. Kadi Wakayiisha pashiishe paanyima paa bamane kuMubenga panwapa, biine bàvwà ne mpùngà wa kusungidiibwa abu. Vulukaayi ne, pavwaYe uyiisha apu, kuvwa mushindu wa muntu kana yônso kusungidiibwaye. Twètù katwena bamanye ne mbanganyi biine abu to. Mbadi badyànjlila kulongolola. Kadi Wakatungunuka anu ne kuyiisha.

¹⁰⁸ Kadi paanyima paa matuku a diyiisha Dyende adi, mudimu Wende wa bwambi wakatungunuka, bwalu musùmbà wa ndekeelu wakayiishaYe uvwa mmisuuka yivwa mu iferno, bavwa kabayi mwa kufwidiibwa luse to. Ngaabadi cyôci aci bitooke tòò mu Bible mwaba ewu, mu Peetelo Mwibidi. Nwamonu

anyi? Wakaya kayiisha misuuka yivwa mu buloko, budi bwikale iferno, bakangilamu too ne ku Dituku dya Cilumbulwidi.

¹⁰⁹ Bwalu, nudi numona, Cilumbulwidi kî mpindyewu to, ne kakwena iferno wa kapyà mpindyewu to. Muntu kampanda ukwambila ne: “Mulumyana awu’s udi mu iferno wa kapyà patudi twakulangana apa,” aci ncyà mmafi. Nwamonu anyi? Nzuji wa pa buloba ebu udi ne bwakane bukumbane bwa kubenga kupiishaku muntu padiye kayi mwanji kufika ku dilumbulula. Ne Nzambi kaadyakwelaku muntu mu cikutu cya kapyà to padiye kayi mwanji kupiishiibwa dyambedi kudi mikenji ya Nzambi Yèyè mwine. Yèyè mmubenge luse, pa nanku, nudi numona’s, bikengela añjì kupicila ku dilumbulula, ne dilumbulula adi n’Nkwasa Mutooke Munene wa Cilumbulwidi. Kadi mpindyewu yèyè udi usanganyiibwa mu mwaba udi ubiikiidiibwa ne nzubu wa buloko.

¹¹⁰ Bu mùndì mumone cikeena-kumona cya myaba yònsò ibidi ayi, ne ku ngàsà wa Nzambi. . . Ndi ngamba eci kî mbwa kunyangakaja cijila to, kabidi, piikalaci kacyi mu cyòci to, Nzambi amfwileku luse. Ndi ngiitabuujà ne ndi mufike mu myaba yònsò ibidi ayi, nwamonu’s, mu myaba yònsò ibidi ayi. Ne ndi mumone bapikula, babeneshiibwe abu; ne ndi mumone bajimine, ne mwaba mwine uvwabo basanganyiibwa awu. Nenuki ki bwa cinyi ndi mwimane bu mwaneenu, leelu ewu, bwa kunudimwija bwa nwènù kunyeema kajila kadi kapweka katangile panshi aku. Kanudidingi nwàlondakù awu njila to. Ne nudi ne bintu bilenga byònsò binwĩndile bu kabingila ka kwikadila ne mwoyi, njila mubeneshiibwe uyààya mutangile muulu awu, mùdì bapikula basanganyiibwa mu disanka ne ditalala amu, ne kabayiku mwa kwenzaku mpekaatu to. Kabeena mwa—kabeena mwa kuumvwaku bibatonda to. To. Mwamwa, kamwena cintu nansha cimwe to; mbapwangane. Ndi mumone myaba yònsò ibidi ayi! Ndi mumanye ne adi ndiyi dikole be dya muntu wamba, kadi, bu mudi Nzambi mwikale Mulumbulwishi wanyi, ndi mwitabuujè kakuyi tuseku to ne ndi mumone myaba yònsò ibidi ayi. Ndi—ndi mwitabuujè nanku.

¹¹¹ Nenuki, kaa, kabyenzekiku bwa muntu nansha yèyè nganyi adidinge akabwele mu myaba ya bajimine ayi to! Bu wèwè mwa kwikala mwimane ne nshinga ya mudilu mikutubule mubidi, mwikale ukengeshiibwa mu mishindu yònsò, kî mbifwanyineku kwikala bu dikengeshà dya dyabulu didi mu mwaba wawa dyadya to. Kî nkufwanyineku kwikala cintu nansha cimwe cidì cifwanyine. . . Meeji a buntu kî mmafwanyineku, meeji a buntu kî mmafwanyineku kuumvwa cidì myaba ya bajimine yaya to. Kakwenaku mushindu wa kubyumvwija to. Ne kakwena mushindu wa kuumvwija cidì myaba ya babeneshiibwe ayi to, ncinene bikole. Wawa naka udi wenza bwòwà bwa dikema, kadi Ewu nunku mmwĩmpè wòwò bikole—bikole, nkuumukila

ku cicimbè kuya ku cilenga cya dikema ne dyanyina. Pa nanku piikala muntu unteeleja . . .

112 Kadi nyewu nkaadi ngenda nshaala mukulakaji. Ncyêna mumanye ne nkunshaadile kabidi matuku bûngì kaayi to. Abidi adi panshi aa ndi nkumbaja bidimu makumi ataanu ne bitaanu. Nenku ncyêna—ncyêna mumanye to, bilondeshile bufuki, bidi mwa kwenzeka ne nciikadi ne bidimu bipitepite bûngì to. Ncyêna mumanye kwaya mukaba wa mêyi ewu to. Kadi muntu ne muntu ateeleje, mwaba ewu ne pa mukaba wa mêyi, anyi nî mpenyi pônsò padiwu mwa kuya apu. Kwikadiku wadidinga wâya mutangile ku myaba ya bajimine ayi to. Kwêna mwa kudifwanyikijilaku ne iferno utu mubi mushindu wawa to. Nenku nî ncinyi nî ncinyi cyûdi wenza, kudidingiku wângata . . . wâpwa mwoyi bwalu ebu ne, myaba ya babeneshiibwe yaya . . . Ndi muswe kwamba nenku, pamwe ne Pôlò Munsantu ne: “Bidì dîsù kadiyi dimone, bidì dici kadiyi dyumvwe, anyi bitu kabiyiku bifwanyine kubwela mu mwoyi wa muntu, bidì Nzambi mulame mu cibucilu bwa badi baMunange.” Pa nanku imana, pawikala munkaci mwa kuteeleja mukaba wa mêyi ewu, kanga cisanji aci, nenku unyingalale pawikala kuyi musungidiibwe, ne u dilongolole kumpala kwa Nzambi.

113 Ndi ngamba nunku ku didilabwila dya mêmè mwine, bu mûndi ngiitabuuja munda mwa mwoyi wanyi. Ne ndi ngamba ne, piikala byôbì ebi, piikala bikeena-kumona ebi bindinge, Nzambi amfwileku luse bwa dyamba dyanyi dya dîyi bu nanku awu. Kadi ne meeji matooke ônsò munda mwa mwoyi wanyi, mwikale mumanye ne nansha cimwe cya ku bikeena-kumona abi kacituku cipangile to, ndi ngiitabuuja ne mvwa mu myaba yônsò ibidi ayi. Kabyzekikuku ne muntu wetu wa maci ne mêtù ewu akalonde njila udi upweka mutangile panshi awu to!

114 Mpindyewu, Yesu, paanyima paa Yêyè mwane kujikija mudimu Wende wa bwambi, wakayiisha misuuka ayi yivwa kayiyi mwa kusungidiibwa, yivwa kayiyiku ne mushindu wa kusungidiibwa to. Mpindyewu Bible ngudi utwambilaci awu. “Yêyè wakaya kayiisha misuuka yivwa mu buloko, yivwa kayiyi minyingalale to.” Paakapeebwayi luse, yôyi ayi yakabenga luse alu ku maditambishi, nenku mpindyewu yikaadi mindile Cilumbulwidi. Kaa, aci civwa mwa kwikala cikondo kaayi’s we! Kaa, ndi njinga bwa kwikaleku mushindu kampana wa mêmè kunyungisha buloba ne cyôci aci, bwa kubaleeja cidì bulelela.

115 Ne Yesu wakamba, Yêyè mwane ne: “Anu mudi Taatù muntume Mêmè, ki mûndi Mêmè paanyi nnutuma.” Nenku anu mwakaMutuma Taatù bwa kuyiisha bavwa—bavwa ne mwoyi, aba bavwa ne ditekemena, ne pashiishe kufila Mukenji umweumwe awu kudi bavwa kabayi ne ditekemena, bidi bimweka bikumbanangane, pa dîbà edi ne, nebikengele bwa aci cyenzeke, bwalu Nyuma wa Kilisto udi ne mwoyi munda

mwetu awu katu ushintulula ngiikadilu Wende nansha, anyi katu ushintulula ndongolwelu wa Nzambi to. Ûdi ne cya kwikala umwèumwè awu mu lukongo ne lukongo lwônsò. Ûdi ne cya kwikala umwèumwè awu. Wàkamba ne: “Anu mudi Taatù muntume Mêmè, ki mûndi Mêmè paanyi nnutuma.”

¹¹⁶ Midimu ya bwambi yidi ne cya kwikala yôyi yimweimwe ayi, mu mushindu wa ne Yèyè wakamba . . . Ndi mmona bakwabo beenu biikale bafunda Mifundu. Yone Munsantu 14.12: “Ewu udi ungiitabuuja Mêmè, byenzedi bîndi Mêmè ngenza neàbyènzè pende.” Nwamonu’s, “byenzedi,” kuyiisha bajimine, kwondopa babeedi, ne pasiishe aba badi kabayiku mwa kusungidiibwa. Nwamonu anyi? Mudimu awu wakatungunuka anu mushindu umweumwe awu. Pa nanku, eci ncyenzeke, (eci ncyenzeke anyi?) swayi ncyâmbè mu mushindu ewu ne, mudimu wa bwambi wa Yesu Kilisto mmwandamuke cyakabidi mubidi mu Ekeleeziya Wende mu dituku dya ndekeelu edi. Cyôci aci ncidi bàâbûngi beetu biitabuuja. Mêmè ndi ngiitabuuja mumwe neenu. Ndi ngiitabuuja cyôci eci. Mêmè nciyi nciitabuuja to, mwva mufwanyine kwenza cîngà cintu pa bwalu abu. Bwalu, twamb’eku twamb’eku, mêmè ngudi cyôci eci citangil- . . . udici citangile mwômò emu. Kadi piikala Nyuma wa Nzambi munda mwebe, udi uditacisha bwa bantu.

¹¹⁷ Kuvwa Mufundu uvwa untacisha mu meeji misangu yônsò, mushindu uvwa Môsà mwa kwambila Nzambi mmwenenu mwîmpè mupite uvwa nende Nzambi, too ne pângâàkalwà kujandula ne civwa n’Nyuma wa Kilisto munda mwa Môsà. Nwamonu anyi?

¹¹⁸ Nzambi wakamba ne: “Môsà, tapuluka naabo. Mêmè nêmbutulè cintu cyônsò nkòòng, kadi mbange neebe wêwè.”

¹¹⁹ Yèyè kwamba ne: “Mukalenge!” Kudyelaye pankaci, kwambaye ne: “Ngangàtè mêmè. Kupula dînà dyanyi.” Bwa bantu aba bààkatombokà, mwoyi wende wakabapetela majiya. Nwamonu anyi?

¹²⁰ Nenku padi mwambi udi ne bantu pa mwoyi wende. . . Mmunyi mûndiku mufwanyine kudyumvwa mubingishiibwe ku. . . kumpala kwa Nzambi, ne kwanyi mêmè mwine, pa kulaminyina cintu kudi cisamba cyûdi munange kutamba mùdi mudinange wêwè mwine. Mmunyi mudi muntu mufwanyine kubweja muntu mu ekeleeziya ku dimulabula dya ku cyanza, anyi ku dimumyamina kampanda dya mâyi, anyi ku dibatiiza kampanda dya mashimi, anyi cintu kampanda, kadi kumulekela ushaala mu—mu bwenzeji bwa mashimi kampanda pende mumanye ne Bible mmuteeka mwaba awu, kadi kwamba mudiye munange muntu awu?

¹²¹ Nansha byôbì ne bidi bikengela ngiikale ndombangana kaa pa luse bwa mêmè kudya, nansha nî ncinyi, ngiikale anu ne meeji matooke kumpala kwa Nzambi ne kwa bantu, bwa

kubambila Bulelela. Nciikadiku museeswishanganyi nansha. Mmunyi mûndi mwa kuseeswisha biine bândi munange? Nansha byôbì bikengela bwa mbâtàpe ku mwoyi, kadi ndi mubanange. Ki bwa cinyi udi wela mwaneebe mfimbu ku tutàku aku, mbwalu udi mumunange. Kí mbwa ne mbwalu kwêna mumuswe to; mbwalu udi mumunange. Padiye mupiile, neakadishipeeshe pawikala kuyi umulongolola to.

¹²² Mpindyewu, ki mudi kabidi mudimu wa bwambi ewu mwenzeke. Anu mwakadibi amu, ki mudibi kabidi leelu. Mmuyiishiibwe, ne mushindikiibwe wônso nkòong kudi Dîyi dya Nzambi ne, kí ncifwanyine kwikala muntu to, cidi ne cya kwikala Nzambi. Ki mudibi ne cya kwikala. Monaayi, bimanyinu bya nyuma bimwebimwe byâkenzâ Yesu abi, mbyenzeke cyakabidi pa buloba mu matuku a ndekeelu. Cimanyinu cya nyuma cimwecimwe ciine cyakaDimanyishilaYe naaci bu Maasiya aci, nciMumanyishe leelu ewu. Yêyê uciidi anu Maasiya! Bimanyinu bimwebimwe bya mu mubidi abi mbimweneke pa buloba, bya bwena byâkamwênêkâ kudiYe abi, ciwvaYe aci. Dikunji dya Kapyâ dimwedimwe dimwenebo kudi Pôlò Munsantu adi, Dyôdi dimwedimwe adi, cyônso aci nyenzeke cyakabidi ne ngiikadilu umwêumwê awu mu cyôci, ciikale cyenza cintu cimwecimwe aci.

¹²³ Yesu wakajikula wamba ne Yêyê kavwaku wenza cintu nansha cimwe to pavwa Taatù kayi muMuleeje. Ne Taatù udi Nyuma Mwîmpè, cyôci aci ki citudi bamanye. Cidi anu mmudimu kampanda wa Nzambi. Piikalaci kaciyi nanku to, nganyi wa kudibo pa dîbâ adi udi Tatwêndè wa Yesu Kilisto? Yesu wakamba ne Nzambi nguvwa Tatw'Ëndè, ne Bible mmwambe ne Nyuma Mwîmpè uvwa Tatw'Ëndè. Mpindyewu, kanwena mwa kuMuvwija mwânâ wa mu masandi to, pa nanku's Nyuma Mwîmpè n'Nzambi, pa nanku's Yesu uvwa Nzambi. Pa nanku, Nzambi, Taatù, Mwânâ, ne Nyuma Mwîmpè mmumwe ne . . . Cidi . . . Ayi mmidimu isatu ya Nzambi umwepele. Mbyambiibwa bisatu, Nzambi umwêumwê awu.

¹²⁴ Wêwè udi citupa cya Nzambi, ne mêmè ndi citupa cya Nzambi, nwamonu's; kadi mêmè ncyêna Nzambi mu kaabujima to, nansha wêwè kwêna Nzambi mu kaabujima to. Nwamonu anyi? Nwamonu anyi? Mbyambiibwa bya Nzambi pa twêtù, bu bânâ bateekiibwe kudi Yesu Kilisto. Bidi ne, Nzambi Yêyê mwine ngwâkalwa mubidi, bwa kutufwila.

¹²⁵ Mpindyewu, Nyuma Mwîmpè nguvwa misangu yônso uMuleeja maalu acivwa alwa, ne Yêyê kavwaku utupakana to. Bivwa anu bipwangane. Ncya bushuwa anyi? Yêyê kavwaku udyangacila Yêyê mwine luumu to. Úvwa upa anu Nzambi luumu. Wakamba ne: "Mwânâ kêna mwa kwenza cintu nansha cimwe mu Yêyê to anu cidiYe umona Taatù wenza aci." Nenku Taatù, Nyuma Mwîmpè, nguvwa Tatw'Ëndè. Ncya bushuwa

anyi? “Yozefu, wêwè mwânà wa Davidi, kuciinyi bwa kwangata Mariya mukajeebe pamwe neebe to, bwalu Udi mwimiciibwe munda mwende awu ngwa kudi Nyuma Mwîmpè,” ki uvwa Tatw’Ëndè. Ne Nyuma Mwîmpè nguvwa uleeja Yesu maalu acivwa alwa, uMwambila maalu avwaku.

¹²⁶ Ne Yèyè uvwa Muprofeta-Nzambi. Bwalu, Dîyì dya Mukalenge ditu dilwa anu kudi muprofeta; biikale bileeja ne Mèyì avwa alwa, mu mmwenekelu wa mu bukesese, baprofeta biikale bafunda bivwa Mukalenge ubambila abi. Kadi Yèyè kaakafunda cintu nansha cimwe to, bwalu Yèyè nguvwa Dîyì. Yèyè nguvwa Dîyì.

¹²⁷ Monaayaaku, Nyuma Mwîmpè umwèumwè uvwa musòmbèle munda Mwende awu: “Mu mutanci mukese, baa pa buloba kabaakuMmona kabidi to; kadi nwènù nenuMmone, bwalu Nèngiikalè neenu, munda mwenu mene, too ne ku nshiikidilu kwa buloba. Mémè nèndwe kunudi,” mwakambaYe. “Mémè” awu, uvwa n’Taatu uvwa munda Mwende, “wâlwa kunudi awu.” Ki Yèyè kwamba ne: “Paalwa Nyuma Mwîmpè pambidi peenu, Neabuulule maalu ângänùlongèshì Mémè aa, ne neanuleeje maalu acivwawwa.” S’ki bwalu abu mpindyewu.

¹²⁸ Mpindyewu tudi tumona ne, anu muvwa Nyuma Mwîmpè mukwate mudimu mu Ekeleeziya musangu awu amu, ki mudi Nyuma Mwîmpè kabidi mwenze menemene anu bintu bimwebimwe abi leelu ewu; umanyisha ku Dikunji dya Kapya, anu menemene muvwi ku cibangidilu, cintu cimwecimwe aci. Ne paakamonaye eci cilwa pa Yesu, Yone wakacimanyisha ku musulu wa Yadene. Ne ncijaadike bintu byònsò, nansha fòtò yaci ya ku maalu a mamanya. Kacyena mwa kwikala cya dikokangana to. Civwa cya ku maalu a mamanya. Civwa cya balenga ne byanza. Kacivwa meeji kampanda a bintu bikwatakaja to. Kacivwa cintu cya mu meeji to. Bu mwakamba George J. Lacy ne: “Disù dya cyamu cya fòtò kadyakukwataku cintu cya mu meeji to. M’Bukènkè budi butuute ku lumwenu lwa disù dya cyamu cya fòtò.”

¹²⁹ Kadi twămbè bishi bwenu nwènù, ekeleeziya, badi kukaadi ngondo isambombo anyi mwandamukulu kaaba aka, ne mêmè mwimane kaaba aka, ngamba ne: “Cidi EMU MMUDI MUKALENGE WAMBA ne, nyaaya ku Tucson, Arizona. Nekwenzeke dikubakuba, ne Banjelo mwandamutekete nebamweneke.” Nudi bavuluke anyi? [Disangisha didi dyamba ne: “Amen.”—Muf.] Kakuyi nansha... Nzambi kubivwija anu bya bushuwa menemene mu mushindu wa ne cikandakanda cya *Look* kucikwata maafòtò. Cya mu nyuma, cidyanjila kumona, kudivwijaci cya balenga ne byanza anu cimwecimwe aci menemene, Banjelo mwandamutekete, biine baakatwala cishindaayi cya Mifundu yònsò abu. Bwalu, maalu masokoka ònsò a Bible yònsò nkòong adi asanganyiibwa mu Bitampi

Mwandamutekete. Tudi bamanye ne Aci ki—ki Mukanda, citampi cyaWu, ne Aci ciikale cyabanya bikumbanangane. Ki bwalu busokoka bwa Mukanda wònsò nkòòng mbwòbò abu, bwikale busanganyibwa mu Bitampi Mwandamutekete abi, bidi Mukalenge mutupe dyanyisha dya kubutwala.

¹³⁰ Ne kudi bantu basòmbè kaaba aka, leelu ewu, bavwa naanyi mwine mwaba awu pavwaci cyenzeke. Cikandakanda cya *Look* ncijaadike cintu cimwecimwe aci, bwa ne cyôci aci—cyôci aci ncyenzeke cya bushuwa. Bwalu, Awu n’Nzambi uvwa mucyâmbè. Civwa n’Nzambi udi wimana paanyima paa Dîyi Dyende, bwa kuDyenza padiYe wamba ne Yèyè neâcyênzè. Ki bwa cinyi, kî mmuntu kampanda nansha, muntu wa musunya bu mêmè, udi munkaci mwenu ewu. Awu n’Nzambi wa Cyendelele.

¹³¹ Yèyè utu ukwata mudimu ne bantu. Aci ncy bushuwa. Katu wenza cintu nansha cimwe pa kuumusha cidiYe wenza ne bantu to. Tudi bamanye aci. Yèyè, ki Cyende—ki Cyende cyamu cya mudimu. Ki cidiYe musungule. Bwa cinyi, ncyèna mumanye to. S’Ûvwa anu mwa kwikala mwenze bwa dîbâ kuyiishadi Evanjeeliyo. S’Ûvwa anu mwa kwikala mwenze bwa lupeepele kuyiishalu Evanjeeliyo. S’Ûvwa anu mwa kwikala mwenze bwa lupeepele kwenzalu bintu kampanda, kadi Yèyè mmusungule bantu.

¹³² Ki civwa Wende mmwenenu ncyôci aci, wa ne muntu wakula ne muntu nende; kayi yèyè nkaayende to, kadi: “Dîyi dya Mukalenge divwa dilwa kudi baprofeta,” bambi baa biprofeta, bayiishi. Ne mwambi wa biprofeta mwikale uvila Dîyi dya ku cibangidilu, mmunyi mudiye mwa kwikala muprofeta mulelela? Nwamonu anyi? Kêna mwa kwikala yèyè awu to, bwalu udi uvila Bulelela bwa Dîyi. Ne pashiishe piikala aci kacyi cyenza nanku to, nenku Dîyi edi, Dyôdi diine, mushindu udiDi diyishiibwe ku bulelela bwa Dîyi ne ku bulelela bwa Nyuma Mwîmpè, neDimweneshe mulayi wònsò wakalayaDi. Ki mutudi tumanya ne ncy bushuwa anyi kî ncy bushuwa. Ki cyakamba Yesu ne: “Piikalabi ne Ncyèna ngenza cyakafundabo ne Mêmè nêngénzè, nenku kanuNgiiitabuuji to.” Nwamonu anyi? Mpindyewu tudi tumona bintu ebi.

¹³³ Vulukaayi ne, Bitampi Mwandamutekete byakajika, ne pavwa Malelela mwandamutekete masokolola awu . . .

¹³⁴ Bumwe bwa ku ôwò awu, Yèyè kaakatwanyishila bwa twètù kubumanya to. Tudi . . . Mbanganyi bavwa mwab’ewu dîbâ dya Bitampi Mwandamutekete, ne bààkatèèlejà? Nwênù bònsò, ngeela meeji. Nwamonu’s, Citampi cya—cya Mwandamutekete, Yèyè kaakaswa kutwanyishilaci nansha.

¹³⁵ KwimanaYe mwaba awu mu cibambalu ne kubibuulula ku cimwe ku cimwe. Ne piikalabi ne kacya bandela nkaadiku muyiishe cintu kampanda, cya cisonsola, civwa ncyôci aci. Nenku civwa ne cya kwikala cilelela, bwenu nwênù. Mwimane

mwaba ewu nnwambila ne ncyenzeke, ne nya buludi kwaka, ne maalu a mamanya miine ne bikwabo byônsò, dikebulula dya mu maalu a mamanya ne bikwabo byônsò, bwalu busokoka kudi bantu, kujaadikabi ne ncyenzeke mwaba wawa mene. Kadi kwalukila e kuteeleja mudici civunguludiibwa, ne kuvwija Diyì dyônsò anu dilelela menemene. Mmu dituku kaayi mutudi ne mwoyi emu? Tukaadi penyi?

¹³⁶ Nenku vulukaayi ne, mu Citampi Ciisambombo amu, mwômò amu, Mpungi yônsò Mwandamutekete yidi yidila mwinshi mwa Citampi Ciisambombo aci. Patwafika ku cyôci aci, nenucimone. Mpungi ne mpungi (mwandamutekete) mmudile mu Citampi Ciisambombo aci.

¹³⁷ Mwandamutekete awu utu misangu yônsò anu bwalu busokoka. Tangilaayi mwandamutekete awu, s'ki dijikija. Civwa n'Dilwa dya Mukalenge. Dyulu divwa dishaale dipuwe, mu cinyaanya, kampanda nansha umwe kaakanyungaku to. Bwalu, Yesu wakamba Yèyè mwine ne: "Nansha mene Mwanjelo wa mu Dyulu kî mmumanye dîbà dîNgààpinganà to. Ncyèna nansha mudimanye, Mèmè mwine, ne ndîbà kaayi to. Taatù mmuteeke aci mu meeji Ende." Nzambi nkaayende ngudi mudimanye, Nyuma. Wakamba ne: "Neivwa mudimanye to." Nanku, kadyakabuuludiibwa to. Mpungi wa Mwandamutekete awu paakadilaye. . . anyi Mwanjelo wa Mwandamutekete awu, ci—Citampi cyakakangudiibwa, pa dîbà adi kuvwa cinyaanya mu Dyulu. Nwamonu's, kacyakeediibwa patooke to, ciine civwa mwa kwenzeka aci.

¹³⁸ Kadi mwinshi mwa Citampi Ciisambombo, muvwa Mpungi eyi mikangudiibwe amu, vulukaayi ne, mwinshi amu, tudi tusangana ne Mwânà wa mukooko wakaseemena, wakamweneka mu cyalu. Ûvwa mushiye Nkwasa wa Ngâsà. Mudimu Wende wa bupikudi uvwa mujike. Nenku Wakalwa e kwangata Mukanda mu cyanza cya dyabalume cya Ewu uvwa musômbe pa Nkwasa wa butumbi, ne "kakucivwa kabidi cikondo to." Ne dyakamwe mwanjelo kumwenekaye mu nshapita wa mwandamutekete, anyi mu nshapita wa 10 ku mvensa wa 7, wamba. . . Mwanjelo ewu wakatuuluka ne wakadicipa, ne, "kakucivwa kabidi cikondo to."

¹³⁹ Kadi, nudi numona's, mu Mukanda ewu mmuvwa bivwa bipikudiibwe. Ûvwa m'Mukanda wa Bupikudi. Nenku cintu cyônsò cyakapikulaYe civwa cifundiibwe mu Mukanda awu. Cyônsò cyakafwilaYe civwa cifundiibwe mu Mukanda awu, ne Yèyè kavwa mwa kushiya Nkwasa Wende wa butwangaji to anu pavwaYe mwa kwikala mupikule kantu ne kantu. Ne Yèyè kavwa mwa kucipikwila ku nkuruse to, bwalu bakaavwa badyanjila kulongolola mu Mukanda wa Mwoyi wa Mwânà wa mukooko, nenku bivwa bikengela kushaalaYe Pôpò apu bwa

kwenza dyakwilangana too ne pavwa bwalu bwa muntu wa ndekeelu awu ne cya kujika. Butumbi's we!

¹⁴⁰ Kadi dîngà dituku WakajuukaPu, wakaseemena. Mukanda awu uvwa penyi? Ûcìvwa anu kudi Mwenawu mulelela awu, Nzambi wa Bukole bwònsò. Ki Yone kukenzakana, e kwasaye mwadi, bwalu kakuvwa muntu nansha umwe uvwa mukumbanyine nansha bwa kutangila pa Mukanda to, ne nangananga, bwa kukangula Bitampi, bwa kubuulula civwa bwalu busokoka abu.

¹⁴¹ Maalu masokoka avwa mu Bitampi Mwandamutekete. Paakakangudiibwa Bitampi Mwandamutekete ebi, aci kadi kukangulaci Bible yònsò nkòòng. Bitampi Mwandamutekete's; Ûvwa mukangiibwe ne Maalu masokoka Mwandamutekete, ne mu Bitampi Mwandamutekete emu mmuvwa mulama bwalu busokoka bwònsò nkòòng bwa Cyòci aci. Nenku ùvwa m'Mukanda wa Bupikudi, Dipungila Dipyadipya.

¹⁴² Kì n'Dikulukulu to. Adi divwa anu dyamba cyanaana bwa Dipungila Dipyadipya. "Baakavwijiiibwa...kabeena mwa kuvwijiiibwa bapwangane twètù katuyiku to," Ebelu 11. Nwamonu anyi? Nwamonu anyi? Mpindyewu, bupikudi bwakalwa anu paakafwa Mupikudi. Nenku bôbò bavwa mu mushindu mushaadile mwinshi mwa mashi a bânà baa mikooko, kâyi a Mupikudi to; kabavwa banji kupikudiibwa to, too ne paakalwa Mupikudi.

¹⁴³ Monaayaaku mpindyewu dîbà divwa Mupikudi ewu... Yone wakakenzakana, ki Nzambi ewu musòmbè pa Nkwasa wa butumbi, ne Mukanda mu cyanza Cyende, ùvwa mukanga ne Bitampi Mwandamutekete, ne bulongolodi bwònsò nkòòng bwa bupikudi bwikaleMu.

¹⁴⁴ Ne Ûvwa mujimijiibwe kudi bukwabantu, Adama. Ne Nzambi...Wòwò awu wakaalukila e kuya penyi? Sataana kavwa mwa kuWangata to; yêyè wakamujimijijaWu cyanaana. Kadi Mukanda awu wakaya penyi pa dîbà adi? Kawuvwa wa bukwabantu to. Mabeneshà kaàvwa a panwapa to; panwapa bukwabantu buvwa buWujimije. Pa nanku Wòwò kwalukila buludi kudi MwenaWu wa ku cibangidilu, uvwa Nzambi awu.

¹⁴⁵ Ki Yêyè ewu musòmbè naaWu, ne Yêyè kubiikila muntu, muntu kampanda, bwa kulwa kuWunana.

¹⁴⁶ Yone kukenzakanaye, kadi kakuyi muntu nansha umwepele mu Dyulu, kakuyi muntu nansha umwepele pa buloba, muntu nansha umwe, Mwanjelo nansha umwe, cintu nansha cimwe kaciyi mwa kwangata Mukanda anyi kutuula Bitampi, anyi mene kuWutangila to. Muntu nansha umwe kavwa mukumbanyine to. Yone mmwambe ne wakadila bujindajinda.

147 Pa dîbà adi Mwanjelo kampanda kulwaye kudiye, kwamba ne: “Kudidi to, Yone, bwalu Ntambwe wa cisamba cya Yuda wăcîmunu, ne Yêyè ngudi mukumbanyine.”

148 Ki Yone kutangila bwa kumona mwânà wa mukooko... anyi bwa kumona ntambwe, kadi wakasangana cinyi? Mwânà wa mukooko, mwine awu uvwa Mwânà wa mukooko wa umata Mashi, Mwânà wa mukooko uvwa mushipa. Kacya ku dîbà kaayi? Kacya ku difuka dya dyulu ne buloba.

149 Mwânà wa mukooko awu wakasemena, kuya tamakatamaka too ne kudi Ewu uvwa ne Mukanda mu cyanza Cyende cya dyabalume awu, ne kwangata Mukanda awu; kubânda pa Nkwasa wa butumbi e kusômba. Ki cyôci aci. Ki kujikaku (dîbà kaayi?) paakabuuludiibwa Bitampi. Dîbà divwa cya ndekeelu, abi bivwa mbyônsò bivwaYe mupikule, kakuvwa cintu nansha cimwe. . .

Wakalwa bwa kupikula.

150 Wêwè udi wamba ne: “Bwa cinyi Yêyè kî mmubapikule kukaadi bidimu makumi anaayi? Kukaadi bidimu binunu bibidi?”

151 Nwamonu’s, mênà abo adi mu Mukanda wa Mwoyi, mu Mukanda awu. Nenku bivwa bikengela kwikalaYe mwimane mwaba ewu, bwalu civwa nkiipacila kaa Nzambi bwa kubapikula. Mênà abo akaavwa mamana kufunda mu Mukanda wa Mwoyi wa Mwânà wa mukooko kumpala kwa difuka dya dyulu ne buloba. Mwânà wa mukooko uvwa mufundiibwemu pamwe naaci, bwa kushipiibwa. Ki Mwânà wa mukooko ulwâlwa ewu, pakaavwaye mushipiibwe, mwalukile bwa kwenza dyakwilangana.

152 Mutangilaayi! Nekwikale ditentula bûngî cyanaana, bintu bikwabo byônsò bûngî cyanaana, kadi bulelela kûvwakû anu muntu kampanda uvwa ne cya kusungidiibwa, bwalu Yêyè... Ekeleeziya uvwa mudyanjila kulongolola bwa kwikala kayi ne katoba anyi mufudi. Neikaleku. Ne Mwânà wa mukooko wakafwa mbwa kiine kiipacila aku. Nenku paakapikudiibwa dînà dya ndekeelu mu Mukanda awu, Mwânà wa mukooko wakasemena ne wakangata Mukanda ne: “Mêmè ng’Wâkacyenza!”

153 Banjelo, Bakeluba, Bakulu makumi abidi ne banaayi, Nyama, bintu byônsò, baakakopola bifulu byabo bya butumbi, baakapona panshi kumpala kwa Nkwasa wa butumbi, ne baakamba ne: “Udi mukumbanyine ng’Wêwè!”

154 Yone mmwambe ne: “Bintu byônsò mu Dyulu ne pa buloba byakangumvwa ngeela lubila ne: ‘Amen,’ ngeela lubila lukole ne: ‘Aleluuyah,’ ne butumbi kudi Nzambi.” Lubila lukole alu lwakabanda. Bwa cinyi? Mênà abo avwa mu Mukanda

awu, bwa kubuuludiibwawu, ne Mwânà wa mukooko nguvwa mucibuulule.

¹⁵⁵ Mwânà wa mukooko nguvwa mucipikule, kadi Yèyè kavwa mwa kuseemena pavwa dinà dyònsò kadiyi dibuuludiibwe to, ne ciine aci civwa cyenzekela mwinshi mwa Citampi Ciusambombo, kumpala kwa cya Mwandamutekete kubwayikaci. Pashiishe bavwa kabayi katoba...Pashiishe Mwânà wa mukooko kulwaye bwa aba bakaavwaYe mupikule. Kulwaye bwa kunana cikaavwaYe mupikule. Ùkaadi naaci, mu Mukanda emu mene, Wukaavwaye mwangate mu cyanza Cyende awu. Mpindyewu Ùkaadi ulwa bwa kwangata cidiYe mupikule. Ki mudimu Wende ngwôwò awu. Wâwênji. Walu bwa kucyangata. Kaa, dîbà kaayi—kaayi's we! Wâçijaadikì, Citampi cya Mwandamutekete ncicijaadike. KwalukilaYe e kwangata Mukanda wa Bupikudi!

¹⁵⁶ Monaayi, Mukenji wa mwanjelo wa mwandamutekete nguvwa ne cya kubuulula cya mwandamutekete aci, Bitampi Mwandamutekete. Bwakabuulwibwa 10.7, mpindyewu, nenucipete. Nwamonu anyi?

¹⁵⁷ “Ne wakamona Mwanjelo ewu utuuluka, uteeka dikàsà Dyende pa buloba bûme ne pa mbû,” awu uvwa n’Kilisto, “mwikale ne mwanzankongolo kumutu Kwende.” Monaayi Yèyè awu, nenuMupete mu Bwakabuulwibwa 1, cyakabidi, “mwikale ne mwanzankongolo kumutu Kwende; umweneka bu jaspe ne sardoine,” ne bikwabo. Ki Yèyè ulwâlwa ewu, ùtèèka cyanza cimwe. . . “Dikàsà dimwe pa buloba bûme, dikwabo pa mâyi; wela cyanza Cyende muulu. Ûvwa ne mwanzankongolo kumutu Kwende,” too ne piine apu. Aci ncipungidi. Ûvwa m’Mwanjelo wa Cipungidi, uvwa Kilisto; muvwijiibwe ndambu kwinshi kwa Banjelo, bwa kukenga. Ki Yèyè ulwâlwa wawa: “Ki kujuulaye byanza Byende kubitangija mu Dyulu, ne kudicipaye mu dinà dya Ewu udi ne mwoyi kashidi ne kashidi,” Wa Cyendelele awu, Taatù, Nzambi, “ne kakwakwikala kabidi cikondo nansha,” piikala cyôci eci mwa kwenzeka. Cyajiki. Cyamanyi kujika. Cyajiki.

¹⁵⁸ Ne pashiishe Mufundu udi wamba ne: “Kadi dîbà dya—dîbà dya Mukenji wa mwanjelo wa mwandamutekete wa pa buloba,” musanjeela pa buloba, Cikondo cya Ekeleeziya cya mwandamutekete ne cya ndekeelu, “ku ntwadijilu kwa mudimu wende wa bwambi,” pakaadiwu ubanga pa buloba, pa diine dîbà adi, “bwalu busokoka bwa Nzambi, bwa Bitampi Mwandamutekete ebi, buvwa ne cya kumanyishiibwa pa dîbà adi.” Mpindyewu tudi tumona mwaba utukaadi. Ncifwanyine kwikala cyôci aci anyi's, nwênù balunda, ncifwanyine kwikala cyôdi aci anyi? Monaayi, byònsò bidi mwa kwenzeka's.

¹⁵⁹ Cyònsò civwà cipikudiibwe mu Mukanda amu aci, Wâseemènyì bwa bupikudi. Cyònsò civwà cikengela kupikula civwà mu Mukanda amu, cidyanjila kulongolola kumpala kwa

difuka dya dyulu ne buloba. M'Mulwe bwa kuCipikula. Cyônsò cikaavwà cipikudiibwe civwà cifundamù aci.

¹⁶⁰ Ndi muswe kunwelaku lukonko mpindyewu. Ne nwênù badi pa mukaba wa mêtì abu, teelajaayi ne ntema. Mêsù àvwà enza bwôwà awu, mutu ùvwà wenza bwôwà awu, ncifwanyine kwikala ne mbwa bwalu ebu budi Mukenji ewu mmulwishangane bikole ne bakaji baa cikondo cya bwena leelu eci anyi? Eci ncifwanyine kwikala Mukenji wa mwanjelo wa ndekeelu awu anyi? CyakambaYe ku musulu kwaka ncinyi, kukaadi bidimu bitwe ku makumi asatu ne bisatu? “Anu muvwa Yone mutumiibwe,” nwamonu’s, “bwa kumanyisha dilwa dya kumpala dya Kilisto, Mukenji webe ki wamanyisha Dilwa diibidi.” Pa buloba bujima, ne ki cidivu mwenze, pa nanku Dilwaadi didi ne cya kwikala diikadi pabwipi. Tangilaayi numone cidi cyènzekà mpindyewu.

¹⁶¹ Bwa cinyi? Mêmè kudikoonya ku mutu. Mêmè kubungulukila pa musaamu wanyi. Mêmè kwendela panshi apu. “Mbwalu kaayi neebe?”

¹⁶² Kukaadi matuku ndambu, mvwa mwele bantu babidi batuvwa naabo mu mashinyi lukonko. Nkaavwa mulwèlè Jack Moore musangu kampanda. Ne nwênù bônsò aba nudi bamanye Mwaneetu Jack Moore. Nyaaya kudiye mu Shreveport. Mêmè kwamba ne: “Mwaneetu Jack, wêwè ewu utu kûndi bu mulunda wa pa mwoyi ûnkaadiku nende pa buloba apa.” Kadi kumpala kwa mêmè kumwela yêyè lwine lukonko alu, mvwa mwanji kulwela mukajaanyi.

¹⁶³ Ne kudiku muntu udi mumanye bwalu bwanyi, anyi mapanga ne—ne byônsò, mmukajaanyi, nwamonu’s, muntu munanga. Ki dîngà dituku mêmè kumwambila, ne: “Munanga wanyi, mêmè bu bayeebe, nyewu ndi mwambi wa Evanjeeliyo. Ncyêna muswe kwelaku bundu kampanda pa Ewu ûndi munange nansha. To. Ncyêna muswe kukutapa wêwè ku mwoyi to. Ncyênàku mwa kuswa bwa kukwela bundu pambidi to. Nzambi ênzèku ne ncyenji kantu nansha kamwe kadi kafwanyine kukwenzela bibi to. Kadi nêngãmbè bishi bwa cidi cifwanyine kwenzela Nzambi bibi, mushindu mwine wûndi muMunange ewu! Wêwè udi mukajaanyi; Yêyè m’Musungidi wanyi ne Nzambi wanyi. Ndi muswe nkweleku lukonko. Kudyanganyiku mukana to. Ungambile bulelela.” Mêmè kwamba ne: “Ntu mulonge bikole. . .”

¹⁶⁴ Nenku nkaadi mudikonkekonke. Ndi, mêmè—mêmè ndi muntu mukwatakaja, wa kàyi dyumvwa, wa pabwende. Bwa aci kaayi ndi mumanye. Bantu bônsò batu bambambe ne: “Ewu muntu’s ngwa mushindu!” Ee, nwamonu’s, kwêna mwa kudyenza wêwè mwine to. Udi anu cyûdi aci, nku ngàsà wa Nzambi.

165 Ki mêmè—mêmè—mêmè kwamba ne: “Ndi mujimijeku lungenyi ndambu anyi, udi mumanye’s, ne—ne mwenzeku bu mutu munnyunguluke anyi?” Mêmè ne: “Cìndì anu mpiishila bakaji baba ncinyi, ku musangu ne ku musangu, kadi paanyi mubanange?”

166 Batu bambiikila, bangambambe mûndì “mukinyi wa bantu bakaji,” mêmè paanyi nciyi mukineku. . . Ne ndi anu “nkina bantu bakaji.” Nwamonu anyi? Aci ncyà mafi. Mêmè ntu munange bantu bakaji, ndi nswa kwamba ne, bu bânà beetu baa bakaji.

167 Ncyakukutuuta cyanza paanyima to, pândì mumone ne udi mupiile. Aci ndi mwa kukwambila. Ndi mukunange bikole be nciyi mwa kukulekela mu dipiila to. Bamwe bantu badi bafwanyine kwenza aci abu, adi ndinanga dya mushindu mushiilangane. Wamonu anyi? Ndi mukunange bwalu ndi munange cyûdì aci; udi mukwacishi wa mwânà wa balume kampanda wa Nzambi, ne udi citupa cyende. Wamonu anyi? Ne ndi—ndi mukunange bwalu—bwalu udi mwenjiibwe ku cimfwanyi cya mulume, ne mulume pende mwenjiibwe ku cimfwanyi cya Nzambi, ne bwa bwalu abu, nwênù bônso pamwe, nudi umwe mu Kilisto. Ki bwa cinyi ndi mukunange. Cîngà cintu, nansha cya bishi, cidi cyanàànà. Nzambi mmumanye nanku, mu nsòmbelu wanyi mujima. Wamonu anyi? Ncyà bushuwa. Ndi mukunange. Bwa cinyi bûndì mufwanyine kuuuka ne ku musangu ne ku musangu. . .

168 Padibo bamba ne: “Ambilaayi bakaji bônso, dîbà didibo, piikalabo mwa kulwa kuteeleja Mwaneetu Branham uyiisha, basaamune nsuki yabo mushindu mushiilangane. Bāsè cifulu anyi cintu kampanda anyi cintu kansanga, bwalu yêyè neabange kutonoka bwa nsuki mipi, ne twenu. . . Kanudilaabi bilaabu bya kwîsù to nansha bya bishi,” ne bikwabo bya mushindu awu. Aci’s ncikaadibo benzenze. “Byônso bivwaye wamba!”

169 Muntu mukwabo wakamba ne: “Bwa cinyi kuyiku. . .” Yêyè ne: “Bantu batu bakwitabuuje ne udi muprofeta. Bwa cinyi kuyiku ulongesha bakaji mushindu wa kupetabo mapà manene a nyuma, ne bintu bya mushindu awu, pamutu paa kukeba bwa kubalongesha bintu bu abi?”

170 Mêmè kwamba ne: “Piikalabo kabayi baswe kulonga ABC, nebamanye makumi makole mushindu kaayi?” Nwamonu anyi? Anji kudilongolola, kumpalampala.

171 Kadi nyewu pândì ntamba kuyiisha, maalu paawu atamba kunyanguka. Pashiihe ki nwênù kwamba ne: “Bwa cinyi kwêna ulekela?” To, mukalenge. Bikengela kwikale dîyi kampanda, ntemu kampanda udi ubikandameena.

172 Umwe wa ku bantu banene mu mudimu wa bwambi leelu ewu, mmuntentekele byanza anu abidi adi pansha aa, wamba ne: “Ndi muswe nkusambidileku, Mwaneetu Branham, bu wêwè

mwa kucingiitabila, bwa Nzambi akuumusheku cintu aci mu mwoyi webe amu.” Yèyè ne: “Lekela kwökò bakaji abu kwabo kwa tàlàlà, mu biine bintu abi’s.”

173 Mémè kwamba, mémè kwamba ne: “Udi witabuuja aci anyi, mukalenge? Peebe wèwè ewu’s udi muiishi wa cijila.”

174 Yèyè ne: “Cya bushuwa. Ncyèna nciitabuuja to, kadi,” yèyè ne, “aci’s—aci’s nciitangile. . .”

Mémè ne: “To.”

Yèyè ne: “Aci’s nciitangile bampaasata.”

Mémè ne: “Bôbò paabo nyawu kabayi bacyenza.”

175 Bikengela muntu kampanda àcyènzè. Bikengela musulu bawusabuke. Ciseba’s bikengela bacilamune. Mémè ncyèna muswe kucyenza to. Nzambi mmumanye ne ncyèna muswe kucyenza to. Bààbùngì baa ku biine bakaji abu’s batu bapa bàna baanyi byakudya, ne mbafwanyine kuteeka mwoyi wabo panshi bwanyi mémè, pabwipi ne aci. Nudi nwela meeji, ne ngàsà wa Nzambi mupongolola kudi Nyuma Mwimpè, nudi nwela meeji ne ndi mufwanyine kushaala musinge mikolo mmona muntu mukwate ne bya luse awu ukadyela mu Cyendeleele mwamwa kayi ditekemena, pàngiikalà nciyi ngeela lubila lukole bwa kucikandameena anyi?

176 Kî nne ndi cimanya-byònsò to; kadi nyuma wa ditunga edi, nyuma wa ekeleeziya, kadi, kayi Nyuma wa Kilisto to; nyuma wa ekeleeziya, dingumba, mmukwate bakaji aba kadi kubakupa mu bukooya abu muntu mwamwa. Kadi mémè ndi anu dîyi cyanaana, didi dyela lubila ne: “Patukaayi muntwamu. Nyeemaayi nuumuke mu bukooya abu.” Kanulekedi dyabulu unwenzela cintu cya nanku awu to. Ncibi!

177 Ne nwènù beena Assemblées de Dieu, nulekela bakaji abu, nulekela bakaji abu babebula nsuki yabo, kadi nubakandika bwa kudilaaba bilaabu bya kwîsù. Mu bushuwa bwa bwalu kakwena Mufundu udi ukandika bilaabu bya kwîsù to, kadi udiku udi ubenga kubebula kwa nsuki yenu. Yèyè kèna nansha mukumbanyine bwa kusambila kumpala kwa Nzambi to, mudi Bible wamba. Bayende udi ne bukenji bwa kushipa nende dibaka ne kumulekela. Cya bushuwa. Yèyè udi udizanjika kumpala kwa baa pa buloba bu mukaji mubiipe. Bible ngudi mwambe nanku. Yèyè udi ufwisha bayende udi mumusele bundu padiye ucyenza apu. Ki menemene cidì Bible mwambe ncyôcì aci. Nwamonu anyi?

178 Ee, kadi mukaji mudilaabe bilaabu bya kwîsù, tudi tupeta mukaji uvwa ucyenza mu Bible, anu umwepele. Úvwa ny’Izabela. Úvwa nyèyè awu. Muntu umwepele mu Bible uvwaku mudilaabe bilaabu bya kwîsù, uvwa ny’Izabela awu, ne dyakamwe Nzambi kumudiishaye kudi—kudi mbwa mitomboke.

Yèyè ukaadi mushaale cintu cya bundu, nansha mene wende . . . Byònsò, cintu cyònsò cya lwonji mbacinyike dìnà ne Izabela.

¹⁷⁹ Kabyena bikengela nwènù kwenza aci nansha. Kabyena bikengela nwènù kucyenza to. Cidi cinusaka ku dyenza aci ncinyi pa dībà adi? Nyuma wa dyabulu.

¹⁸⁰ Kanwena bacimanye to. Ndi mumanye ne kanwena bacimanye to. Nudi—nudi bantu bapitepite bwîmpè. Nudi bîmpè. Nudi nundabula ku cyanza, nunyiikidisha.

¹⁸¹ Kadi ndi mununange. Ncya bushuwa. Kadi mêmè mumone aci, ncyênàku mufwanyine kwikala mwena lubombo. . . Pòlò mmwambe ne: “Ncyèna mudikande bwa kunwambila Mubelu wònsò nkòòng wa Nzambi to.” Mashi a mukaji nansha umwe kaikadiku pambidi paanyi mu Dituku adi to, anyi a mulume nansha umwe. Ndi munwãmbile Bulelela. Ne ntu ngumvwa bingenza bibi bwa kucyenza; kî nkuumvwa bingenza bibi ne bwalu ncyèna muswe kwenza cidi Nzambi ungambila bwa kwenza to, kadi ndi mununange. Ncitu muswe kunutapa ku mwoyi to, pa nanku cîngùikalà mwa kwenza ncinyi? Kadi Dinanga dya Nzambi dikezùke, ki dyàkusàkà ku dicyènza.

¹⁸² Yesu’s wakalomba mene ne bwa kwepela nkuruse. “Bidiku mwa kwenzeka bwa lupanza elu lupite anyi?” Yèyè ne: “Byòbi biine, kaciikadi diswa Dyanyi to, ciikale Dyebe Wèwè.”

¹⁸³ Nebikengele bwa mêmè ngiikale muntu udi wamba cyòci eci anyi? Nebikengele bwa ngangate bakaji baa mushinga mukole ne baa musangeelu abu ne bikwabo, kwikala anu kubuuvula cizubu kubasunsulula anyi? Nebikengele bwa mêmè kwenza nanku anyi? Nebikengele bwa ngangate bambi naanyi, kwimana mwaba awu e kubamba mudibo banange mfranga ne di—dingumba kupita mudibo banange Nzambi anyi? Mêmè, ngamba bânà beetu baa mushinga mukole badi bangeela diboko. . . Kaa, bidi bikengela bwa ngènzè nanku anyi? Éyì Nzambi, kundekediku kucyenza to.

¹⁸⁴ Kadi ncitukù mudikànde bwa kunwambila Mubelu wònsò nkòòng to. N’Dinanga dishuwashuwale dídì dinsàke ku dicyènza.

¹⁸⁵ Ki bwa cinyi Mukenji ewu utu mushindu ewu anyi? Mwaba mukwabo nansha umwe pa buloba kacyenaku to. Cidi penyi? Eyo. S’badi bumvwa bwôwà. Nwamonu anyi? Kadi wôwò awu utu kawuyi bwôwà. Menemene. Nzambi utu misangu yònsò anu mushindu awu, nwamonu’s. Eyo. Mbwa bwalu ebudibi bakaji bafike ku ditandishiibwa bikole kudi Mukenji ewu anyi? Ncinyi mumanye to, kacivwa cibuuuludiibwe to. Bavwa bacindeeje, kadi kacivwa cifike kùndì to anu dituku dikwabo dyadya. Nwamonu anyi? Tangilaayi numone kwaka. Eyo. Ncya bushuwa ne cidi cikumbanangana ne mudimu wa bwambi ewu.

¹⁸⁶ Mpindyewu anji indilaayi kakese. Kukaadiku kwenzeke ne ciikale buloba bwa bakaji kacya kwònsò eku anyi? Eyowa. Bilondeshile maalu malonda, mu matuku a Eliya, kuvwa mukaji dìnà dyende Izabela. Ne yèyè wakapeta bukookeshi pa ekeleeziya wa Nzambi, cidì Bible wamba ne necyenzeke cyakabidi mu matuku a ndekeelu aci; nyuma wa yèyè awu, kupicila ku ekeleeziya kampanda, bulongolodi kampanda. Nenku neikale mukaji wa masandi, ne ekeleeziya mikwabo yònsò pamwe nende neyiikale ndumba, anu mudiye yèyè amu. Ncya bushuwa anyi?

¹⁸⁷ Bwakabuulwibwa 17, mmwambe ne: “Yèyè mmukaji wa masandi, ne udi MAMWENDÈ WA BANDUMBA.” Aci kaciyena mwa kwikala bantu balume to. Aci mbantu bakaji. Nwamonu anyi? Ne baakabakupa bònsò, ne mwoyi, mu Dijiba dya Kapya, ne baakabalunguja. Ncya bushuwa anyi? Ki bwalu mbwabu’s.

¹⁸⁸ Monaayi ne, paakajuuka Izabela awu mu cyalu, kwakajuuka muntu mukwabo bwa kukandameena cyôci aci. Nzambi wakatwala muntu. Katwena nansha mene bamanye kwakafuminaye to. Kavwa ne nshindameenu mumanyike wa mudimu wa bwambi to. Kacya kavwaku nî mmwakwidi nî ncinyi ciine to. Kupatukaye pende anu nanku, muntu mukulakaji mupayame wa mwitu bamubiikila ne ng’Eliya, ne wakateeka cisuuyi ku muji wa mucu, kadi bôbò kumukina. Kí ng’anu aci to, kadi disangisha dyende dijima divwa dimukine.

¹⁸⁹ Kadi cikondo kampanda kudyelelaye meeji ne ùkaavwa mushaale nkaayende. KwambaYe ne: “To, Ndi naabo binunu mwandamutekete badi anu pamwe neebe apu.” Nwamonu anyi? Kavwa nkasumbu kaa basungula aku, nwamonu’s. Kutu misangu yònsò anu kasumbu aku. Yèyè kwamba ne: “Kuciinyi nansha, Eliya. Ndi mumanye ne wèwè udi udyelela meeji ne udi mushiikile, bwalu mangumba nyawu makwele lubilu wèwè muye too ne kuulu kwa kakuna. Kadi,” ne, “Ndi naabo binunu mwandamutekete badi biitabuuja cintu cimwecimwe cyùdì wèwè uyiisha eci. Wamonu’s, Ndi naabo.”

¹⁹⁰ Pashiishe paanyima paa dituku dyende adi, Loomo kwangataye bukookeshi, ki kulwaku cyakabidi cikondo ciikale buloba bwa mukaji, myòdelè yònsò ya—ya bakaji, mushindu uvwabo bapatuka bavwale tufulu twabo twa bijengu atu ne bikwabo, nwamonu’s. Ki Nzambi kajuula mukwabo ne Nyuma umwèumwè awu pambidi pende, Nyuma wa Elisha. Ncya bushuwa anyi? Ki yèyè awu kwamba ne: “Cisuuyi nciteekiibwe ku muji wa mucu.”

¹⁹¹ Nenku kuvwa kakaji kakwabo kaa kale keena bilumbu muntwamu, kavwa kakasediibwe kudi wako...kashiye bayaaku, kusediibwa kudi bayaaku-ciinà, Heloode. Helodyasa, ne yèyè mukaji ewu uvwa cifwebe cidilaabe bi—bilaabu bya kwisù cya mu diine dituku adi, uvwa wombota maja.

Wakalongesha mwanende wa bakaji mudi kwombota maja. Yêyè uvwa ne mwânà wa bakaji, mumulelè ne tatwëndè mudiishi, ta—tatwëndè mudiishi; ne tatwëndè, mwanààbò ne mulùme awu. Helòdyàsà! Awu's uvwa mmwânà wa—wa—wa mukaji awu's. Nenku ùvwa mumulongeshe mudi kwombota maja, ki awu kulwaye muji wa maja wa wimansha ne bilàmbà, mufwane anu mamwëndè. Nenku ùvwa udyambidila ne uvwa mwa kubwela mabaka misangu inaayi anyi itaanu, kwenza cyònsò civwaye muswe kwenza aci.

¹⁹² Kadi ke Heloode udi upatuka ewu. Bavwa bònsò beena Yuda, mpindyewu nwikalaayi bavuluke nanku. Bavwa beena mu ekeleeziya. Ki Heloode udi upatuka ewu, ne ekeleeziya wende, bwa kuteeleja muprofeta ewu, uvwa bantu biitabuuje ne mmuprofeta awu.

¹⁹³ Kuyaye tamakatamaka too ne mumpala mwa bònsò babidi abu, kwambaye ne: “Kí mbyanyishiibwe kudi mikenji bwa wêwè kwikala nende to.” Kadi aci cyakenza ne mukaji awu ùlàkanè wàmba kutaayika! Nwamonu anyi?

¹⁹⁴ Mpindyewu, muntu kampanda mukwabo wa patupu ewu nunku's mmwambe ne: “Wetwawu, Helodyasa! Ncya bushuwa ne tudi ne disanka dya kukwakidila mu disangisha dyetu leelu ewu.” Kadi kî n'Yone to.

¹⁹⁵ Yesu wakamba ne: “Nuvwa baye kamona nganyi, panuvwa bapatuke baye kamona Yone apu? Nuvwa baye kamona muntu muvwale ne ku mènù bu mwakwidi anyi? To, awu udi mwa, wa mushindu awu utu utwa bânà baa mu maboko mishiku ne ujiika bafwe.” Nwamonu anyi? Yêyè ne: “Nuvwa baye kamona cinyi? Lupeepele, dilenge didibo banyungisha kudi lupeepele lwònsò naka anyi? Bamba ne: ‘Vwâ kunu, Yone. Netukufute bipite apu wêwè utuyiisha twètù. Kabidi, twètù, twètù kadi's ki bulongolodi bwa butambe bunene?’” Kî n'Yone nansha. To, yêyè kaakaya kamona abi to.

¹⁹⁶ Yêyè ne: “Nuvwa baye kamona cinyi, pa dîbà adi, panuvwa baye bwa kuteeleja ne kumona Yone, muprofeta?” Yêyè ne: “Kadi nya' nnwambila, nwênù, mutambe ne muprofeta! . . . bu nwênù mwa kwakidila ciine aci, yêyè ewu ki uvwa muprofeta mwambe ne nealwe awu ne: ‘Nèntumè musanjeela Wanyi kumpala Kwanyi, ne yêyè nealongolole njila kumpala kwa Mukalenge.’” Ùvwa musanjeela wa Cipungidi. Yêyè ne: “Kakutu kwanji kwikala muntu, mulela kudi mukaji, munene bu yêyè awu nansha.” Nwamonu anyi?

¹⁹⁷ Muntu wa mushindu awu nguvwa Nzambi mujuule bwa dituku dyadya, Eliya, muntu wa mwitu menemene. Yone, cintu cimwecimwe aci. Nwamonu anyi? Nyuma wa Eliya uvwa pambidi paa Yone. Nenku Yêyè udi wamba, pakaadiku kulwa cyakabidi dituku dya mukaji, Nyuma awu neajuuke cyakabidi: “Kumpala kwa Dilwa dya Mukalenge, pooshiibwa

buloba, ne baakane bapatuka bwa kwendela pa bu—butu bwa beena lwonji, benze bu mùdi butu mwinshi mwa makàsà abo.” Yèyè mmucilaye, cyakabidi, mu matuku aa. Monaayi, Nyuma Mwimpè ngudi mulaye cyôci aci. Ncikumbanangane ne dîbà ditudi ne mwoyi edi.

¹⁹⁸ Kudi ne cya kujuuka muntu kampana. Aci cidi ne cya kulwa, bwalu cidi EMU MMUDI MUKALENGE WAMBA, Maalaki nshapita mwi4. NcyakambaYe menemene ne ki ciikala cimanyinu: “Pabwîpî menemene ne dilwa dya Dituku dya Mukalenge didi dikwacisha bwôwà, Nènnütùminè Eliya.” Ne yèyè awu cyenzaye ncinyi? “Neakudimune myoyi ya bânà bwa kuyaaluja ku Dilongesha dya baataatu, kuyaaluja ku Bible,” kubapatula mu mashiilangana a cyena mangumba aa, “ne nebaalukile ku Bible, kudi Nzambi.” Ki civwaye mwa kwenza ncyôci aci. Monaayi ne ncikondo kaayi cinene citudi ne mwoyi.

¹⁹⁹ Baprofeta abu bavwa batandisha bakaji baa cyena leelu baa mu matuku abo, ne bônso baakafila myoyi yabo bu mushinga. Maalu malonda adi ajaadika ne cyônso cya ku bikondo abi civwa mbuloba bwa mukaji, muvwa bakaji biikale ne bukontononyi.

²⁰⁰ Tangilaayaaku mukaadi maalulu leelu wa Ndaaya ewu. Netwikale ne mukaji, Mfumu wa ditunga, dimwe dya ku matuku adi panshi aa, mbyenze anu bu ne mbifwanyine kwenzeka mpindyewu mene. Mu bushuwa bwa bwalu, yèyè ngudi Mfumu wa ditunga. Nwamonu anyi? Mulume yèyè udi anu cidishingilu cyanaana. Anu abidi adi panshi aa, mu dimwe dya ku matunga etu makwabo, mukaji nguvwa upeta butumbi bwâbûngî be ne bikwabo byônso bya kudi bantu bônso, mu mushindu wa ne Mfumu wa ditunga, yèyè mwine, kwambaye ne: “Mêmè’s ki bayende.” Mfumu wa ditunga dya États-Unis, nwamonu’s. Yèyè mukaji ngudi ufila myôdelè ya mvwadilu, bakaji paabo bayilonda, nwamonu’s, anu mwakenza Izabela menemene. Nuvwa bateeleje diyiiisha dyanyi pa *Ntèndeleelelu-Izâbèlâ* adi. Nudi bamanye. Nudi bacimanye. Nudi numona mwaba utukaadi patudi twakulangana apa anyi?

²⁰¹ Nudi numona cidi cyenzeke muneemu emu, kukaadi lumingu anyi mbingu ibidi, muneemu mu cimenga emu anyi? Mwambi wa beena Ditabuuja dya cyena Luther mmubiikile nsaserdose wa Katolike wa Mwoyi Munsantu bwa kulwaye kuyiisha pa kaaba kende yèyè, awu pende kuyiishaye, ne mwambi wa beena Ditabuuja dya cyena Luther awu kuyaye pende mwa nsaserdose wa Katolike awu e kuyiishaye pa kaaba kende.

²⁰² Nsangilu wa Maekleeziya kuntu kwaka mpindyewu, udi udisangishila mu Loomo awu. Mukanda wa nyungulukilu ewu, udi mulunda wanyi mulenga, David duPlessis; pâmvwà musômbe kuntu kwaka mmwela lubila mmwambilabu, ku Fourteen-Mile Creek kwaka, abidi adi panshi aa; kayi umanya ne mmukabweje ekeleeziya mu Baabulona to, pavwa muntu

yônsò wamba ne: “Kaa, ekeleeziya yônsò neyishaale umwe mpindyewu.” Eyo, ndi mumanye aci, nwamonu’s, anu menemene cidi cifundiibwe mu mukanda wanyi wa biprofeta mu cidimu cya 1933, bwa ne ncivwà mwa kwenzeka. Mona’s, kanwenaku numanya ne awu n’Sataana udi ubasanga anyi? Bible’s ngudi mwambe cyôci aci. Kadi cikondo cyânji anu cipite, cikondo cikese cyanaana, penzabo anu ne bãshààdi cintu cimwe, pa dîbà adi diikala dya pambelu paa cyena mangumba dyajiki, nwamonu’s. Ki piikalaku cimanyinu cyenu cya nyama wa lwonji aci mpôpò apu, bushuwa. Nwamonu anyi?

²⁰³ Anu bwalu ncyêna ne dîbà dya kutungunuka pa bwalu ebu to, kadi, dîbà dikaadi diipacila nkankala ne tusunsa dikumi ne tutaanu. Nwamonu’s, ndi muswe njikije eci, mfike ku kantu aka. Ndi anu ngaadija Mifundu eyi mwômò emu cyanaana munudi mwa kumwena mudibi mwa kwenzeka ne twikale mwaba utukaadi ewu, nenku pashiishe netujikije mu tusunsa tukese cyanaana.

²⁰⁴ Mpindyewu monaayi anu cidi cyenzeke. Ba—baprofeta bàvwà bàtândishà bakaji abu mu mine matuku awu ne baakabiinyika ne “mbakinyi baa bânà bakaji.” Ncyà bushuwa. Maalu malonda adi ajaadika ne ki muvwabi.

²⁰⁵ Mpindyewu anji indilaayi kakese. Nwênù badi bafunda Mifundu abu, bivwa bikengela nwênù kufunda Timote wa Kumpala 5.6. Bible mmwambe ne: “Mukaji udi ne nsòmbelu wa—wa bisankasanka bya pa buloba awu.” Kacyena mwa kwikala masanka a Nzambi to; pa nanku ki civwabi bifwanyine kwikala, nwamonu’s. “Mukaji udi ne nsòmbelu wa bisankasanka bya pa buloba mmufwe padiye ne mwoyi apu.” Ki cyakamba muprofeta ncyôci aci, Pôlò Munsantu ne: “Mukaji udi ne nsòmbelu wa ngiikadilu wa pa buloba ewu mmufwe padiye ne mwoyi apu.” Nenku padiye ubenga luse, udi mwa kusambuka mukalu mudi kamuciyi kabidi mwaba bwende yêyê to. Nenku pa dîbà adi ukaadi penyi, ne mêtù ende malaaba bilaabu awu, ne nsuki yende mikosa ayi? Yêyê’s ukaadi mumane kusambuka mukalu, kâciyi ne mushindu wa kwalukilaye cyanyima, nenku’s kudi ne cya kwikala mudimu wa bwambi wa bamuyiisha yêyê. Kadi vulukaayi ne, pa diine dîbà adi, kwônsò nkumane kujika. Bwalu mbutuuke. Cikaadi anu dimwenekelangana dya mikishi’s.

²⁰⁶ Nekwikale mudimu wa bwambi waleeja maalu manene a kukema, mudi Yoela mwambe, kadi kakwakwikala cikondo bwa bupikudi to. Cyônsò ncimane kujika. Mwânà wa mukooko ukaadi mumane kwangata Mukanda Wende, ne bapikula Bende bakaadi bajike. Anu muvwa Yesu muyiishe kumpala ne mubengiibwe amu, ne pashiishe kuya bu mukishi kamwenekela bavwa muntu mwamwa, kuyiisha bavwa mu buloko, bavwa kabayi mwa kunyingalala abu, kakuciyi cikondo bwa lupandu to, nebikengele bwa mudimu wa bwambi umweumwe awu

wenzeke cyakabidi. Apu nî ncifwanyine kwikala Nkokelu Mwisâtù? bwa badi bajimine Cyendelele. Apu nî nkwôkò aku kukaadici? Ndi ntekemena ne kî ncyôci to. Apu nî ncyôci? Anji elanganaayipu meeji kakese mpindyewu. Apu nî ncyôci? Nzambi kiitabiku to. Mêmè ndi ne bânà. Nwamonu anyi? Kadi ncyà bushuwa ne byâmwèki ne cikaadi anu pabwipi menemene apa.

²⁰⁷ Cikeena-kumona aci cyakalwa pâncivwà mwânà bwa cinyi? Bwa cinyi ncivwaku mutuminekù meeji kwine kwônsò kumpala kwaka? Bwa cinyi dibwela dya mu nyuma adi divwa dilwe mu cibambalu amu dituku adi, dyamba ne: “Ki cyôci eci”? Cidi menemene anu munkaci mwa badi kabay- . . . mi—misuuka mijimine. Neku Yesu wakabayiisha, kubajaadikila, kadi bôbò—bôbò kabaakanyingalalaku to. Ne pândi ntamba kuyiisha, mpadibo batamba kubiipa. Kakwena kanyinganyinga nansha nansha kakese to. Kakwena mwaba bwa kôkò aku to.

²⁰⁸ Mwânâ wa mukooko wakangata Mukanda Wende, pakaavwa Citampi cya Mwandamutekete pabwipi menemene ne kukangudiibwaci, Citampi Ciisambombo. Vulukaayi ne, Yêye mmutusokoke Citampi cya Mwandamutekete. Kavwa muswe kucyenza to. Paakiimana Mwanjelo, ku dituku ne ku dituku, ucyamba, kadi dibà adi Kaakaswa kucyenza pa cyôci aci to. Mbambe ne: “Mudi cinyaanya mu Dyulu.” Nansha umwe kavwa mumanye to. Civwa n’Dilwa dya Mukalenge.

“Kaa,” mùdi wamba, “kacyena mwa kwikala aci to.” Ndi ntekemena ne kî ncyôci to.

²⁰⁹ Twânjàayi anu kuya kumpala kakese mwaba ewu. Ndi ne cintu kampanda cifunda, nwamonu’s. Eyo.

²¹⁰ Vulukaayi ne: “Mukaji udi ne nsòmbelu wa bisankasanka bya pa buloba,” bya maalu a pa buloba, wenza maalu bu baa pa buloba. Mmufwanyine kwikala uya mu ekeleeziya ne wenza maalu bu munsantu, aci kacyena ne dipetangana nansha dimwe ne cyôci aci to, nwamonu’s, kadi, “mmufwe padiye ne mwoyi apu.”

²¹¹ Tangilaayi numone cikaadi mangumba mamwenzele. Akaadi mamuvwije mulengi wa Dìyi dya Cijila, ciine cidi cibegangana ne Bible aci. Mmamuvwije muiishi. Aci’s ncikandika kudi Mifundu. Mmamuvwije mulwe mene too ne mukookeshi mpindyewu, mfumu wa cimenga, banguvena, bintu byônsò mu ditunga, ne mwambi mu nzubu wa Nzambi.

²¹² Paabi, yêye’s ki udi mupiile ku mpekaatu yônsò ukàadikù mwenzeke ewu, yêye’s ki mwena buyaaya ebu. Cya bushuwa. Mpindyewu, ncyèna, ncyèna ngaakula bwa makenji to. Yêye ngudi mupiile. Yêye’s ngudi mukebi wa mwânà yônsò udi mulediibwe mpofo ewu. Yêye’s ngudi mukebi wa ne lukita lwônsò elu luumbudiibwe. Yêye’s ngudi mukebi wa mpekaatu, disaamà, tunyinganyinga. Mashinyi a cyambula-babeedi kaena mwa kwela cipungi to bu mukaji kayi mukabukebe.

Dishipangana kadyena mwa kwenzeka to, nansha mpekaatu, nansha lufu, nansha tunyinyinganya, nansha ditakanyika, anu mukaji ngudi mubyènzè. Ne Nzambi udi umukandika bwa kubàndayè mu cyambilu bwa kuyiisha, kadi nansha nanku bôbò's nya' badi anu bacyenza. Dingumba, nudi numona mwaba ukaadidi anyi?

213 Yèyè nnzambi mukaji. Mushindu mwine udi dyabulu ukwata mudimu's we! Mona's, beena Katolike bàdi bàbàvwija, bakaji abu, banzambi, bàtùma masambila kùdibo; ncyà bushuwa's, nzambi mukaji Mariya, ne bikwabo. Ndi mmona mu Nsangilu wa Bukwàntèndeleele muwaba udibo bambe ne nebyenzeke ne babange kuvudijaku tuumasambila twa Yesu nì mbifwanyine kukwacishaku beena Mishòònyi bwa kumùbwelabò. Nwamonu anyi? Nwamonu anyi? Kaa, cintu cilaaba nsukaadi pambidi aci's we! "Udi kayi ushintuluka," mudibo bambe. Nwamonu anyi? S'ucidi anu yèyè dyabulu umwèumwè wa kale awu. Bible mmwambe ne: "Ne yèyè wakafikisha bônso ku dipeta cimanyinu pa mpala yabo, aba bavwa kabayi ne mènà mafunda mu Mukanda wa Mwoyi wa Mwànà wa mukooko."

214 Ekeleeziya mudyanjila kulongolola ngùndi ngambila ewu, kî mbadi pambelu pààpa nansha. To, mukalenge. Mu kasumbu kônso, ki mudiYe mukoke badyanjila kulongolola Bende. Ki badiYe uvwila, mu cikondo cyônso.

215 Kadi's ki yèyè mukaji awu udi mwimane wawa. S'ki yèyè wawa. Nyèyè awu; uyiisha Dîyì, ulenga Dîyì, ulwa nzambi mukaji, pende mukebi wa mpekaatu yônso ewu. Bible mmwambe ne: "Ncyèna ngiitabuujà bwa mukaji kulongeshaye nansha, anyi bwa kwangata bukookeshi nansha bwa bishi, kadi bwa kwikalaye mu dikookela bu mudi kabidi mi—mikenji yamba." Nwamonu anyi? Nenku yèyè kèna mwa kucyenzaku to. Kadi nyawu bamuvwija mukookeshi wa ditunga, mfumu wa cimenga, nguvena; abidi mmale asatu mmîpi yèyè's neikale Mfumu wa ditunga. Cya bushuwa's. S'ki bwalu abu. Ki njila nyawu, ki njila udi bwalu bulonda nyèyè awu, nwamonu's. Ne bantu badi benza ciine aci anu bwalu kabeena bacyuka Dîyì edi to. Kabaadyakucimonaku to.

216 Tangilaayi beena Yuda badi biimane pààpa baba, bamanyi baa mabàla, bantu baa maalu mîmpè. Kadi Yesu wakamba ne: "Nudi baa tatwènù, dyabulu."

217 Kadi bu mèmè mwa kuMufikisha ku cilumbu kumpala kwenu mpindyewu mene? Twǎnjì tuteetaayi kucyenza kakese, ne Nzambi amfwileku luse bwa kwangata luseke ludi luMulwisha; kadi anu bwa katanci kakese cyanaana, bwa kunuleeja cintu kampanda.

218 Kadi bu wèwè mwa kwamba ne: "Ee, mèmè, butumbi kudi Nzambi, s'nkaadiku mwakule mu myakulu! Aleluuyah! Ndi

mumanye. Mêmè, eyo, mêmè—mêmè’s ndi muMupete. Nzambi abeneshiibwe. Eyowa!” Uh-huh, mmwômò anyi?

²¹⁹ Vulukaayi bantu baa mu Izaleela baba. Bible mmwambe, paanyima paa Yèyè mumane kubiikila bantu mubapatule, ne mubasungile ku dibapatula dya mu Ejipitu, Wakababutula bwalu kabaakalonda Mukenji to. Nwamonu anyi? Baakadya manà a mu Dyulu. Baakadya manà akalokesha Nzambi pa buloba bwa bôbô kudyabo, ne baakiimana mu bwikadi bwa musanjeela, ne baakamona Dikunji dya Kapya, ne baakumvwa Dîyi dya Nzambi, ne baakadimona dishindika. Kadi pashiishe, bu mwakaswabo kwitabuuja Koola ne: “Kudi mwa kwikala bakwabo bantu baa cijila. Kudi mwa kwikala *bikampanda*, *bikansanga*, ne *bikankenga*. Tudi ne cya kwikala peetu baa cijila, twêtù. Bikengela twènzè byônsò *ebi*. Cisamba cijima’s ncyà cijila.”

Nzambi kwambaye ne: “Tapuluka naabo. Dìsàkà kule ne mwaba awu.”

²²⁰ Mòsà kwambaye ne: “Bônsò badi ku luseke lwa Mukalenge abu, ndondaayi mêmè.” Ncyà bushuwa. Nwamonu anyi? Ki kukangulaYe anu buloba kadi kubamina. Nwamonu anyi?

²²¹ S’bavwa paabo anu bantu bîmpè, bôbô abu. Bushuwa’s, ki civwabo. Bavwa bantu bîmpè. Eyowa’s, mukalenge, kadi aci kacyakenza bwalu to. “Kî mbônsò badi bamba ne: ‘Mukalenge, Mukalenge’ to, kadi ng’ewu udi wenza diswa dya Taatù Wanyi.” “Kî ng’ewu udi ubanga to; ng’ewu udi ujikija.” Bwa aci, kakwena bya tujila twa bikoso to; udi uteekiibwa ku luseke ku ndekeelu kwa lubilu. Kî mbya tujila twa bikoso to. Udi ne cya kulonda njila anu udi Mufundu mwambe.

²²² PadiWu wamba ne: “Nyingalalaayi, ne batiijiibwayi mu Dîna dya Yesu Kilisto, ne nenupete kupà kwa Nyuma Mwîmpè,” kakwena kajila kaa cikoso to, dilabulangana dya ku cyanza, dikashaala mwena ekeleeziya anyi mwena dingumba to. Lwila wêwè anu Njila awu! Wêwè kuyi mufwe ku wêwè mwine, ne kuyi mulediibwe ku Nyuma wa Nzambi to, udi—udi—udi mujimine. Kwajiki. Kakwena bya tujila twa bikoso to.

²²³ Wêwè udi wamba ne: “Ee, ndi muntu wa ekeleeziya.” Ndi mumanye. Mbîmpè. “Ee, maamù wanyi. . .” Ncyèna ngeela aci mpatà to, kadi ûndi mêmè ngambila ewu ngwêwè. Wamonu anyi? Bikengela ulwile Njila awu, bwalu kakwena bya tujila twa bikoso to; neuteekiibwe ku luseke ku Cilumbulwidi. Lwila anu Njila umwepele awu.

²²⁴ Kudi Njila anu umwepele, ne Kilisto ki mwine Njila awu. Ne Kilisto n’Dîyi didi ne mwoyi munda mwebe adi, didi dikumbajà kantu ne kantu kônsò kaakalayaYe mu movù waku. Nwamonu anyi? Nudi bumvwe aci anyi? [Disangisha didi dyamba ne: “Amen.”—Muf.] Eyo. Monaayaaku mpindyewu.

225 Bamwe badi bamba ne: “Bantu aba’s mbîmpè.” Cya bushuwa. Ncyèna ngamba ne kî mbantu bîmpè to. Ncyèna ngamba ne Cecilia Munsantu ne bakwabo abu kabavwa bakaji bîmpè to; nansha wanyi maamu pende’s uvwa anu mwîmpè, kadi bulelela budi ne ncitu ntuma masambila kudiye to. Bushuwa’s. Bushuwa, nkaadi mumonemone bantu bîmpè bààbûngî, kadi kabeena banzambi bakaji to. Mbantu bakaji, bantu balume. “Kudi Mutwangaji anu umwepele pankaci paa Nzambi ne bantu.”

226 Kadi mbwa cinyi, mbwa cinyi budi muntu mufwanyine, muntu mumanyike wa munkaci mwa beena Mpenta, . . . mukanda awu wa nyungulukilu uvwa Mwaneetu duPlessis, mwaneetu wa mushinga mukole awu, mwendeshe. Pâmwâpa bamwe baa kunudi mbawupete. Musombe. . . Eyo, nudi bawupete. Mu Nsangilu wa Bukwântèndeleeleu, ku luseke lwa paapà, mwambe ne: “Bivwa bya nyuma be.” Aci’s ndijingulula dya nyuma’s, kî mmwômò anyi? “Kaa, Nyuma wa Mukalenge uvwa mwaba awu, bya nyuma be.” Eyo. Ki bwalu mbwôbù abu’s.

227 Bwa cinyi? Bwalu ki mpunga uvwaku bwa kusangisha beena Mishòònyì ne cyôci aci pamwe, citudi tulwisha kukaadi bidimu aci, ne Bible mucitwe nyama ku mikolo mutwâmbîle ne necilwe. Kadi wetu. . . umwe wa ku beetu balombodi baa batambe bunene umba ubwelamu, wamba ne: “Ncya bushuwa. Ki citudi twenza,” ne ekeleeziya wa Mishòònyì yônsò musanga ntete useeswishiibwa pende ku ciine aci.

228 Nenku anu menemene, bu nwênù mwa kutapa dîsù kuntwaku, EMU MMUDI MUKALENGÈ WAMBA. Cya kumpala, Dîyì dikaavwa dicyâmbè. Pashiishe Nyuma wa Mukalenge kwamba, mu cidimu cya 1933, mwine wâkamba bintu bikwabo byônsò ebi pa bidi bitangila matunga ne neabwele mu mvita awu, ne mushindu uvwa mashinyi mwa kwikalà, ne byônsò mushindu awu, mmwambe ne ki cyôci aci menemene civwa mwa kwenzeka ku nshiikidilu. Kadi’s ki cyôci eci. Kacituku cipangile to. Nenku’s ki twètù aba tucimona mudici cyenda cyangata mmwenekelu.

229 Nudi bavuluke diyiisha dyanyi pa *Ntèndeleeleu-Izàbèlâ* dya abidi adi panshi aa adi anyi? Nudi bavuluke muvwa Elisha wenda upweka ne njila mu dinda adi, bwa kubambila anyi? Bwa cyôci aci, mvwa muiishepu. Nwamonu anyi? Ne mushindu wûngâakadyànjlâ kwamba musangu awu ne cikondo necilwe ciikala Nsangilu wa Bukwântèndeleeleu ewu ndekeelu wa byônsò mwa kulwa cimanyinu cya nyama wa lwonji, bwalu uvwa mwa kудisanga ne nyama wa lwonji. S’ki kucyenzaye eku. Mu cikondo cyanyi, ndi mushaale ne mwoyi too ne ku dicimona. Nenku’s ki beena Mishòònyì aba, miliyô ne miliyô, baseeswishiibwa ku ciine aci. Bwa cinyi? Ki cidibo munkaci mwa kukeba.

²³⁰ Mbampofu! Yesu wakambila Bafaalesa abu ne: “Nwênu bampofu balombodi baa bampofu. Mpofo yêyè ulombola mfofo,” mwakambaYe, “bwônsò bwabo kabaakudishinda mu mukidi anyi?” Nenku’s mwômò amu ki mudibo badishinda. Mmuniyî mûmwàku mufwanyine kwitabuuja ne muntu uvwa mwimane naanyi ne mwakule naanyi, uvwaku mufwanyine kusòmba kadi kwamba dîyî bu dyôdi adi! Nwamonu’s: “N’Cisokoka, ku mêsù, kwa beena lungenyi ne a batalame, kadi uCibuulwila bânà bu mudi badi baswe kuyiila.”

²³¹ Ndi mumanye ne dîngà dituku cyôci aci necindombe mutu wanyi. Aci ncyà bushuwa. Necindombe mutu wanyi, kadi mwab’ewu Bulelela mbwebu munkaci mwa kumanyika. Uh-huh.

Wa kumpala bwa kufwila ndongamu wa
Nyuma Mwîmpè ewu,
Ûvwa n’Yone Mubatiiji, kadi kaakanyeema to;
wakafwa mûfwafwà muntu mulume;
Pashiishe kulwaku Mukalenge Yesu, bôbò
kuMupoopela pa nkuruse,
Wakayiisha ne Nyuma neasungile muntu ku
mpekaatu. (Ncyà bushuwa anyi?)

Pashiishe kwasabo Stefano mabwe, yêyè uvwa
uyiisha ulwishangana ne mpekaatu,
Kubafiikishaye munda bya dikema, mu
mushindu wa ne baakamutaayisha mutu;
Kadi wàkafwà mu Nyuma, kukuulaye mwoyi,
Ne wakaya kapetangana ne bakwabo, cilwilu
cya baakafila yabo myoyi aci.

Kudi Peetelo ne Pôlò, ne Yone wa Nzambi,
Baakalekela myoyi yabo bwa Evanjeeliyo
wamona mwa kukenka; (Cyakenzabo ncinyi?)
Bôbò baakasambakaja mashi abo, ne a
baprofeta baa kale,
Bwa Dîyî dilelela dya Nzambi dyambiibwe ne
meeji matooke ônsò.

Misuuka mwinshi mwa cyoshelu, yivwa yela
lubila ne: “Too ne ku dîbà kaayi?”
Bwa Mukalenge kunyooka bônsò badi benze
bibî;
Kadi nekwikale bakwabo bààbûngî baafila
mashi a mwoyi wabo (Eyo, ncyà bushuwa.)
Bwa Evanjeeliyo ewu wa Nyuma Mwîmpè ne
lukoka Lwende lukunze kunzuu alu.

Ûcidi anu mutungunuke ne kuzololoka mashi.

²³² Eyowa’s, neênzè nanku dîngà dituku, kadi mêmè ndi mwindile dîbà adi piikalaku kujikè.

233 Mwaneetu wa bakaji mukwabo mmufume ku dipeta ciloota. Yèyè kucintumina, kwamba ne: “Mémè kubamona, ekeleeziya awu mulongolole mushindu wa” kunshipa mémè, mu musokoko, musangu kampanda, pângiikalà nkaadi mpatuka mu mashinyi aanyi, anyi mbwela, kungaasa cingoma. . . Kadi yèyè ne: “Pa dibà adi Nyuma kwamba ne: ‘Kî ndibà edi to, kadi aci necilwe pashiishe.’” Uh-huh.

234 Nzambi kiitabiku bwa mémè kudya cibanga pa cintu nansha cimwe to. Ncyèna mumanye cintu nansha cimwe to pa kuumusha Yesu Kilisto ne Yèyè mupoopediibwe pa nkuruse. Tudi ne mwoyi mu dituku didi dikwacisha bwôwà. Mpekaatu ngudi mwenze cyôci eci. Eyo. Baa—baakaasa Stefano mabwe. Baakakosesha Yone mutu, mukaji awu ngwâkenza. Ncyèna mumanye mutwafila wetu twètù to, kadi necyenzeke dîngà dituku. Eyo, monaayi.

235 Mu Yone Munsantu, panwikala baswe Mufundu awu pa cyôci aci. Yone Munsantu 6.49, ki mwômò amu mwakadyabo manà, ne Yesu kwamba ne: “Kadi bôbò abu, muntu ne muntu, s’baakafwa.”

236 Wèwè udi wamba ne: “Ee, mwaneetu—mwaneetu wa bakaji, ntu—ntu mumone mukaji ewu uja maja mu Nyuma.” Kaa, eyowa. Uh-huh. “Ntu mbamona benza nanku. Nkaadiku mumumone wakula mu myakulu. Nkaadi mumumone. . .” Eyo.

237 Yesu wakamba ne: “Bààbûngì nebalwe Kùndi mu dituku adi, bamba ne: ‘Mémè’s nkaadiku mwenze bintu byônsò ebi.’” Nwamonu anyi? “Baakadya manà mu cipeela,” mwakamba Yesu, “kadi’s bôbò abu, muntu ne muntu, mbatapuluke Cyendeleele. Mbafwe.” Mmumwe ne mbye Cyendeleele. Baakabutukila anu mu cipeela amu mene.

238 Nudi bavuluke Ebelu nshapita mwi6: “Aba baakamanabo kumanyisha Bulelela musangu kampanda, kadi babenge bwa kwendelaMu, kakucyena kabidi kanyinganyinga bwabo bôbò to.” Nwamonu’s, mwena kwitabuuja wa ku mikal- . . . Padi Bulelela buleejiibwa kudi muntu bwa musangu wa ndekeelu, kadi yèyè ubenga kuBwakidila; bilondeshile Mukanda wa Ebelu, nwamonu’s, yèyè neikale. . . kakwena cintu nansha cimwepele pa buloba apa cidi mwa kumusungilaku to.

239 Kwende nkujike. Nî nkanyinganyinga, nî mbupikudi, kakucyena cintu nansha cimwe cidi cimushaadile to. Yèyè ukaadi mutapuluke Cyendeleele. Bible ngudi mwambe nanku: “Mbindile kapyà kadi kenza bwôwà ne ciiji cikole ciikalà mwa kudya mulwishi.” Nanku padi Bulelela bwa Evanjeeliyo bujaadikiibwe, bushindikiibwe kantu ne kantu, kadi pashiishe kukudimuka e kuumuka kuBushiya, kwende nkujike. Kwajiki. Ncibi be, kadi bikengela anu ncyâmbè’s.

240 Vulukaayi Banjelo bavwa kabayi balame ngiikadilu wabo wa kumpala abu, kadi bashiya muntwamu mu nzubu wa buloko

awu mu mîdimà, mùdi baa pa buloba biikale bendela leelu wa Ndaaya ewu mu bwine buloko bumwebumwe abu, kakuyi kanyinganyinga to.

241 Vulukaayi ne kukaadi ndambu wa bidimu, ngâkamba, pângâakafumà ku Chicago ne: “Anyi Amerike neacyâkidilè cidimu eci, anyi kaadyakucyakidilaku to nansha kakese.” Nudi numona kukaadiye muye anyi? Eyo.

242 Mpindyewu ndi ndikonka ní Nkokelu Mwisâtù ki udi mufwanyine kwikalaku ewu anyi? Éyi Nzambi wa yaaya, swaku bwa kaciikadiku aci to! Mbwa cyôci aci budi Nkokelu Mwisâtù ne cya kwikalaku anyi? Ncifwanyine kwikala aci anyi? Kaa, ekelekele! Elanganaayi meeji pa bwalu abu, balunda baanyi. Elanganaayi meeji pa bwalu abu; mêmè ncyèna muswe kukwelela meeji to.

243 Yesu wakamba ne: “Lubombo lwa mushindu ewu...” Nwênù baswe kufunda aci, Maataayi 23, ne mwandamutekete. Ndi—ndi mwambe mwab’ewu ne, “bala aci,” kadi nudi mwa kumona. “Nwênù Bafaalesa bampofu!” Lekelaayi. . .

244 Nudiku ne tusunsa ndambu cyanaana anyi? [Disangisha didi dyamba ne: “Amen.”—Muf.] Twânji kumona tûng. Tubuulaayi anu mwine mwaba awu, bwalu ndi mwambe ne “ucibale.” Kuvwa cintu kampanda mwaba awu cîmvwâ njinga kubala kumpala kwa . . . Mpindyewu pâmwâpa nênkosè cintu kampanda cikwabo, kadi twânji—twânji kwangataayi anu eci nunku bwa katanci kakese cyanaana. Maataayi 23, katanci kakese cyanaana, eyo, nenku netubangile ku mvensa wa 27. Anji teejeaayi mpindyewu. Nukabalaayi cintu cijima aci panwikala baalukile mu mênù, panwikala baswe. Anu ndambu mukwabo wa tusunsa cyanaana.

245 Mpindyewu tangilaayi apa. Maataayi 23, kubangila ku mvensa wa 27: “Dyakabi dyenu, nwênù bafundi!” Mpindyewu, vulukaayi ne, badiYe wambila aba mbantu baa cijila’s.

Dyakabi dyenu, nwênù bafundi ne nwênù Bafaalesa, beena lubombo! Bwalu nudi bu nkita milaaba lupemba lutooke (abu’s mbantu bafwe, nwamonu’s), nkita milaaba lupemba lutooke, yidi bushuwa yimweneka milenga pambelu, kadi munda miikale myûle tente ne mifuba ya bantu bafwe, ne bukooya bwa mishindu yônsò.

246 Lubombo ne nkuka ne makokyanganyi, munda mwabo amu; kadi pambelu ne: “Mêmè’s ki Docteur Kampanda.”

Nansha nanku pambelu nudi numweneka baakane kudi bantu, (tangilaayi Nsangilu wa Bukwântèndeleele ne beena Mpenta badi basômbe mwaba awu abu), kadi munda nudi bùle tente ne lubombo ne bubu.

247 Bubi ncinyi? Cintu cyûdi anu mumanye bîmpè ne ncyá bushuwa kadi kuyi muswe kucyenza to. Yesu, mpindyewu tangilaayi numone ne cidiYe. . .mmu lukongo kaayi mudiYe uteeka cyôci eci mpindyewu.

Dyakabi dyenu, nwênù bafundi ne nwênù Bafaalesa, beena lubombo! Bwalu nudi nwibaka majambu a baprofeta, ne nulengeja nkita ya baakane, . . .
(Nwamonu's: "Kaa, baprofeta!")

Biikale nwamba ne: Bu ne twêtù mbavwa mu miine matuku a baataatù beetu awu, nunku katwena balwe baabanyanganyi naabo baa mashi a baprofeta to.

248 "Nunku tudi biitabuuje Dîyi dya Mukalenge bu ne twêtù mbavwa ne mwoyi mwine musangu awu." Tangilaayi.

Bwa bwalu abu nudi bantemu baa cinudi nwênù biine, baa ne nwênù ki bânà baa biine baakashipa baprofeta abu.

Nanku ujaayaaku cipiminu cya baataatù beenu.

249 Aci's ncidi menemene munkaci mwa kwenzeka eci. Mpindyewu tangilaayi numone cidiYe wamba mwaba ewu.

Nwênù nyoka, ne lukongo lwa nyoka ya ntooka, mmunyi munudi mwa kupanduka ku dipiila dya mu iferno?

250 Mmunyi munudi mwa kupanduka? Mpindyewu badiYe wambila aba's mbambi, nwamonu's, s'ncyá bushuwa, bantu baa cijila. Mmunyi mùdi mwa kwimana ne mumanya ne Bible udi udyanjila kwamba ne wambila bantu abu bwa kabenji cyôci aci, kadi upeta mushindu wa kwimana ne kudya cibanga bwa tundambu twa ndola tubi twa dikema, tununka mupuuya mubole, bwa dimanyika kampanda, ne bwa muntu kwikalaye ukutuuta cyanza paanyima ne ukubiikila ne "Docteur"? Mmunyi mùdi mwa kwamba ne udi munange biine bantu abu?

Ndi nyiisha pa mikaba ya mêyi, kabidi. Nwamonu anyi?

251 Mmunyi munudi mwa kwamba, mmunyi munudi mwa kwamba ne nudi bamanye bantu abu, kadi nulekela cintu bu nanku cyenzeka? Nwamonu anyi? Nwênù—nwênù Bafaalesa, nwênù bampofo, nwênù nyoka, nwênù lukongo lwa nyoka ya ntooka, mmunyi munwapanduka ku dipiila dya mu iferno? Panudi. . . Mmunyi mudi muntu leelu ewu, mumanye ne bintu ebi mbibi, kadi kwimana pààpa bwa kulama disangisha dyende, bwa kudyundisha dingumba dyende, kadi upanga kwambila bakaji ne balume? Mmunyi muwapanduka ku ciiji cikole cya iferno, padibi ne civwa cikwenzela wêwê? Neupandukeku munyi? Nwamonu anyi?

252 Teelejaayi, teelejaayi mwaba ewu. Neciikale cinyi? "Ki bwa cinyi. . ." mvensa wa 34.

. . . monaayi, nēnnūtūmìnè baprofeta, . . .

253 “Nēnnūtūmìnè,” mu matuku acivwa alwa’s. Ki Bafaalesa beenu badi baalukila’s mbòbò abu. Nwamonu anyi?

. . . beena lungenyi, . . . bafundi: *ne bamwe baa kudibo nenubashipe ne nenubapoopele pa nkuruse; ne bakwabo baa kudibo nenubatuute mfinbu mu nsunàngòngà yenu, ne nenubakengeshe ku cimenga ne ku cimenga:*

254 Wakadyanjila kwamba muvwaYe mwa kubatumina baprofeta, biikale ne Dìyì dya Mukalenge. Kadi civwabo mwa kwenza ncinyi? Cintu cimwecimwe cyakenza baatatwābò aci, bwalu’s ki cinudi nwènù aba. Nwamonu’s, nyuma kayitu yifwa to. Bantu badi bakwaciibwe kudiya mbatu bafwa, kadi nyuma yôyi kayitu yifwa to. Yêyè wakamba ne: “Nwènù nudi bânà. Nudi bôbò abu.” Kadi tangilaayi anu mushindu udi bintu ebi.

255 Mushindu mwine wakimana Pòlò Munsantu mwaba wawa (nudi nwitabuuya ne yêyè uvwa muprofeta anyi?) ne wakapiishaye bakaji, bwa dibebula dyabo dya nsuki yabo; wakapiishaye malongolodi abo; wakambaye ne muntu yònsò uvwa kayi mubatiijiibwe mu Dînà dya Yesu Kilisto uvwa ne cya kulwa kubatiijiibwa cyakabidi. S’ncyā bushuwa.

256 Kadi leelu ewu bakaadi badya cibanga ne bacilaaba nsukaadi pambidi. Kabacyena bamanye dishiilangana to, nansha nanku. S’mbya luse’s. Piikalabi ne dîbà dikaadi dimane kujika, ndi mufwanyine kwamba nunku ewu, nwamonu’s: bavwa bampofu, badyanjila kulongolola bwa kwikalabo bampofu. Nzambi afweku luse. Kabavwa mwa kucimona to.

257 Yesu wakamba ne: “Nudi bampofu. Nwènù bafundi ne Bafaalesa bampofu aba, nwènù beena lubombo aba! Peenu’s nudi nubala Dìyì dimwedimwe didi bôbò bônsò abu babalebale adi, kadi mona munukaadi nulwa kumpiisha Mêmè. Kadi paanyi’s Ndi anu menemene civwa Dìyì dyambe ne neciikale mu dituku edi aci. S’bivwa bikengela bwa Mêmè kwikala Musanjeela mu dituku edi. Mêmè ewu’s ki Maasiya awu,” mwakambaYe, mu tuumêyi tucincika. “Mêmè ewu’s ki Maasiya awu. Ndi mupangile kucijaadika anyi? Mêmè nciyi mwenze cyakafundiibwa Bwanyi Mêmè, apu kaayi nuMpiishaayi. Kadi nwènù Bafaalesa bampofu aba nudi nulombola bantu beenu nukababweja mu cintu bu nanku awu, biikale nutumamu musumbà mujima.” Yêyè ne: “Ee, mpofu udi ulombola mpofu nende.” Yêyè ne: “Nudi . . .”

258 Wêwè ukaadiku mwambe ne: “Kaa, bu twêtù biikale ne mwoyi mu cikondo cya Pòlò Munsantu, eyo, nunku mêmè’s ndi mwangate luseke lwa Pòlò Munsantu.”

259 Beena lubombo naanyi nwê! Nwamonu anyi? Bwa cinyi kanuyi nwangata luseke lwa Dilongesha dyende? Nuvwa mwa kwikala benze cintu cimwecimwe aci musangu awu cinudi benze mpindyewu eci, bwalu nudi bânà baa baataatù beenu, baataatù

beenu baa cyena bulongolodi abu: Bafaalesa, Basadoka, ne badyeyemenyi abu. Ki—ki cyôci aci. Uh-huh. Nènnwàmbilè, kabidi—kabidi mu dîbà ditudi ne mwoyi edi, ndi ndikonka ne eci ncifwanyine kwikala Nkokelu Mwisâtù anyi? Indilaayi anu kakese mpindyewu, nwamonu's, Yesu wakamba ne: “Baa mushindu ewu badi bapeta dipiila ditambe bunene.” Nwamonu anyi? Kacyena cibi menemene anyi?

²⁶⁰ Muvwa mwena Amerike munene mukwabo, musangu kampanda, pakaavwa mwena lukuna pabwîpî ne kukwata ditunga edi, kuvwa muntu pa dîbà dya mundankulu, wakatupikila pa kabalu kende e kuyaye wenda upweka ne njila, wela lubila ne: “Mwena lukuna nyawu ulwee!” Uvwa m'Paul Revere.

²⁶¹ S'ndi paanyi mwena Amerike, mêmè. Ne ndi mubànde pa kabalu, pa dîbà edi dya mundankulu, nciyi ngamba ne mwena lukuna ulwalwa to, kadi ùkaadi apa! Kabyena ne ulwalwa to; ùkaadi mumane kwikala apa! Ùkaadi mumane kukwata ku bukookeshi. Ndi nciina ne nkwèpî kwikalaku kumane kujika; dikwata dya ku bukookeshi bwende, pa dîbà dya mundankulu edi.

²⁶² Vulukaayi ne, ku Tucson, Banjelo mwandamutekete abu, Mukenji awu uvwa ne: “Dijikija dya bwalu busokoka bwa Nzambi.” Dyakamwe paanyima paa cyôci aci, ngenda mpweka ne mulongo wa mikuna ayi. . .

²⁶³ Nwênù bônso nuvwa bumvwe bwa mikuna ayi. Monaayi. Mwaneetu Fred mmukwate ndambu wa fôtô yaci, ne Mwaneetu Tom. Ne mêmè ndiku ne yimwe ya ku fôtô ayi, yimwe ya ku films, ne byônso. Netubileje mwaba ewu dîngà dituku, kunuleeja anu menemene mwaba uvwaci. Nwênù bônso nudi bamanye bwalu abu.

²⁶⁴ Tangilaayi, nsongo isatu ya mikuna ayi. Yèyè wakamba ne: “Ki webe wa Kumpala, Mwibîdî, ne Mwisâtù.”

²⁶⁵ Ne Mwaneetu Fred mmukwate fôtô waci udi mutambe kwikala wa pabwende, dîbà divwabo bapite yèyè ne Mwaneetu wa bakaji Martha. Mavuba avwa mabànde afumina ku citaleela cya buloba, ne avwa majîke mikwabo yônso, nenku civwa cileeja anu Nkokelu Isatu ayi; umwe *apa*, umwe *apa*, ne umwe *pààpa*. Nwamonu anyi? Yôyi ayi mwandamutekete!

²⁶⁶ Tangilaayi, wa Kumpala, isatu. Isatu mbupwangane. Ki dîbà dyakapatuka mudimu wa bwambi awu ndyôdî adi.

²⁶⁷ Nkokelu Mwibîdî uvwa ndijingulula dya nyuma, ciprofeta. (Wa Kumpala uvwa ndyondopa dya babeedi.) Mwibîdî uvwa nciprofeta cyàkapâtukà, ne civwa cimanya bwalu busokome bwa mu meeji, paakamweneshiibwa Dîyi Dyôdî diine. Mbwena kwamba ne, ki ngàsà nyèyè awu.

268 Kadi, vulukaayi ne, cya mwandamutekete ki dijikija. Eci ncifwanyine kwikala Nkokelu wa dijikija anyi, byônsò byajiki anyi? Mbifwanyine kwikala nanku anyi? Elanganaayi meeji pa bwalu abu mpindyewu. Elanganaayi anu meeji cyanaana. Nukaadi penyi? Nwamonu anyi? Mwandamutekete utu misangu yônsò anu dijikija. Nkokelu Isatu!

269 Mudimu wa bwambi wa Yesu uvwa mu Nkokelu Isatu. Nukaavwaku bamanye nanku anyi? Monaayi! Nenku wikale ne meeji matooke, pawikalaku kacya ukaadi naawu mu nsòmbelu webe, mpindyewu bwa katanci kakese, tusunsa tukese.

270 Nkokelu Wende wa Kumpala uvwa ndyondopa dya babeedi. Wakalwa muntu mumanyiike bikole. Bantu bônsò bavwa baMwitabuuje, muvwabi bimweka. Ncya bushuwa anyi? PavwaYe wenda wondopa babeedi, muntu ne muntu uvwa muswe bwa Yêyè kulwa mu ekeleeziya wabo bôbò.

271 Kadi dîngà dituku Yêyè kukudimuka e kubanga kwamba ciprofeta, bwalu's Yêyè uvwa Dîyì, ne Yêyè nguvwa Muprofeta uvwa Mòsà mwambe awu. Kadi paakabangaYe kubambila, ubambila muvwa nsòmbelu yabo, ne bintu bivwabo benza, Yêyè kulwa kàciyi munangibwe to. Ki civwa Nkokelu Wende Mwibîdî ncyôci aci.

272 Ndi ndikonka's ní ncidileeje cyakabidi mu cimfwanyi? Anji elaayiku anu meeji kakese. Ncifwanyine kwikala aci anyi? Wa Kumpala, dyondopa, bantu bônsò. Mwibîdî: "Kaa, ncifwanyine kwikala mwena Yesu Nkaayende. Ncifwanyine kwikala Beezezebula, ncifwanyine kwikala mwena..." S'ki cintu cimwecimwe cyakenzabo kwaka aci. Nwamonu anyi? Nyuma yimweyimwe ayi miikale misòmbèle mu bantu baa mushindu umweumwe awu, bantu beediibwe mulawu kabaciyi mwa kusungidiibwaku kabidi to, bwalu bakaavwa bamana kupiisha anu kwine kwônsò aku; bôbò, bu muvwa Yudaasa Mpongoloki, mulela mwânà wa kabutu.

Wêwè udi wamba ne: "Yudaasa?" S'mbushuwa.

273 Vulukaayi ne, yêyè awu uvwa mutendeleedi wa dikema, kadi kavwa mwa kuya ne Mukenji too ne kundekeelu nansha. Úvwa mwa kwangata katupa kaawu, kadi cikwabo citupa cyawu yêyè kacivwa cikumbanangana ne wende muminu to. Bôbò badi mwa kwangata dyondopa ne bintu bya mushindu bu nanku, kadi pakaadibi bikafika ku ne Nzambi mmwambe dîyì nshindi mipatuke, apu kaayi aci nцитамbe kwikala cya ndondo bwabo bôbò. "Kacyena mwa kwenzekaku to!" S'ki civwa Yudaasa ncyôci aci. Wende nyuma udi mwa kwikala ne mwoyi anu too ne pa mwaba awu. Yêyè kèna mwa kuya naaci kupita apu to. Nwamonu anyi?

274 Bavwa mwa kwangata Mòsà ne mushinga paakakangulaye Mbù Mukunze, ne bikwabo mushindu awu. Kadi paakafikabi ku dibambila ne, kabavwa, kabivwa bikengela bwa bakwabo

baa kudibo kwenzabo *cikampanda* anyi *cikansanga*, anyi *cikankenga*: “Yèyè ukaadi udivwija Nzambi, kumutu kwetu twètù.” Nwamonu’s, kabavwa mwa kutwala aci to, Koola ne bakwabo abu. Pa nanku, bivwa bikengela kwikalabo ne bulongolodi, ki pa nanku Nzambi kumbà kubamina’s.

²⁷⁵ Mudimu wa bwambi wa Yesu, pavwaYe wondopa babeedi apu: “Yèyè’s uvwa ukemesha, Muprofeta nsongaalume wa mu Ngalela awu! Mona’s, Yèyè’s udi utabaja mpofo. M’Mubishe too ne bafwe. Twètù’s tudi naabo basatu bajima babiisha ku lufu. M’Mubiishe bafwe anu beetu baa cya bushuwa aba.”

²⁷⁶ Kadi dîngà dituku Yèyè kukudimuka, kwambaYe ne: “Nwênù lukongo lwa nyoka ya ntooka. Nudi nusukula pambidi paa dilongo. Numweneka bu ne nudi baa cijila, kadi munda mwenu, kanwena cîngà cintu to anu musumbà wa nyoka.” Kaa, paakapatuka ciprofeta aci, ciikale cipiisha bulongolodi abu, pa dîbà adi maalu kushintuluka’s. Bôbô kuMukudimukila. Ncya bushuwa. Ki ndekeelu wa byônsò, paakaMubengabo, bôbô kuMupoopela pa nkuruse.

²⁷⁷ Kadi kanwena mwa kushipa Mudimu wa bwambi to. Ûdi utungunuka anu ne kwikala ne mwoyi. Nudi mwa kulaadika musanjeela, kadi kanwena mwa kulaadika Mukenji to. Uh-huh. Cya bushuwa. Yèyè wakatungunuka ne kwikala ne mwoyi. Kadi monaayi paakalwa Nkokelu Mwisâtù wa mudimu Wende wa bwambi awu. Wa Kumpala uvwa ndyondopa dya babeedi.

²⁷⁸ Mwibîdî uvwa nditandisha dya malongolodi, ne dyamba dya ciprofeta; civwabo benze, civwabo, ne civwa mwa kulwa. Cidîku, cidîku, cyâlâwâ; ne civwâku, cidîku, ne ciikalâku aci. Ki cyakenzaYe ncyôci aci. Ncya bushuwa anyi?

²⁷⁹ Kadi Nkokelu Wende Mwisâtù mpaakayiishaYe bajimine bavwa kabaciyi mwa kusungidiibwa kabidi to. Bakaavwa mwinshi mwamwa muvwa mèsù manene, malaaba bilaabu awu asanganyibwa ne: “Uuh, uuh!” Wakayiisha misuuka yivwa mu iferno, yivwa kayiyi miitabe luse ayi, kadi yikaavwâ mitapuluke Cyendelele ne Bwikadi bwa Nzambi ayi. Kadi nansha nanku bivwa bikengela yôyi kucijingulula, civwaYe aci, bwalu ki cyakaMwenzà Nzambi mwômò amu.

²⁸⁰ Ndi ndikonka mudimu Wende wa bwambi ní udi wenda ùbànda mushindu umweumwe awu mu matuku a ndekeelu, mushindu uvwawu awu? “Anu bu mudi Taatù muntume Mêmè, nenku Mêmè paanyi ndi nnutuma. Byenzedi bìndî Mêmè ngenza nenùbyenzè peenu.”

²⁸¹ Bajimine, kabayiku mwa kusungidiibwa to. Bakaavwa babenge luse. Ki civwa Nkokelu Wende Mwisâtù ncyôci aci.

²⁸² Mpindyewu kudi lukonko anyi? Nkokelu Wende wa Kumpala, Uvwa wòndopa babeedi. Ncya bushuwa anyi? Mudimu Wende Mwibîdî wa bwambi, Uvwa ngwà kwamba ciprofeta.

Mudimu Wende Mwisâtù wa bwambi uvwa nkuyiisha kwa bavwa bajimine Cyendeleele. Mikuna isatu ayi, ne bikwabo; bajimine, Cyendeleele!

²⁸³ Mudimu wa bwambi wa Noa, midimu yônsò ya bwambi, mmyenze cintu cimwecimwe aci. Noa wakayiisha. Aci ncyà bushuwa menemene. Wâkabwela mu bwâtù. Nenku paakabwelaye mu bwâtù, kwakapita matuku mwandamutekete avwa cintu kacyi cyenzeke to. Bujaadiki bwende bwakayiisha bavwa beediibwe mulawu.

²⁸⁴ Sodoma ne Gomola! Yesu wakateela byônsò bibidi abi ne nebilwe. “Kumpala kwa dilwa dya Mwânà wa muntu, nebiikale anu mwakadi matuku a Noa, nebiikale anu mwakadibi mu matuku a Sodoma.” Wakateela Noa.

²⁸⁵ Noa wakapeta Nkokelu Isatu, ne Mwisâtù wende uvwa nkudi bajimine paanyima paa ciibi cimana kukanga. Bwalu, Nzambi wakashiya bwâtù kacya kwasômba mwaba awu, muvwa muntu nansha umwe kayi mwa kubwela anyi kupatuka to. Bakaavwa basanganyibwa munda. Bwalu, (bu pa mukuna wa mwandamutekete) mukuna wa mutambe kutumbuka awu, ki paakateekaYe bwâtù, mukuna. Nwamonu anyi? Ncyà bushuwa anyi?

²⁸⁶ Mu matuku a Sodoma, Nkokelu wa Kumpala uvwa mmwakane Lota awu. Ne Bible mmwambe ne: “Mpekaatu ya Sodoma yivwa yitacisha musuuka wende mwakane ku dituku ne ku dituku,” mushindu uvwa bakaji abu benza maalu ne bivwabo benze abi.

²⁸⁷ Nudi bavuluke: “Anu mwakadibi mu matuku a Noa.” Bavwa benza cinyi? “Badya, banwa, baselangana, basediibwa.” Bakaji, nwamonu’s, bakaji. Civwaku ncyini mu matuku a—Sodoma? Bakaji.

²⁸⁸ Ne mukenji wa Kumpala uvwa Lota. Baakamuseka ne kumwelulwila.

²⁸⁹ Pashiishe kutumabo baamusanjeela bakwabo, babidi, ki kupwekabo. Ki civwa Nkokelu Mwibîdî bwa Lota...bwa Sodoma.

²⁹⁰ Kadi tangilaayi Wâkaya wa ndekeelu awu, kudi luse lutamba kuvulangana anu kuvulangana. Byônsò byakajika musangu awu, byônsò bijike pa dîbà adi. Musanjeela mwisâtù wâkapwekamù awu, Nkokelu Mwisâtù awu, Yèyè uvwa cinyi? Mmudimu wa bwambi wa mushindu kaayi uvwaYe naawu? Wâkasômba ne basungula, ne wakabambila civwa cyènzekà paanyima Pende. Ncyà bushuwa anyi? Kadi paakabwelaYe mu Baabulona, anyi mu Sodoma, Yèyè uvwa muswe kupetamu. . .

²⁹¹ Nansha Abraham mwine, udila ne: “Kadi bu mêmè mwa kupetamu baakane makumi ataanu?” Wenda upweka too ne ku “baakane dikumi?”

Nzambi ne: “Eyo, petaaku biine baakane dikumi abu.”

²⁹² Lekela nkwambileku cintu kampanda, wêwè mwaneetu wa bakaji, katanci kakese cyanaana. Udi mufwanyine kwikala wa cyena kale, kadi mwikale ne cintu kampanda cidi bakaayôwa-wa-bayombò aba kabayi naaci to. Wêwè udi ne cintu kampanda cidiye yêyè awu kayiku mwa kupeta to. Cya bushuwa. Udi mufwanyine kwikala wa cyena kale mu webe mwiadilu, muwale bu inâbânzâ. Bôbô mbafwanyine kwamba ne: “Monaayi munsantu wa kale mubunguluki wa mu malaba wawa.” Kutacishi meeji to. Yêyè udi ne cintu kampanda cidi kaakaayôwa-wa-bayombò kaa kale aku, kâdî baa pa buloba bônso bakatangile pambelu pâapa aku, kakayiku naaci to. Kôkô kakeenaku mwa kucipeta to. Nkajimine, Cyendeleele. Nkeediibwe mulawu. Wamonu anyi? Kakeenaku. . . Wêwè udiku ne maalu mîmpè a mu nsômbelu; udi ne ngiikadilu mulenga. Kôkô aku kakeena ne cidiku naaci to nansha cimwe. Kôkô kadi ne cîshî cyela ku ndobo cidi cikwata misuuka mijimine mu buteyi bwa kuyikupa mu iferno. Mpofo udi ukabwelamu wenda wenda lwâ makàsâ. Kadi, wêwè udi ne cintu kampanda.

²⁹³ Udi mumanye, udi mufwanyine kwikala kuyi nansha mu mukanda wa mênâ wa ekeleeziya to, kadi nsômbelu webe mwakane awu ngudi mufwanyine kwikala ukanda ciiji cikole cya Nzambi bwa kulengaci baa pa buloba leelu ewu. Baa pa buloba kabaakuciitabuujâ to. Wêwè mukaji udibo babiikila ne mmunsantu mubunguluki wa mu malaba awu, wêwè mulume mukese udi kuyi ne cyûdî mumanye awu, kadi mwikale udidila Nzambi, muunya ne bufuku, bwa mpekaatu ya ditunga, s’udi mufwanyine kwikala ewu udi ukanda ciiji cikole aci. “Bu Mêmè mwa kubapetamu dikumi, Nêndekele musoko. Bu Mêmè mwa kubapetamu dikumi!” “Anu mwakadibi mu matuku a Sodoma, ki mwikalabi kabidi.” Nudi bamone cîndî muswe kwamba aci anyi?

²⁹⁴ Kî nne: “Bu Mêmè mwa kupetamu ba-Méthodistes dikumi, bu Mêmè mwa kupetamu ba-Baptistes dikumi, bu Mêmè mwa kupetamu beena Mpenta dikumi, bu Mêmè mwa kupetamu benji baa manayi a dipiiyangana dikumi, bu Mêmè mwa kupetamu baacîpwita-mûnwâmfwankâ bakulumpe dikumi, bu Mêmè mwa kupetamu bambi dikumi” to.

²⁹⁵ Kadi: “Bu Mêmè mwa kupetamu baakane dikumi!” Kudi Mwakane anu umwepele, ki Kilisto. Kilisto mwikale ne mwoyi mu Umwe, baa nanku dikumi, nwamonu’s: “Nêndekele musoko.”

²⁹⁶ Kadi Musanjeela wa ndekeelu awu wakayiisha bavwa beediibwe mulawu. Wêwè udi wamba. . . Yêyè wakapwekamu. Mufundu kawena wamba ne cyâkenzekâ ncinyi to, kadi kapyâ kaakaloka paakacyabu mu dinda, cya bushuwa, paanyima paa Yêyè mumane kwenza bimanyinu abi, dyakamwe paanyima paa

Yèyè mumane kwenza mudimu Wende wa bwambi wa ciprofeta awu. “Sarah waseki bwa cinyi?”

Yèyè ne: “Ncyèna museke bwala.”

Yèyè ne: “Eyowa, s’wâsekì.” Nwamonu anyi?

²⁹⁷ Mpindyewu, dyakamwe paanyima paa cyôci aci, Yèyè e kubwela mu Baabulona, anyi kupweka e kubwela mu Sodoma. Kaakabasanganaku to, pa nanku kapya kulokaku. Yèyè wakasangana Lota ne bânà bende baa bakaji babidi, e kwamba ne: “Patukaayi muneemu anu patudi twakulangana apa.” Nwamonu anyi? Cyôci kupatuka. Yèyè wakapwekamumu. Vulukaayi ne, Yèyè uvwa mu njila Wenda upwekamumu. Wakatuma baamusanjeela kumpala Kwende, kadi Yèyè wakapwekamumu Yèyè mwine, cya bushuwa, bwa kujandula ne cintu cyônsò eci mmuvwaci anyi. Kadi Wakasangana mwaba awu mûle tente ne cinyi? Bakaji ne bilaabu kwîsù. Mukenji kudi badi beediibwe mulawu. Bôbô abu baakenza cinyi? Baakaciseka.

²⁹⁸ Cidibo benza ncinyi leelu ewu? Cintu cimwecimwe aci. “Mémè ndi mwena Assemblées. Mémè ndi wa ba-Unitaires. Ndi—ndi. . . Nkaadiku muje maja mu Nyuma. Butumbi kudi Nzambi, ntu ngaakula mu. . .” Eyo, tungunuka nda wêwè anu kumpala. “Mémè nêngîikalè nkosa nsuki yanyi pândi muswe kukosa. Nêngênzè *cikampanda*. Mémè nèn—nêngâmbè anu *cikansanga*. Kabyena bikengela bwa mémè kubatiijibwa mu Dînà dya Yesu to. Cidi cyambiibwe aci ncyèna—ncyèna naaci bwalu to. Pôlò awu’s mmukinyi wa bânà bakaji wa kwônsò eku, twamb’eku twamb’eku. Aci’s. . .” Eyo, tungunuka nda wêwè anu kumpala.

²⁹⁹ Dimwe dya ku matuku adi panshi aa, pawikala kuyi mwanji kucyenza to, wêwè’s neusambuke mukalu awu. Kwadyakujingaku kabidi bwa kwenza cidi cyakane to. Uvwa muumvwe cîmvwà mwambe aci anyi? Aci’s ncishimbi-dîyi. Mwaneetu wa balume, mwaneetu wa bakaji, udiku mumanye cidi cyambiibwe aci anyi? Wêwè neusambuke mukalu awu, ne kwadyakujingaku kabidi kucyenza to. Neutungunuke anu ne kuteeleja Evanjeeliyo, cya bushuwa, kadi kwadyakuMwitabaku to. Kwèna mwa kuMwitabaku to. Kadi Evanjeeliyo neikale uyiishiibwa kudi badi beediibwe mulawu, aba badi bajimine Cyendeleele, kabaciyi mwa kusungidiibwa to, cyakabidi nkwadi. Wêwè ukaadi mumane kwikala peebe mu mwine mwaba awu, kadi kuyi mucimanye to. Udi wela meeji mûdi mu nsômbelu wa bisankasanka, kadi mufwe paudi ne mwoyi apu.

³⁰⁰ Kaa, teeleja. Bônsò baakabenga Mukenji wa cikondo abu, kumpala kwa kabutu, Evanjeeliyo wakanji kuyiishiibwa kudi bavwa beediibwe mulawu, dyambedi, kumpala kwa kuyabo; kakuciyi luse to. Noa, mukangila munda, civwa mbujaadiki. Nzambi ngwâkakànga ciibi aci, paanyima paa Nkokelu wende Mwisâtù. Paanyima paa Nkokelu Mwisâtù

mu Sodoma, biibi byakakangiibwa. Kakucivwa kabidi luse to. Dikumi abu kabavwa mwa kupeteka to. Nenu bajimine abu baakayiishiibwa Evanjeeliyo, bavwa kabayi mwa kusungidiibwa abu, bwalu civwa anu. . . Bivwa anu mushindu awu mu cikondo cyônsò, cikondo cyônsò citu cibenga Mukenji kumpala kwa dilumbulwisha.

³⁰¹ Mbacyènzè kabidi anyi? Nki bwa cinyi dimweneka mu Dikunji dya Kapya dya kwinshi ku musulu eku adi anyi? Nki bwa cinyi dimweneka mu Mukenji wa dizengela dya bakaji panshi ewu, ne diteeka dya bintu pa kaaba kaabi kadi kakengela, ne ditandisha dya bambi badi baditeeka ku luseke lwa dingumba pamutu paa kushaala biimanyine pa Diyì abu anyi? Paabi, Nzambi mmushindike anu mu kantu ne kantu ne n'Yèyè, ne kî ncinyonga kampanda cidi kaciyi cilonge kalaasa bu muntu eci to. N'Nzambi! Nenu tukaadi mpindyewu bafike pa mwaba udi Nkokelu Mwisâtù mufwanyine kwalukila cyakabidi kudi bajimine Cyendelele, anyi?

³⁰² Kî civwa cikeena-kumona aci cimpèeshila, pâncivwà mwànà mutekete menemene kuntu kwaka apu anyi? Kî mèmè kuya ku Wesete, nenu ki Nkuruse wa ngòlò wa Evanjeeliyo wawa utuma nsesa panshi, mwambe cimanyinu cya mu Dyulu, anu mu cyôci menemene. Vulukaayi ne, nkuruse awu uvwa mu mmwenekelu wa kacya anu waya, mwenze bu—mwenze bu cipaapu cya musaka, kabidi, ciibaka. Nwamonu anyi? Ncifwanyine kwikala citupa cya kumutu kudîci cijikile, cibangile *apa* ne cikafikile ku mutu anyi?

³⁰³ Bu mudi cipaapu cya musaka, cibànda cipicila mu Luther, Wesley, Mpenta, ne pashiishe dyasa dya mùsongà ku dibwe. Ncifwanyine kwikala cyôci aci anyi? Piikalabi ne ncyôci aci, tukaadi penyi? Cyôci aci, neidi eci cifwanyine kwikala. Ndi ntekemena ne kî ncyôci to, kadi's cyôci cidi ne cya kufika. Neciikale. Vulukaayi anu ne, bikengela bwa midimu ya bwambi ayi, yinwangane misangu yônsò mushindu anu umweumwe awu, ne mukwabo awu. Bikengela awu ulwe. Ne Nzambi katu ushintuluka to. Elanganaayi meeji pa bwalu abu!

³⁰⁴ Suma kondo keebe kaa mwoyi aku ne mènù ebe a nyuma, kadi ujandule ne tukaadi penyi. Kadi bu ne ncyôci, peebe mucikàle anu mushindu wùdì awu? Nenu's mbipiciibwe ne wèwè mwende. . . Kwebe's nkujike, nwènù badi pambelu abu. Paanyima paa Mukanda bamane kuwangata kudi Mwànà wa mukooko, Citampi Ciisambombo ncibuulula ne Bitampi byônsò, nkujike. Nkufwanyine kwikala kujikè. Ndi ntekemena ne kî mmwômò to. S'mbifwanyine kwikala nanku. Eyo.

Mpindyewu, mbwa nanku budi Nkokelu Mwisâtù ewu mutambe kunenga nunku anyi?

³⁰⁵ Monaayi ne, Nkokelu wa Kumpala ne Nkokelu Mwibîdi mmiye kuumukila ku ewu kuya ku mukwabo. Ngâkadyànjila

kwamba, nudi bavuluke, pãncivwà mbangilaku apu, mu wa Kumpala amu. Ki mèmè kwamba ne: “Nekulwe cikondo ciikalàCi mene mwa kumanya maalu masokome a mu mwoyi.” Nudi bavuluke anyi? Mbanganyi? Mona’s, nwènù bõnsò s’nudi bavuluke cyôci aci, mu masangisha aanyi a eku ne eku. Ki diloolo kampanda ndi mwenze anu mbwela mu Regina, kuntu kwaka, ki mèmè kubanda pa cibumba cya ku cyambilu; ne Mwaneetu Baxter wawa, bantu binunu ne binunu. Ki muntu kampanda kubandayè pa cibumba cya ku cyambilu apu, [Mwaneetu Branham udi utuuta cishonto musangu umwe—Muf.] kadi ki cyôci aci’s. Nenku kubangila anu mwaba awu cikaadi anu cimwecimwe aci.

³⁰⁶ Kadi kukaadi bidimu kũnkaadi muumuke mu budimi bwa bwambi, bidimu binaayi, bu bitaanu nanku kacya nkuumuka. Ncinyi ciine aci? Ncinyi cidi cyenze cyôci eci? Ki bwa cinyi bivwa bu ku cibangidilu, mu Genese ne: “Mwoyi mule wa Nzambi” anyi?

³⁰⁷ Vulukaayi ne, paakafukaYe dyulu ne buloba, mu dituku dya mwandamutekete Yèyè kaakafuka cintu nansha cimwe to. Yèyè wakiikisha. Nwamonu anyi? Nzambi uvwa ne mwoyi mule mu cidimu ciisambombo aci, kayi muswe ne muntu nansha umwe afwe to, kadi bwa bõnsò bafike ku kanyinganyinga. Nzambi uvwa ne mwoyi mule.

³⁰⁸ Cyakabidi, kabidi, mu Genese 15.16, panwikala baswe kucifunda, 16, 15. Yèyè wakambila Abraham ne: “Mwamwa mu buloba bwa beena Amola, bubu bwabo,” mpindyewu bõbò abu’s bavwa baa Bisamba bya bende. “Ncyèna mwa kukufikishamu mpindyewu ewu to, bwalu bubu bwa beena Amola, baa Bisamba bya bende abu, kî mbwanji kuula tente to. Kadi Mèmè nèmbàlumbulwishè. Nèndwe mu lukongo lwinàyi amu, kadi pa dîbà adi Nèndumbulwishè ditunga adi ne dikombo dya cyamu.” Neyu bushuwa anyi?

³⁰⁹ Kukaadi mukùngùlù mule menemene, kùdi mwoyi mule wa Nzambi, mudimu wa bwambi kacya anu wamonangana, ku mikaba ya mèyè ne bikwabo byõnsò, mukebulule mu buloba bujima, bwa kumona ní kucidiku kabidi mukwabo nansha umwe anyi? Kadi pãmwapã mwine wa ndekeelu awu nèmmufume ku dibwela matuku adi pansha aa’s. Civwa mbubi bukaadi—bukaadi bwenze munèngànèngà anyi? Piikalabi ne Yesu udi umwèumwè awu, bwalu ncidiYe, Ebelu 13.8, Mukenji Wende’s udi ne cya kwikala umweumwe awu. (Nkaadi ndilongolola bwa kujikija.) Cyenzedi Cyende cidi ne cya kwikala anu cimwecimwe aci.

³¹⁰ Piikalabi ne Nkokelu wa Kumpala ne Mwibîdi kî nya kwela mpatà to! Kudiku mpatà kampanda mu meeji enu amu pa bidi bitangila Nkokelu wa Kumpala ne Mwibîdi anyi? Mbyenzeke menemene anu mwàkabyàmbàYe anyi? [Disangisha

didi dyamba ne: “Amen.”—Muf.] Kadi mbwa cinyi kwela mpatà bwa Mwisâtù? Nwamonu anyi? Bwa cinyi bunudi baswe kuMwela mpatà? Ibidi ya kumpala ayi’s mmishindikiibwe ku Mifundu. Nyawu ngánùjaadikìdì mu dinda emu ne Mwisâtù mmushindikiibwe ku Mifundu, yèyè pende.

³¹¹ Tapaayi dîsù pa buloba, monaayi ne bukaadi penyi. Tangilaayi numone mudibo babenge Bulelela, ne mudi cyôci aci cishindikiibwe anu pyòpyopyò, pa bidi bitangila ciprofeta. Mpindyewu tukaadi penyi? Éyi Nzambi, wâfwakù luse’s we! Aci’s cidi cizanyisha mashi mu mwoyi wanyi wa munda. Kadi bishi bwa cyôci aci? Tukaadi penyi?

³¹² Vulukaayi ne, nsongo eyi ya mikuna mwandamutekete kuntu kwaka yaya, cyôci aci nci cifwanyine kunwambila bwalu. S’cidi. . . Kakwena lusongo lukwabo lwa mukuna paudi upita cyôci aci to. Cidi mu Mulongo wa Mikuna ya mabwe. Cidi ciya buludi cikabwela too ne mu cipeela, kubangila piine apu. Cyendelele cidi cibanga. Nsongo ya mikuna mwandamutekete, anu mu Mulongo wa Mikuna ya mabwe menemene. Aci cidi menemene anu pankaci paa bulelela ne mashimi. Ne kundekeelu kwa aci, Nkokelu Mwisâtù nguvwa Nkokelu wa ndekeelu wa mu mulongo wa mikuna ayi. Ncya bushuwa anyi? Nwamonu anyi? Eyo.

³¹³ Noa wakabwela munda, pashiishe paanyima paa matuku mwandamutekete, cintu nansha cimwe kacyakenzeka to, nwamonu’s. Mu matuku mwandamutekete dinyooka kulwadi. Bìikalapù nanshà ne. . . Teelejaayaaku mpindyewu, bwa kujikija. Bìikalapù nanshà ne, mu cikondo cya Noa, bôbò bavwaku bamanye cimanyinu aci! Bìikalapù nanshà bamanye’s we! Mpindyewu nkaadi njikija. Bìikalapù nanshà bamanye cimanyinu aci, baa pa buloba mu diine dituku adi! Ne, Nzambi mmujaadike mwab’ewu, ku dibala dya Mufundu, katanci aka ne, Yèyè wakabutula bantu abu.

³¹⁴ Kî nne kakuvwa luse to; luse lwakatumiibwa kudibo kudi muprofeta. Kabaakaswa kulwitabuujja to. Nzambi utu mwena luse, kadi, Yèyè wakatuma luse kadi bôbò kabaakaswa kulwakidila to. Yèyè utu misangu yônsò anu utuma luse, dyambedi.

³¹⁵ Ambaayi tũng bu bôbò bamanye ne cimanyinu aci civwa ncimanyinu cya cikondo cya nshiikidilu? Kadi mbenze anu bamona, dyakamwe, lupandu paalu lumba luumuka. Muntu nansha umwe, nwamonu’s. Mbyenze anu, katanci aka, ciibi cyumba cikangiibwa. Bu bôbò. . . Kuvwa muntu anu umwepele cyanaana wâkamanya cimanyinu aci, uvwa n’Noa ne kasumbu kende. Ki umwepele wâkamanya. Paakadikanga ciibi aci, Noa wakacimanya. Noa wakamanya ne ki dijikija ndyôdi adi. Wakacimanya. Ncya bushuwa. Nwìikalapù nanshà mwa kumanya cimanyinu’s we!

316 Kaa, bìikalapù nanshà bamanye cimanyinu aci, paakamonabo Yèyè ewu ubwela, wa bwena uvwa ne Abraham kuntu kwaka awu!

317 Bìikalapù nanshà bamanye ne Billy Graham wa cyena leelu wa mu dituku adi awu, nyèyè wâkapweka kuntu kwaka awu, yèyè ne Oral Roberts, ne baakayiisha bantu bafofomija abu mukenji awu! Bìikalapù nanshà bamanye, ba-Méthodistes ne ba-Baptistes baakane baa kale baba ne civwa ncimanyinu kudibo mu dituku adi, Lota, pavwa mpekaatu yitacisha misuuka yabo bôbò miine ayi. Kadi ba-Méthodistes ne ba-Baptistes abu baakakudimuka e kushaala cinyi? Anu mwakenza Lota, cintu cimwecimwe aci. Kadi mwakane awu, mu mwaba awu, wakapatuka. Bushuwa's.

318 Äpu nî mpaakapweka Billy Granham apu? Biikale baya bwa kwangata dipangadika, benda bacyankunya bâzòkà, batuutangana tuubintu, baseka, ne nsuki mibebula, kwîsù kulaaba bilaabu, kadi kabayiku benza cintu nansha cimwe pa bwalu abu. Baalukila dituku didi dilonda, nenku Billy kwamba ne: "Ndi mpeta binunu makumi asatu; dya ngaalukila mu cidimu cimwe, nciyiku mwa kubapeta nansha makumi asatu to."

319 "Kaa, s'ngängàci dipangadika's. Ncya—ncya—ncyakuya mu iferno to; nènye mu Dyulu, wamonu's," wenda wendela anu mu mpekaatu pa yôyi. Bìikalapù nanshà . . .

320 Paabi pa dîbà diine adi Evanjeeliyo mwikale uyiishiibwa mu Bukole's, ne bimanyinu ne maalu a kukema, ne Dikunji dya Kapyra kumutu kwa byôbì abi, ne bintu byônsò biikale byenzeka anu mu byôbì menemene, biine abi bidyanjila kwamba ne biteeka patooke. Bìikalapù nanshà . . . Baakamba ne: "Musumbà wa bansantu babunguluki baa mu malaba aba. Cintu's ndubuku. S'nyuma wa mushindu kampanda wa bampàkààmàng'às. S'ndémon, s'ki cyônsò cidiCi ncyôci aci. KanùCitàbùùjiku to. Kacitu mu bulongolodi bwetu twétù to. Katwena bwalu ne Cyôci aci to." Bìikalapù nanshà bamanye cimanyinu's we! Bìikalapù nanshà bamanye!

321 Yesu wakamba, ne: "Wikalapù nanshà mumanye dituku dyebe, Yelusalema. Wìikalapù nanshà mujingulule! Kadi," ne, "bwa mpindyewu kaayi wadishaadidi kwòkò." Nwamonu anyi? "Wikalapù nanshà mumanye. Wèwè Yelusalema, Yelusalema, mmisangu bûngì munyi yínkaadiku Mèmè ewu muswe kukukungwija, mushindu udi nzoolo ukungwija twânà twende, bwa kukulama ku manyooka adi ne cya kulwa! Kadi wèwè kwakamanya dituku dyebe to." "Wèwè wâkaasa baprofeta mabwe, ne wâkashipa baakane, wìikalapù nanshà mumanye dituku dyebe! Wìikalapù nanshà mumanye, ne mwikale mumanye Mufundu webe, ne mumanye ne dilwa Dyanyi divwa ncimanyinu cya ndekeelu webe. Mpindyewu udi mpofo. Mpindyewu watandishiibu. Cikondo cyebe cyätù ku ntengu."

S'cyakatwa ku ntengu. S'ncya bushuwa. “Wikalapù nansà mumanye cikondo!”

³²² Tangilaayi, paakamba Yesu dìyì adi, baa pa buloba baakaya anu batungunuke. Nwamonu anyi? Baa pa buloba baakaya anu batungunuke, anu mwabo ne kale. Bwa cinyi? Bwalu kabaakamanya dîbà dyabo to.

³²³ Baa pa buloba baakaya anu batungunuke, paakabwela Noa mu bwâtù. Baa pa buloba baakatungunuka anu nanku. Baseki, mu dituku adi, bavwa anu benza maafesto a dyenda dya masandi. Bavwa anu badya, banwa, baselangana, benza bintu bidibo benza leelu ewu ebi. Anu menemene, anu mwabo ne kale. “Ha-ha! Munsantu mubunguluki wa mu malaba wawa wákàngi ciibi's. Mpindyewu, kacyakacya nwênù aba ku bafwe ne ku bàbolà nukaadiku bumvwe cintu bu nanku anyi? Ha-ha! Nudi bamanye cidiye wamba? Twêtù bônso aba 'netufwe mu mâyì.' Macimbu's we! Mâyì miine awu adi kwèpi's?”

³²⁴ Baseki, mu matuku a Noa. “Ki mwikalabi kabidi ku dilwa dya Mwânà wa muntu.” Eyo. Noa wakamanya cimanyinu. Cintu cimwecimwe aci mu matuku a Lota. Bintu bimwebimwe abi mu matuku a Yesu. Ki mudibi kabidi leelu ewu's. Badi baseka bwa musangu wabo wa ndekeelu. . . ? . . .

³²⁵ Bya mwomumwe ne mu Sodoma, kabaakamanyaku to. Pavwa Musanjeela awu mwimane pààpa, Mukenji wa kudi Nzambi, baakabaseka anu cyanaana ne baakakeba bwa kubanyanga ku byenzedi byabo bôbò abi. Ncya bushuwa anyi? “Bwela udivwije wa kutudi. Ikala umwe wetu.” Ncya bushuwa anyi? “Bwela udivwije wa kutudi, ikala umwe wetu. Newikale umwe wa ku bansongaalume aba. Lwâku's, divwije umwe wa kutudi.” Nwamonu anyi? Kabaakamanyaku cimanyinu cyabo to.

³²⁶ Kabaakamanya ne pavwa Mukenji awu wambiiwba apu, ne ciine. . . Kabavwa mwa kucimona to, ne kapyà ne ciiji cikole cya dinyooka, cya Nzambi, ndimi ya kapyà kaa soufre yivwa mibange kuteema mu maulu to. Kabavwa mwa kukamonaku to. Baamusanjeela bôbò bavwa mwa kukamona. Uh-huh. Lota uvwa mukamanye, yèyè pende. Ûvwa mumanye ne kavwamu. Cya bushuwa.

³²⁷ Bya mwomumwe ne leelu ewu, anu cintu cimwecimwe aci. Ciiji cikole cidi munkaci mwa kuteema, bombes ya mushinda mmilebelele, bintu byônso bikaadi ku nshiikidilu. Mbya mwomumwe mpindyewu.

³²⁸ Tangilaayi, nwênù, teejeaayi. Nutu bamanyeku ne. . . Nudi nwamba ne: “Mwaneetu Branham, kaa, kadi bishi bwa byônso ebi?” Nudi bamanye's, bantu badi mwa kutungunuka anu ne kuyiisha Evanjeeliyo anu mwabo ne kale, cidibo babiikila ne ng'Evanjeeliyo aci, s'nkufwanyine kwikala kumane kujika. Baakenza nanku mu matuku a Noa. Baakenza nanku mu matuku a Lota. Baakenza nanku mu matuku a Yesu. Ncya bushuwa anyi?

329 Nansha beena Yuda, paanyima paa Yesu mubãmbile ne ciji cikole. . . “Bwenu mbutuuke. Kwenu nkumane kujika. Kakucyena kabidi cintu to. Kwenu nkumane kujika.”

330 “Kaa,” mwakamba awu, “munsantu mubunguluki wa mu malaba wawa. Mmu cilongelu kaayi mudiYe mujikijile? M’Mufumine penyi, mwine wawa?”

331 Vulukaayi ne, Yêyê ukaavwa pa dîbà adi mudikumbaje bwa Nkokelu Wende Mwisâtù. Uh-huh. Ncya bushuwa. KwambaYe ne: “Mmisangu bûngì kaayi yínkaadiku Mêmè ewu muswe kukukungwija!”

332 Lota wakenza dibiikila dyende dya ndekeelu. . . anyi, ndi nswa kwamba ne, Mwanjelo ngwãkenza, musanjeela, nansha Yêyê mwikale nganyi. Nzambi muleejibwe bwa dituku edi, Nzambi muleejibwe mu mubidi wa buntu, mwenze cimanyinu cya ndekeelu, mwenze mudimu wa ndekeelu. Byôsò byakajika pa dîbà adi.

333 Noa wakayiisha diyiisha dyende dya ndekeelu; ciibi cyakakangiibwa paanyima pende. Kwakajika. Kucisekabo, ne kucyelulwilabo.

334 Elaayi meeji, bantu badi anu mwa kutungunuka ne kuyiisha! Nsangilu wa Bukwãntèndeleele udi mwa kudisanga ne ekeleeziya wa Katolike, anu mudibo balaye ne nebënzè amu. Malongolodi ônsò adi mwa kulwa, kadi cimanyinu cya nyama wa lwonji cikaadiku. Badi bacyangata, mu cyôci aci. Nwamonu anyi? Kadi badi bamba ne: “Kaa, aleluuyah, Nzambi abeneshiibwe, s’nkusungidiibwe bantu bûngì kampanda maalaba diloolo.” Bushuwa anyi? “Mbaje maja mu Nyuma. Mbaakule mu myakulu.” Aci kacyna cyumvwija cintu nansha cimwe to. Nwamonu anyi? “Kaa, mbapole ne baa musangeelu ne badipwekeshe. Eyowa’s, mukalenge. Badi ne mamuma a Nyuma.” Cimanyinu kí ng’aci to. Nansha kakese.

335 Indilaayi nnupe mamuma a Nyuma, pankaci paa Yesu ne Bafaalesa, bwa numone ne uvwa ne mamamu a Nyuma ki nganyi. Kadi bu mêmè mwa kujuuka, bu mûnkaavwà mubange kwamba katanci aka amu, kwangata luseke lubengangane ne lwa Kilisto mpindyewu bwa katanci kakese aka? Nzambi amfwileku luse anu bwa kwamba menci kwa ciine aci aku, nwamonu’s, kadi bidi anu mbwa kunuleeja cintu kampanda.

336 Kadi bu mêmè mwa kulwa kunudi kadi kwamba ne: “Ambaayibi tûng, nwênù disangisha, wenu mulunda nganyi? Udi uleeja mamuma a Nyuma nganyi? S’mmwakwidi wenu wa kale wa musangeelu awu. Utu ulwa kûdì mu lupitaadi paudi usaama nganyi? S’mmwakwidi wenu wa kale wa musangeelu awu. S’ncya bushuwa. Nganyi utu misangu yôsò ùkusombesha mfranga paudi muyipangile, padi maalu makufimpakaje? Nwênù bidimba bya disangisha dyende aba, kanutuku nuya kudi mwakwidi wenu wa kale wa musangeelu awu ùsombesha

mfranga anyi? Nwamonu anyi? Nganyi utu misangu yònsò anu wa dinanga ne wa musangeelu, mwikale uleeja mamuma a Nyuma? S'mmwakwidi wenu wa kale wa musangeelu awu.

³³⁷ “Utu mulonge bidimu ne bidimu nganyi, mu nsunàngòngà eyi, mwakapatukilabo kudi tatwèndè wa tatwèndè wa tatwèndè wa tatwèndè wa tatwèndè wa tatwèndè, too ne kwìnshi? Nganyi utu mulonge ne mupete. . .mwenze mudimu mukole bwa kupeta mapolome a bu-docteur a PhD ne a LLD, bwa kumanya Dìyì edi, ne kwimana mwaba ewu ne kunuyiishadi mu dinda dya dyalumingu dyònsò mu disangisha dyende? S'mmwakwidi wenu wa kale wa musangeelu awu.

³³⁸ “Muntu mupidye diitabuuja ewu ki nganyi pende's, udibo babiikila ne, 'Yesu' ewu? Mmujikijile Yèyè mwine mu cilongelu kaayi? Mmupatukile Yèyè mu cilongelu kaayi? Kende karta kaa buumambala kadi penyi? Yèyè mwine ngwa mu bulongolodi kaayi?

³³⁹ “Yèyè mwine utu wenzaku cinyi panudi ne makokyanganyi a mu famiye? Utu ulwa kunudi nganyi? S'mmwakwidi wenu wa kale wa musangeelu awu, bwa kuteeta. . .Wèwè ne makokyanganyi ne mwena mutumba neebe mwaba ewu, mwakwidi wenu wa kale wa musangeelu awu's ngudi ulwa ùnùsùnga. Wàmba ne: 'Nwènù bònsò aba's nudi bàna baa Nzambi. Kì mbìmpè nwènù kwenza nanku nansha.' Aci ki cituye. . .

³⁴⁰ “Kadi Yesu wa mu Nazaleeta ewu udi wenza cinyi? Udi ubinyanga's. Ùdi Yèyè wenza cinyi? Wàmba bulongolodi bwenu mambavi bantu bitangile. Ùdi Yèyè wenza cinyi? Mmujuuke e kubiikila mwakwidi wenu ne 'mpofo mulombodi wa bampopo.' Mumubiikile ne 'nyoka mu bisoosa.' Mmujuuke kwangata mulambu uvwa Nzambi mulombe awu, kadi kutonkola meesa ne miseba, kwimansha mfranga pambelu, kadi kubatangila ne cijji. Kacyakacya nukaadiku bamone mwakwidi wenu awu mutangilangane mushindu awu anyi?" Mpindyewu mamuma a nyuma mwaba awu adi penyi? Uh-huh. Uh-huh.

³⁴¹ Kì nku dyakula dya mu myakulu to. Kì nku dija dya maja mu Nyuma to. Kì nku didivwija mwena ekeleeziya to. Kì nku mamuma a Nyuma to; beena Science Chrétienne's badi mwa kutamba yònsò wa kunudi ku cyôci aci, nwamonu's, kadi kuvila mene ne Yesu Kilisto kavwa Nzambi. Kì ng'aci nansha.

³⁴² Kadi n'Dìyì, diikale ne mwoyi! Ki cyôci aci. Biikalapù nanshà batangile, Yèyè's ki uvwa Maasiya. Yèyè uvwa Dìyì diikale ne mwoyi, dimweneshiibwe.

³⁴³ Nenku mulume udi ne Nyuma wa Nzambi munda mwende, anyi mukaji, udi ne nsòmbelu wa Dìyì adi, didi ne mwoyi munda mwende. Ki dituuta dya mwoyi ndyôdi adi, badyànjila kulongolola, bwalu Dìyì dya Mukalenge didi dilwa kudibo, ne bóbò badi Dìyì kudi bantu. “Mikanda mifundilangana mibala

kudi bantu bônso.” Ncya bushuwa anyi? Nkokelu Mwisâtù mmufwanyine kwikala mumanè kubanga anyi?

³⁴⁴ Nwênù badi pa mikaba ya mêtì, nnwênù badi bateeleja mukaba ewu abu, mvwa mwa kujinga bwa nwênù kwikala batapeku dîsù bamone disangisha edi pa dîbà edi. Uh-huh. Ndi ntekemena ne nudi peenu nudyumvwa mushindu umweumwe ewu.

³⁴⁵ Àpu nî nyèyè ukaadiku ewu? Tangilaayi Mifundu mudiyi myungwija mushiki mwaba ewu. Mmufwanyine kwikala ukaadi mubange anyi? Nkokelu Mwisâtù mbwa kuyiisha badi beediibwe mulawu Cyendeleele babenge Mukenji wa lupandu anyi?

³⁴⁶ “Ee,” mùdi wamba, “ekeleeziya neaye...” Eyo, bôbò nebènzè nanku. Nebatungunuke anu kutungunuka, mushindu anu umweumwe awu.

³⁴⁷ Kadi, vulukaayi ne, dîbà dyônso edi, Noa uvwa mu bwâtù. Mukaji Musela mmutwibwe citampi munda ne Kilisto, cidimba cya ndekeelu cikaadi cipikudiibwe. Citampi Ciisambambo cikaadi cidileje. Citampi cya Mwandamutekete cidi ciMwaluja pa buloba. Mwânà wa mukooko ukaadi mulwe ne mwangate Mukanda mu cyanza cya dyabalume cya Yèyè awu, ne musòmbe ne mumane kunana civwa bu Cyende, civwaYe mupikule. Ncya bushuwa anyi? Citu misanga yônso anu Nkokelu Mwisâtù awu.

³⁴⁸ Isatu mbupwangane. Mudimu wa bwambi wakafika ku bupwangane bwawu paakapatulawu cyakabidi Kilisto mu mubidi, munkaci mwa bantu, mwakadyanjilabi kwambiibwa ne: “Bu mwakadibi mu matuku a Lota.”

³⁴⁹ Kaa, elaayi meeji, bantu mbafwanyine kutungunuka anu ne kuyiisha, beela meeji ne badi basungidiibwa, biitabuujja ne badi benza bîmpè, biitabuujja ne malongolodi abo adi enda adyunda, cya bushuwa, kadi kakuyi kaaditekemena nansha kaa kânà to. Nunku piikalabi ne cikeena-kumona aci civwa ncyôci aci, ne ciikale cyumishe maalu ncyoncyoncyo bwa bakaji, twâfikì pa dîbà adi. Ciibi cikaadi cikanga, baye, Mukanda ukaadi mu cyanza Cyende. Anji elaayibi meeji ku bwalu abu.

³⁵⁰ Lekelaayi nnwâmbilè eci nunku kumpala kwa kujikija mpindyewu. Nkaadi njikija. Bavwa balonde bwalu, mwamwa mu Irlande, bitangilangane ne mâyi a mbû. Kuvwa mulongo munene wa mabwe mwikale wenda ulonda kumpengampenga kwa mâyi awu, ne lwà kuulu kwa kakuna kanene aka. Nunku kuvwa muntu uvwa wenda uya, wendela ku mwelelu aku dituku dikwabo, anu—anu pa dîbà menemene dya dibândà dya mâyi a mbû. Kadi kuvwa muntu kampanda wa ngiikadilu milenga uvwa musòmbèle pa kiine kakuna aku, uvwa mumanye dibândà ne dipweka dya mâyi a mbû adi. Ûvwa mumanye ne mpa dîbà kaayi dya dituku pavwa mâyi a mbû awu ne cya kubândà. Ûvwa mumanye ne mpa dîbà kaayi pavwa mâyi a mbû ne cya kwikala mabânde. Mulumyana ewu yèyè kavwa ucyuka bya dîbà abi to.

Ûvwa umwe wa ku ba cimanya-byônsò aba. Ûvwa yêyè ne wende mmwenenu. Ûvwa mwena manayi a dipiiyangana, wa meeji matwe, muntu wa luumvu lutwe, kadi kayi anu mumanye dîbà dya dibànda anyi dipweka dya mâyi a mbû to. Kavwa mumanye citupa cya buloba aci to. Kavwa mumanye ne mpa dîbà kaayi pavwa cimanyinu ciikale mu cyôci to, pavwa ngondo umusha nyima kudi buloba.

³⁵¹ Kadi padi anu Nzambi umusha Nyuma Wende pa buloba, mwaneetu, kwabu's kwajiki, s'nkujike kwônsò.

³⁵² Ngondo wawa yêyè anu mudidinge muumuke kaaba kende aku, mâyi's mmafwanyine kubwikila buloba anu mwakenzekabi paakabubanga Nzambi apu, mu Genese 1. Kadi ngondo wâkasòmba mwaba awu, kadi padiye anu nansha utuma mutu ku luseke, mâyi a mbû adi abanga kubànda.

³⁵³ Mukulumpe wa lungenyi uvwa musòmbèle mu bwikadi bwa cyôci aci ewu, Ûvwa yêyè mumanye ne mpa dîbà kaayi pavwaci cyenzeka. Mulumyana ewu yêyè kavwa mumanye to. Kavwaku mucilonge to. Kavwa ucicyuka to. Ki mukulumpe wa lungenyi ewu kupatukaye lubilu, kwamba ne: "Mukwetu wanyi, wâmanya kudidingi wâya kule to. Alukila, lukasa. Kudi cimanu. Kwèna mwa kubànda pa cimanu aci to. Neubutuke. Kadi . . . Bimanyinu mbimweke, bya cikondo. Mâ—mâyi a mbû neicikile dyakamwe, ne kwakupeta mushindu wa kwalukila to. Kùtùngunuku ne diya to."

³⁵⁴ Ki muntu awu kukudimuka, kumuseka, kwambaye ne: "Nda ukendele yebe. Mêmè ndi mumanye cîndi mwa kwenza ne cîndi nciyi mwa kwenza." Kadi mâyi a mbû akamubucikila's. Nwamonu anyi?

³⁵⁵ Dîbà didi mwa kwikala dimane kuya kupita mutudi twêtù twela meeji. Nwamonu anyi? Necikubucikile. Kùtùngunuku ne diya to. Kanwenji nanku to, nwènù. Panwikala misangu yônsò nungiitabuuja bu musadidi wa Nzambi, itabuujaayi dîyi dyanyi mu dinda emu, piikalabi ne nukaadiku bangiitabuuje. Dîbà ndifwanyine kwikala dikaadi dimane kupita. Mifundu bûngi cyanaana yidi yileea ne bidi mushindu awu. Mpindyewu, vulukaayi ne, ncyèna ngamba ne mmudibi to. Ncyèna mumanye to. Kadi tangilaayi anu cyanaana.

³⁵⁶ Kadi ngâkòsu mabeji matwe ku dikumi mwab'ewu, bîmvwà ngumvwa bwôwà bwa kunwambila abi. Nwamonu anyi? Nwamonu anyi? Mandamu Wood udi ntemu wa bwalu abu, ne Mukalenge Wood. Pâmvwà muye mu dinda emu bwa kubamona, mvwa mwambe ne: "Ncyèna—ncyèna mwa kubambila aci to, ncyèna mwa kafika too ne kwôkò aku to. Nêmfilè anu Mifundu bûngi kampanda ebu, ne kubashiilayi, bwalu nebikwaciibwe pa mikaba." Nebiye.

³⁵⁷ Nenku bantu nebaseke Mukenji ewu. Bidi anu bîmpè, kakwakwikala mushindu wa kukudimuka kabidi to, dimwe dya ku matuku adi panshi aa. Tungunuka, ikala wêwè anu cidimba cya ekeleeziya. Kosa wêwè anu nsuki yebe ayi, ikala anu udilaaba bilaabu kwîsù. Tungunuka, ikala anu wangata “Taatu, Mwânà, ne Nyuma Mwîmpè,” pawikala muswe, aci, ucivwije Nzambi isatu bwa wikale mumpangaanu. Tungunuka, shaala mukwate anu ku bulongolodi bwenu abu. Enza wêwè anu nanku, pawikala muswe.

³⁵⁸ Udi wamba ne: “Nkaadi muje maja mu Nyuma, nkaadi mwakule mu myakulu; ndi muMupete.”

³⁵⁹ Mémè nkaadi mumonemone démons yenza cintu cimwecimwe aci. Nkaadi mumone baloji bakaji baakula mu myakulu ne bayandamuna; ne bafunda mu myakulu myenyi, bayandamuna; biine abu biikale banwine mashi mu kabalubalu kaa mutu wa muntu, ne biikale basoka dyabulu, baja maja mu nyuma.

³⁶⁰ Ba-Muzulumanyi batu baja maja mu nyuma, mushindu awu, bakafika too ne ku dyangata bilangilangi badipayikabi mwinshi mwa minu; ne bangata difuma badibwejadi mu mpala batubula, mushindu awu, kadi badipatula, kakuyi kamata kaa mashi nansha kakese kapatukamu to.

³⁶¹ Ba-Indiens batu bendele mu mudilu, ku makàsà kutupu, mudilu wa bule bwa centimètres makumi citeema; ne centimètres lukama ne makumi abidi, makumi citeema, anyi lukama ne makumi abidi mu bucyama; bapwidija, bapuupula makala awu too ne padiwu ashaala matooke zee ne mudilu; kadi kabayi bapetaku nansha kaadibuba mu makàsà amu to, cibi biikale bavila ne kakutuku cintu paaci ne n’Yesu Kilisto to.

³⁶² To, to, mulunda wanyi. Dîyì ndidi dicyamba edi. Bikengela bantu ne Dîyì bilwe cintu cimwe. Nwamonu anyi? Yesu ne Dîyì bavwa cintu cimwe; Yêyè uvwa Dîyì. Ne padi Yesu ne mwoyi munda mwa muntu, aci cidi cimuvwija yêyè ne Dîyì bilwa cintu cimwe. Kwikadi. . . Nsömbelu webe ngudi wamba cyûdi.

³⁶³ Mpindyewu uditangile anu wêwè mwine mu lumwenu lwa Nzambi, wamba ne: “Ndi ne mmwenekelu kaayi mu dinda emu?” Patudi tusambila apa.

³⁶⁴ [Mwaneetu wa balume kampana udi wakula mu mwakulu mukwabo. Mukwabo mwaneetu wa balume udi ufila dyandamuna. “Bânà Baanyi, leelu ewu, nyewu Nkwambila. Eyo, Mémè mwine, Nzambi wa Bukole bwônso, ngâtàngidi pa buloba leelu ewu. Ngãmònu bubi kudibu bufikishe bufuki ebu. Eyo, Ndi mmona mpekaatu udi muntu, dituku edi, mudyèlèmu. Eyo, wêwè kwêna mumanye ne Ndi mukwenzele cintu cinene anyi? Eyo, Ndi mutume muntu mu dituku dya ndekeelu edi, eyo, bwa yêyè kwikala cikolokolo bwa lukongo elu. Kadi Ndi nkwambila, dituku edi, wêwè cisamba Cyanyi, bààbùngi mbasekeseke dîna

edi. Eyo, mbakome nyima ku bintu bidiye mwambe. Kadi Ndi nkwambila wêwê ne, aba biikalà mwa kuteeleja Mèyi aa, Nêndokeshè mabenasha manene pambidi paabo. Mémè Ndi Nzambi wa Bukole bwônsò. Mémè ki wáfuta, mu dituku edi, aba biikalà mwa kwakidila Mèyi aa ne meeji matooke ônsò, mudi Mukalenge wamba.”—Muf.]

. . . mulalakane kule ne Nzambi,
Mpindyewu ndi mpingana kumbelu;

Sambilaaku, piikalabi ne ukaadiku musambile!

Baalulaku bikole maboko Ebe a dinanga awu,
Mukalenge, ndi mpingana kumbelu.

Mpingana . . .

³⁶⁵ Panucidi nutungunuka ne kwimba apu, ndi muswe kunukonkaku cintu kampana. Kudiku kaaba kampana mu mwoyi webe amu kadi kamweka bu kafiikisha ne mîdimà kudi mpekaatu anyi? Piikalaku mwômò, mpindyewu ki dîbà ndyôdi edi dya kukùumusha, mpindyewu mene, piikalabi ne kucidi luse.

³⁶⁶ Eci, ndi ntekemena ne, kabyena nanku to. Ndi ntekemena ne katwena kaaba aku to. Kadi kabyenaku bimweka bu ne tudi bafwanyine kwikalapu anyi? Wikale muteeleje cyâmbi Nyuma Mwîmpè munkaci mwa cisamba aci, paanyima paa mêmè mumane kujikija ne: “Cidi n’Diyi bwenu *nwênù*.”

³⁶⁷ Nenku piikalabi ne kadiku, pawikala ne mîdimà kampana mu nsòmbelu webe, kwênàku muswe bwa kulwa apa ku nyungulukilu wa cyoshelu eku mpindyewu, patucidi tutungunuka ne kwimba apa anyi? Mpindyewu mene, piikalaku dilubakaja kampana dya meeji, piikalaku katoba kampana, kwikadi walaadikija bwalu abu to.

³⁶⁸ Ndi ntekemena ne mutwishibwe ne kabyena nanku to; kadi ki ciikalàku, dimwe dya ku matuku adi panshi aa, ne ncifwanyine kwikala leelu ewu.

Mpindyewu, Mukalenge, ndi mpingana . . .

³⁶⁹ Ne mupuuya wa mu mimpempe yebe anu mu nyungulukilu webe amu! Badi bateeleja mukaba wa mèyi biikalapù nanshà mwa kumona cidi munkaci mwa kwenzeka mwab’ewu mpindyewu’s we; nkacya anu bàmbatangana, badila myadi, bafumina myaba yônsò.

³⁷⁰ Cikeena-kumona aci, cya pânciwà mwânà mutekete aci, dîbà adi dyâkumbanyi anyi? Eci ki cikondo cidi bantu baa mmwenekelu wa muzengele, wa dibungama awu . . . iferno mwikale ufukiibwa apa mene pa buloba ebuni anyi?

³⁷¹ Byoshelu ne tujila, ne byônsò, mbyûle tente patudi twakulangana apa. Pawikala kuyi ne mushindu wa kufika ku nyungulukilu wa cyoshelu anyi mu tujila, nansha penyi munkaci mwa nkama ya bantu eyi, juukila wêwê anu kuulu, pawikala

wamba ne: “Ndi muswe kujuukila kuulu bwa kusambila, anu bwa bantu bamanye,” anyi kutwa binù, cyònsò cyùdì muswe kwenza aci. Kaa, ekelekele! Mpindyewu kamwenaku mushindu wa wêwè kumona muntu kampanda musòmbèle panshi to. Bantu mbiimanyine kuulu myaba yònsò.

³⁷² Swayi ngâmbèku eci nunku ewu: Nzambi kiitabiku, Nzambi kiitabiku bwa cîngâmbì eci ciikale mpindyewu to. Swayi ngùmvwè eci nunku, muntu ne muntu; Nzambi kiitabiku to. Kudi. . . Ndi ne bânà badi kabayi banji kubwela to. Ndi ne bânà baa bakaji babidi ne wa balume umwe. Ndi ne bânà beetu baa balume. Ndi ne baa kwetu badi kabayi banji kubwela to. Nzambi kiitabiku ne ngâsà ikale ukaadi mutushiye nansha; bwa ne byònsò ebi kabiikadi anu didicinkila cyanaana.

³⁷³ Kucidi kushaadileku ndambu wa ngâsà anyi’s, Mukalenge? Biikaleku ne ndi mutupakane pa bwalu ebu, Mukalenge. Ciikaleku ditupakana bwa ne mmpidyewu. Bwa ne mêmè, kabiikadiku ne mmwômò to, biikaleku ne bantu bacidi anu mwa kusungidiibwa. Enzaku nanku, Mukalenge. Ndi ndomba, ne ndambula bateeleji aba kùdì Wêwè mpindyewu, mu Dîná dya Yesu Kilisto.

³⁷⁴ Muntu ne muntu asambile mpindyewu, anu bu. . . Àpu ne bidi nanku? Mpindyewu, ncyèna mumanye ne bidi nanku to, kadi àpu ne bidi nanku? Sambila mu mushindu webe wêwè. Sambila anu mushindu wùdì wêwè muswe kusambila awu. Kadi bu ne civwa bulelela, citudi bafwanyine kwenza ncinyi, balunda baanyi? Citudi bafwanyine kwenza ncinyi? Ncinyi, ncinyi ciikalà mwa kwenzeka? Mpindyewu sambilaayi, nwènù bònsò. Ela wêwè anu—anu mbila, sambila wêwè anu mu mushindu wùdì muswe kusambila awu. Ela wêwè anu mbila udidila Nzambi, mu mushindu webe wêwè. Éyì Nzambi wa yaaya!

. . . maboko Ebe a dinanga awu,
Éyì Mukalenge, ndi mpingana kumbelu.

³⁷⁵ “Mukalenge, mvwa ne meeji a kucyenza kukaadi ntanta mule. Ndi mwindile ntanta mupitepite bule anyi’s, Mukalenge? Eci, kwamanyi kujika anyi? Éyì Nzambi, baalulaku maboko Ebe a dinanga awu ungaakidile. Cintu kampanda munda mwa mwoyi wanyi nyewu cikusengeleela bwa kucipeta, Mukalenge. Baalulaku maboku kabidi musangu ewu. Piikalabi ne dîná dyanyi divwa mu Mukanda wa Mwânà wa mukooko, akulaku naanyi mpindyewu, Mukalenge. Enzaku ne ncyâkìdìlè mpindyewu mene. Swaku wènzèku nanku, Nzambi.”

Mpingana kumbelu, mpingana kumbelu,
Kaa, kashidi (Kashidi kaanyi, Mukalenge.)
bwa kubenga kulalakana kabidi;
Baalulaku bikole maboko Ebe a dinanga awu,
Éyì Mukalenge, ndi mpingana. . .

376 Bible mmwambe, paajingululabo Yesu, ne: “Muntu ne muntu neadile mwadi byenze bu ne mmwanende wa balume umwepele mulela udibo bashipe.”

Mpingana kumbelu,

377 Nwênù badi pambelu, nwênù badi mu mashinyi enu a tudyendelandela, ku bisanji, nwênù badi biimane mu nyungulukilu wa citanda, bààbùngì beenu, eyemejila anu mutu webe ku nzubu aku, wámbe ne: “Mukalenge, ikalaku ne luse kùndì.”

Baalula . . .

Ikalaayi ne meeji matooke a nwamba kufwa, balunda baanyi! Anji elaaayi meeji ne ncikondo kaayi citudi ne mwoyi eci! Tukaadi penyi?

. . . dinanga
Mukalenge, ndi mpingana mpindyewu
kumbelu.

Mpingana kumbelu, . . .

378 Mukalenge Yesu, ngènji mwanyi paanyi mwònsò mùndì mumanye mwa kwenza. Ngènji cyònsò cìndì paanyi mumanye mwa kwenza. Enzaku, Mukalenge, biikaleku ne biibi bya luse bicidi anu byunzulula. Mu nkama ne nkama eyi, nkama yetu ya bushuwa badi bakukeba Wèwè pa dîbà edi aba, umushaku ditoba dyònsò dya mpekaatu, Mukalenge, ne ubabweje leelu ewu.

379 Ndi—ndi mbaakwila, ne mwoyi wanyi wònsò, patudi tumona ne kî ng’anu muntu kampana wakula to, kadi, mMufundu Wôwò mwine mwikale utufikisha ku dîbà edi. Ne cikeena-kumona aci, cya pàncìvwà mwànà mutekete aci, mmona bantu abu mu ngiikadilu awu; nenku mpindyewu, ngeela meeji ne, iferno awu yèyè mwine, luse lukaadi lumane kuumushiibwa pa buloba, ne patudi twakulangana apa iferno yèyè mwine ki ukaadi mwaba ewu, ne bantu biine, Mukalenge, bakaadi mu ngiikadilu wa ukwacisha bwôwà.

380 Éyì Nzambi wa Bukole bwònsò, pa Ekeleeziya Musungula ewu, nyewu ndomba, Nzambi, bwa Wèwè kupongolola mabeneshà Ebe, bwa kupetabo mu—mudimu wa bwambi wa bujaadiki, wà bwena ùvwà naawu Lota, wà bwena ùvwà naawu Noa, wà bwena ùvwà naawu Yesu, bwa badi bajimine Cyendeleele, piikalabi ne wôwò awu ùdikù; bwa bôbò biine batwibwe citampi mu Bukalenge bwa Nzambi, kadi biikale bafidila Yesu Kilisto bujaadiki ne udi umwèumwè awu makeelela, leelu, too ne kashidi. Enzaku nanku, Mukalenge. Swaku witabuuje dilomba dyetu, patudi tulomba mu Dinà dya Yesu apa.

381 Sambila anu mushindu wùdì muswe kusambila awu mpindyewu. Kwikadi ulwijakaja to. Kwikadi ulwijakaja to. Kadi

amba tũng ne wêwè ki mwena dîna dya ndekeelu didi ne cya kufundiibwa mu Mukanda?

. . .mpingana kumbelu.

Mpingana kumbelu, mpingana kumbelu,

³⁸² Mwaneetu Neville, bānda uye kabasambidila. Mpaasata nyawu ukaadi ulwa kusambila neenu panudi nusambila apu. Mémè nêngìikalè ngimba musambu.

Baalulaku bikole maboko Ebe a dinanga awu,
Mukalenge, ndi mpingana kumbelu.

Mpingana kumbelu, mpingana kumbelu,
Bwa kubenga kulalakana kabidi kashidi;
(Eyowa's, Mukalenge.)

Baalulaku bikole maboko Ebe a dinanga awu,
Mukalenge, ndi mpingana kumbelu.

Mpingana kumbelu, mpingana kumbelu,
Bwa kubenga kulalakana kabidi kashidi;
Baalulaku bikole maboko Ebe a dinanga awu,
Mukalenge, ndi mpingana kumbelu.

³⁸³ [Mwaneetu Neville udi utungunuka ne kusambila. “Nenku swaku bwa muntu ne muntu, Mukalenge, ikale musankishiibwe, mu dituku edi ne, Wêwè udi Nzambi wa Bukole bwònsò. Piikalabi ne ki dyalabaja dya luse ndyòdi edi, enzaku bwa lwikalè kudi muntu ne muntu, sungasunga.”] Enzaku nanku, Mukalenge. [“Bìikalèku nanku mpindyewu, Taatù. Ne ditalala dya Nzambi, ditu misangu yònsò anu dipita cyumvwilu adi, dilwe cyakabidi kudi myoyi yidi munkaci mwa kwindila eyi.”] Eyowa's, Mukalenge. [“Eci ciikale dîbà mene.”] Eyowa. [“Tudi twitabuuja ne Wêwè wāmanyi kuteelejila mu Dyulu amu.”] Nzambi, enzaku nanku. [“Cyònsò cidì mu cibucilu bwetu twètù aci, cyòci cijike, pa dîbà adi, Mukalenge, tudi tumanya cidì ndekeelu ne ncinyi.”] Eyowa's, Mukalenge. [“Kadi, byòbi kabiya nanku to, Ntemu awu alwe.”] Eyowa's, Mukalenge. [“Badi balwe aba, enzaku bwa bapete ditalala mu dituku edi,”] Enzaku nanku, Mukalenge. [“kupicila ku Yesu Kilisto. Ne mu Dîna Dyende mmutudi tulomba emu. Amen.”—Muf.]

³⁸⁴ Mukalenge Yesu, ndi ndombaku bwa Wêwè kusungila Becky ne Sarah ne Joseph, ne bakwabo, kabidi, Mukalenge. Eci kacyzekediku bānà baanyi to, Mukalenge. Kacyzekediku bānà beetu ne balunda baanyi to. Enzaku nanku, Mukalenge.

³⁸⁵ Katwena bamanye to, katwena bamanye to, kadi tudi munkaci mwa kumona cintu kampanda, Mukalenge. Ncimanyinu cya dinyungishangana naaci mpindyewu mene kumpala kwetu anyi? Enzaku nanku's, Mukalenge. Utuseemejeku bònsò pabwìpì Neebe, lukasa, Mukalenge. Tudi baKunange ne tudi Neebe dijinga. Bìikalèku nanku, Taatù, Nyuma Mwimpè atupeku busambi mu myoyi yetu mpindyewu.

386 Tudi tulomba bwa ne twamonaku mwa kwikala bantemu Beebe mu dîbà edi, bwalu tudi bamanye ne cyôci eci cidi ne cya kwenzeka. Cyakadyanjila kwambiibwa munda mwa bikondo, ne butudi naabu mbwa kukungamangana naaci, bwa ne tudi ku cikondo cya nshiikidilu patudi tumona bimanyinu ebi bimweneka apa. Tudi bamanye, ne bakaadi batwâmbile kukaadi bidimu byâbûngî mpindyewu ne, cintu eci necyenzeke. Mpindyewu nyewu tucimwena anu mu ciibi cyetu mene, ciiji cikole cinene cya bukole cya Nzambi cyendakana mu misêesu, cikwata badi kabayi batengula cipita naabo. Mwaba udiku kawuyi Mashi ku ciibi awu, mwanjelo wa lufu udi utuutapu; kadi bôbô badi anu batungunuka ne kwikala ne mwoyi, kadi biikale bafwe padibo ne mwoyi apu, kabayi bapete luse, kabayi ne Nzambi, ne kabaciyiku mwa kusungidiibwa nansha.

387 Nzambi, mushindu mwine utudi tuKusakidila bwa badi basungidiibwe aba! Mushindu mwine utudi... Ndibenesha bunene kaayipu didi mu myoyi yetu, dya kwikala basanganyiibwe munda mpindyewu, mwinshi mwa Mashi, padi mwanjelo wa ndekeelu awu mwikale upitakana pa buloba, wenda ubakula... .

388 Aba bavwa pambelu paa mashi, baakafwa kakuyi luse to. Aci ncivwa nkokelu wa ndekeelu wa Môsà. Wa kumpala, nso—nsongaalume wa citende wakula ne Izaleela; mwibidi, upweka bwa kuya kabasungila; mwisâtù, civwa mmukenji wa ndekeelu. Bishima bikaavwa byenjiibwe, Môsà ukaavwa mu njila mutangile ku buloba bulaya, ne bapikula. Éyi Nzambi wa yaaya, ikalaku ne luse, nya' ndomba, mu Dîna dya Yesu.

389 Mpindyewu ndi musweku kulomba nunku: Wêwè udi munkaci mwa kusambila awu, wêwè udi muumvwe ne wâpeci luse awu, ne udi (Nzambi) mwikale muumvwe ne ukaadi mu Bukalenge bwa Nzambi awu, mudyûmvwè ne—ne ukaadi mwele lwongo mu mushindu kampanda anyi mushindu kansanga, ne mu Kilisto mmûdi ne diitabuuja dya kwitabuuja ne ukaadi mwena Kilisto, ukaadi mulediibwe cyakabidi ne mumanye ne ukaadi mwena Kilisto, ne kakuyi mpatà to. Ndi njinga bwa nwênù bônso nujuukile kuulu, nwênù badi baswe ciine aci abu, biikale nwitabuuja ne, luse alu ndwalabajiibwe too ne kunudi mpindyewu, ne nukaadi beena Kilisto, ne biikale—ne biikale nwitabuuja ne—ne Mashi akaadi malaabiibwe ku mwoyi webe, ne—ne—ne nudi bafwidiibwe luse ku mpekaatu ne mpekaatu yônso.

390 Eci civwa ncintu cikole be bwa kunwambila nwênù aba. Ndi ne kusakidila kwâbûngî, ne pândi mmona bantu bajuukile myaba yônso. Ne nwênù, ndi—ndi menemene... .

391 Ncyêna mumanye ne cintu eci ncilelela to, kadi cidi ne cya kwikala mushindu awu, dîngà dituku. Nwamonu's, cidi ne cya kufika ku cyôci aci, ne ncifwanyine kwikala

mpindyewu. Nwamonu anyi? Mu mushindu wònsò, baa pa buloba nebatungunuke anu kutungunuka. Bantu nebiikale anu batungunuke ne kulwa ku cyoshelu, nebatungunuke anu ne kwela kwa mbila mikole, kadi kabyakwikalaku ne dikwacisha nansha dikese to. Nwamonu anyi? Kwabo nekwikale kujike, nwamonu's, nekwikale kumane kujika. Kakwakwikalaku luse to nansha lukese. Nwavulukaayi bwalu abu. "Ne ntempelu wakalwa mùle tente ne mîshì." "Ewu udi mukooyike, udi utungunuka ne kwikala anu mukooyike; ewu udi mwakane, udi utungunuka ne kwikala anu mwakane; ne ewu udi wa cijila, udi utungunuka ne kwikala anu wa cijila." Kakucyena kabidi luse to, padi Mwânà wa mukooko wangata Mukanda; ki cyòci aci, ki cyònsò ncyòci aci. Kadi mbimweneke bikole menemene anu bu ne mbifwanyine kwikala mpindyewu.

³⁹² Pàmwäpa tudi ne dituku dikwabo; pàmwäpa leelu ewu ki dituku adi mene. Pàmwäpa maalaba ki dya ndekeel-. . . Pàmwäpa diloolo edi ki diloolo dya ndekeelu. Pàmwäpa eci ki cidimu cya ndekeelu. Ncyêna mumanye to, nwênù balunda baanyi. Ki mêmè udi unwambila awu, ncyêna mumanye to. Kabaadyakucingambilaku to.

³⁹³ Kadi pangata Nzambi dînà dya ndekeelu adi ne kudipikula mu Mukanda wa Mwoyi awu, bwa aci budi bumba bujika. Nwamonu's, kakwena mwa kwikalaku mênà makwabo to, nansha bishi. Kakwena mwa kwikalaku makwabo to, nansha bishi. Kwajiki. Kwamanyi kujika.

³⁹⁴ Mbanganyi badi bamanye ne mbulelela? Eyo. M—mbulelela. Mpindyewu utudi tudyumvwa bulelela ne . . .

³⁹⁵ Ne ndi mmona disangisha edi dîndi muyiisheyiishe ne mudimwijedimwije edi, bidimu byònsò ebi, ne mumone Mukenji bu ewu wündi. . . wündi—wündi muyiishe mu mmwenekelu wa kânâkânà ewu. Kadi vulukaayi anu ne, ndi ncyamba mu mushindu wa nwênù kucyumvwa, mmwenekelu wa kânâkânà; bikwabo bintu mbifwanyine anu kununyukulula bònsò kadi kunushiya anu tusunsukila, nwamonu's. Kadi ndi anu mubyùmùshè cyanaana, mudyùmvwè anu bwa kwenza nanku, bwalu ncyêna mutwishiibwe to. Pândi neiyi mutwishiibwe bwa mwaba wündi ndyata dikàsà, nêndyatè biteketebitekete, nwamonu's, kadi nnwambila anu cyanaana.

³⁹⁶ Teelejaayi. Kanwena ne disanka anyi? Nkufwanyineku kwikala cintu kampanda citambe bunene, cyûdi mufwanyine kwelela meeji, cyûdi mwenze mu nsòmbelu webe anyi?

³⁹⁷ Àpu ne kwajiki mpindyewu? Àpu ne kwònsò nkujike? "Kaa," mùdi wamba, "Mwaneetu Branham, pàmwäpa's. . ." Eyo, ndi mumanye. Mbafwanyine kwikala anu batungunuka. S'bakaadi bacyènzèze, misangu yònsò. Nkaadi mumane kucyumvwija ne mucijaadike ku Mifundu, nwamonu's, baa pa buloba

baakatungunuka anu ne diya, kadi's kukaavwa kumane kujika. Nwamonu anyi?

³⁹⁸ “Dicimbakana dya diyiiisha ditu disungila bajimine. Nenku didi ndicimbakana, bwa bantu. Didi lungenyi lwa Nzambi.” Nwamonu anyi? Nzambi udi Nyuma. Ûtu ukwata mudimu mu mishindu ya nyuma, nwamonu's, bwa kwenza maalu Ende a kukema; mishindu ya yikemesha. Kadi, twêtù tudi bantu, tudi ne mikalu. Katwena bamanye to; tutu twêtù tutangila anu bitudi mwa kumona abi. Kadi Cintu kampanda munda mwetu . . .

³⁹⁹ Pawapatuka mu cibambalu aci mwaba ewu, pawikala kuyiku mwanji kucimona kacya baakulela to, kacya kuyiku mwanji kumona bukênkê bwa dîbà to, udi mufwanyine kumanya ne udi muumuke mu cibambalu eci, mubwele mu bukênkê bwa dîbà anyi mu cintu kampanda. Kuvwa luuya. Uvwa mufwanyine kulumvwa. Nansha kwôkò kakuyi cyumvwilu kampanda cya mubidi webe bwa kwamba ciine aci to, udi mufwanyine kumanya, kaa, cyumvwilu nansha cimwe cya lumono bwa kubumona. Kakuyi mushindu wa kumona mici ya mâyi a matamba ayi, wa kumona bufuki; bu ne kuvwaku ne lumono to, muntu nansha umwe kayi naalu. Udi mufwanyine kumanya ne udi mufwanyine kwikala mu bwikadi bwa cintu kampanda; cyumvwilu cyebe cya lulengu ncifwanyine kukwambila cyôci aci. Udi mufwanyine kumanya cyôci aci. Bu mêmè mwa kuteeta kukwambila ne: “Ndíbà. Didi difila nsesa. Dyôdi ki didi dileeja bintu,” wamonu's, udi mufwanyine kumanya ne didikù bwalu udi mwa kuumvwa dyôdi adi ne byumvwilu byebe. Ncya bushuwa anyi?

⁴⁰⁰ Mpindyewu, tudi bamanye ne Kilisto udi mwaba ewu. Wamonu anyi? Pàmwápa kwêna uMumona ne mèsù ebe to. Wamonu anyi? Pàmwápa kwêna umona to. Kadi ku cikeena-kumona, mêmè ndi nkwambila ne, Yêyè udi mwaba ewu. Tudi tuumvwa Cyôci aci. Tudi bamanyè ne kudi Cintu kampanda mwaba ewu cidi byumvwilu byetu kabiyi byamba to. Nyuma ngudi ucyaamba ne, Kilisto udi mwaba ewu.

⁴⁰¹ Ndi ngumvwa ne Yêyè mmutupikule. Ndi ngumvwa ne mênà etu adi mu Mukanda Wende. Ndi ngiitabuuja ne tudi bapikudiibwe ku Mashi a Mwânà wa mukooko.

Mêmè ndi mununange, ne ndi mumanye ne nwênù nudi banangangane.

Kaa, mwonji udi uswikakaja myoyi yetu
Mu dinanga dya bwena Kilisto ubeneshiibwe;
Bwobumwe bwa meeji a buuwetu
Mbufwanangane ne bwa ku Dyulu.

⁴⁰² Bivwa bikengela bwa twêtù kwikala anu tudyumvwa mushindu awu muntu bwa mukwende. Nwamonu's, tudi ne cya, tudi ne cya kwikala tudyumvwa mushindu awu muntu bwa mukwende. Nwamonu anyi? Bwalu, patudi tunangangana

muntu ne mukwende, tudi tunanga Nzambi. “Udi mwa kukina mwaneenu ùdì mumone, kadi kwamba ne udi munange Nzambi Ùdì kuyi mumone anyi?” Tudi ne cya kunangangana muntu ne mukwende. “Muntu nansha umwe katuku ne dinanga dinene kutamba Yèyè wàkatèeka mwoyi Wende panshi bwa mwena lukuna Wende to, bwa bôbò kushaalabo balunda Bende.” Kaa!

⁴⁰³ Nutu bamanye musambuawu wa ne, *Mwonji Ùdì Ùswikakajanganà Ubeneshiibwè* anyi? Kì mbilenga bya dikema anyi? Mwonji awu ubeneshiibwe! Udiku mufwanyine kutupa cyona cya wôwò awu anyi, mwaneetu wa bakaji, mwaba awu? Anji kulekela cisanji ciikale cimba ndambu.

⁴⁰⁴ Àpu nî nkujike? Àpu ne Nkokelu Mwisâtù, udi munkaci mwa kulwa mpindyewu awu, mbwa kuyiisha badi bajimine? Àpu ne bifwanyikijilu byònsò nebidileeje mpindyewu? Ne twètù biikale munda, ne twètù biikale munda, aci kî ncifwanyine kwikala cilenga menemene anyi? Bwobumwe kaayipu’s we!

Kaa, mwonji udi uswikakaja myoyi yetu
ubeneshiibwe (Cìdì cicyenza ncyôci eci):
Mu dinanga dya bwena Kilisto ubeneshiibwe;
Bwobumwe bwa meeji a buuwetu
Mbufwanangane ne bwa . . .

⁴⁰⁵ Ciine aci civwa ncinyi? “Bwobumwe bwa meeji a buuwetu.” “Bukalenge Bwebe bulwe. Diswa Dyebe dyenzeke.” Nwamonu anyi?

⁴⁰⁶ Twètù tutu tukeba kuvwija Nzambi bu mwânà wa kwikala kutumakaja, mwena mudimu wa kutambakaja anyi cintu kampanda ne: “Nzambi, enza *cikampanda*, enza *cikansanga*.”

⁴⁰⁷ Yesu wakamba ne: “Nusambilaayi ne: ‘Bukalenge Bwebe bulwe. Diswa Dyebe dyenzeke pa buloba, bu mudidi dyenzeka mu Dyulu.’” Pa dîbà adi, Dyulu ndipwekeshiibwe too ne panshi patudi twètù apu, ne twètù tudi—tudi babandishiibwe too ne mu Dyulu, ne biikale basòmbe mu myaba ya mu Dyulu mpindyewu mu Kilisto Yesu. Tudi bônsò twitabuuja ne Mukenji awu udi Bulelela, wa ne Yesu Kilisto, Mwânà wa Nzambi, ngudi utupikula.

⁴⁰⁸ Tubwitaayi kwîsù mpindyewu biikale beele byanza muulu, patudi tuwimba apa.

Mwonji udi uswikakaja myoyi yetu
Mu dinanga dya bwena Kilisto ubeneshiibwe;
Bwobumwe bwa meeji a buuwetu
Mbufwanangane ne . . . (Tungunuka anu ne
kuwimba ku cisanji.)

⁴⁰⁹ Mpindyewu, mumwemwe nansha umwe. Edi dîbà kî ndya kufukisha mimwemwe to. Biikale ne ndondo wa meeji matooke, padi musambu awu wenda wimbiibwa ku cisanji apu, tulabulaayi muntu kampanda udi ku luseke lwetu ku cyanza,

twamba ne: “Nzambi akubeneshe, mwena Kilisto,” ne meeji matooke ônsò.

⁴¹⁰ Nzambi akubeneshe, Mwaneetu Neville. [Mwaneetu Neville udi wamba ne: “Akubeneshe, Mwaneetu Branham.”—Muf.] Ne bidimu makumi ataanu ne citeema. [“Ncya bushuwa.”] Kule be!

Nzambi akubeneshe, Mwaneetu . . . ? . . .

Mpindyewu twèlàayi byanza muulu kudiYe.

Patudi tutapuluka,
Bidi bitupa kusaama munda;
Kadi netwikale anu baswikakane mu myoyi,
Ne biikale tutekemena bwa kusangila kabidi.

⁴¹¹ Mpindyewu twinyikaayi mitu yetu, ne, cyapamwe, katuyi bamanye cùkalà matuku acivwawwa mwa kututwadila, pa dîbà edi, katuyi bamanye ne nkujike to. Mémè ncyèna mumanye to. Ncyèna mwa kwamba to. Ncyèna mwa kwamba to. Ncyèna mumanye to. Kadi kumpala kwa maalu atudi babuulule mu dinda emu awu, tusambilaayi disambila ditu Mukalenge mutwâmbile bwa kwikala kusambila adi. Nansha biikale nanku: “Bukalenge Bwebe bulwe. Diswa Dyebe dyènzekè.” Tudisambilaayi cyapamwe:

Taatù wetu udi mu Dyulu, Dînà Dyebe Dijidiibwe.
Bukalenge bwebe bulwe. Diswa Dyebe dyènzekè pa buloba, bu mudidi dyenzeka mu dyulu.
Utupe mu dituku edi dyâmpà dyetu dya ku dituku ne ku dituku.
Ne utufwile luse ku matomboka etu, bu mutudi tufwila luse aba batu batwenzela matomboka.
Ne kutulombolu mu diteeciibwa to, kadi utusungile ku bubu; bwalu Bukalenge mbwebe Wèwè, ne bukole, ne butumbi, kashidi. Amen.

⁴¹² Mpindyewu ne myoyi yetu miinyika. Bible mmwambe ne: “Baakimba musambu, ne baakapatuka.” Vulukaayi ne, paakenzabo cyôci aci mu Mifundu, mbwalu baakapoopela mudimu wa bwambi wa Nkokelu Mwibîdi wa Mukalenge wetu pa nkuruse, ne Nkokelu Mwisâtù mwikale pabwîpi ne kubwela mu cyalu. Nkwenze anu ndambu wa mēbà paanyima paa cyôci aci, Yèyè wàkabànda mu iferno ne wakayiisha bajimine bavwa babenge luse lwabo abu.

⁴¹³ Cyona cya *Diitabuuja Dyànyì Nditàngile Kùdì*.


Diitabuuja dyanyi—dyanyi nditangile Kùdi,
 Wèwè Mwânà wa mukooko wa ku Kalvariyo,
 Musungidi wa kudi Nzambi;
 Mpindyewu ngumvwileku pândi nsambila apa,
 Umusha mpekaatu yanyi yònsò,
 Kundekediku ndal- . . . anyishaku bwa
 kuumukila ku leelu ewu
 Mêmè yònsò ngiikale anu Webe!

Pâncìdi ngendela mu nyongolo wa mîdimà wa
 njila mibwelakane wa panwapa apa,
 Ne padi lutatu lupaasalala lunnyungulukila,
 Wèwè ikala Mulombodi wanyi;
 Tumina mîdimà dîyì bwa yandamuke muunya,
 Kupula kanyinganyinga, ne bwôwà,
 Éyì anyishaku bwa kuumukila ku leelu ewu
 Mêmè yònsò ngiikale anu Webe!

⁴¹⁴ Mukalenge anubenesheku, ěnzèku bwa Mwân'Ende ne ngâsà bikenkeshe pambidi peenu. Ne Mukalenge anupe Mwoyi wa Cyendeleele, ne ikale neenu panu pa buloba ebu, ne mu buloba bwikala mwa kulwa paanyima. Kabidi, Mwoyi wa Cyendeleele, nuMukwacileku mudimu mu mikungùlù mileemile yònsò ya bikondo bicivwawwa.

⁴¹⁵ Piikalabi ne dîbà edi ki dyôdì mene, ne tukaadi bafike pa kiine kaaba aku, mêmè ncyêna ngumvwa bundu bwa cîndì muyiishe to. Ne piikalabi bikengela bwa muyiishi yònsò imane ne disangisha dyende bwa kulumbulwishiibwaye, bu mûngààkamònà mu cikeena-kumona amu, ndi ne kusakidila bwa Evanjeeliyo wûndì muyiishe, bwalu ng'Evanjeeliyo anu umweumwe awu wâkayiishabò kudi Pòlò ne bakwabo abu.

⁴¹⁶ Ndi ne disanka bwenu nwênù. Ndi ne disanka dya munudi baakidile Kilisto bu Musungidi wenu. NuMunangaayi, ne nwikalaayi nusambila.

⁴¹⁷ Nenku nênnùmònè mu mapingaja emu, bu Mukalenge mwa kwanyisha, pa dîbà mwandamutekete, mu ekeleeziya emu. Nzambi anubeneshe. Nudi mwa kutangalakaayi. 

MISÛÛKÀ YÌDÌ MU BÛLOKÒ MPINDYEWU AYI LUA63-1110M

(Souls That Are In Prison Now)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 10 a ngondo wa dikumi ne umwe, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org